



Comhairle an
Aontais Eorpaigh

An Bhruiséil, 23 Bealtaine 2018
(OR. en)

9056/18

**Comhad Idirinstitiúideach:
2016/0364 (COD)**

**EF 136
ECOFIN 432
CODEC 812**

NÓTA

ó:	An Uachtaránacht
chuig:	na toscaireachtaí
Ábhar:	Togra le haghaidh TREOIR Ó PHARLAIMINT NA hEORPA AGUS ÓN gCOMHAIRLE lena leasaítear Treoir 2013/36/AE a mhéid a bhaineann le heintitis dhíolmhaithe, cuideachtaí sealbhaíochta airgeadais, cuideachtaí sealbhaíochta airgeadais measctha, luach saothair, bearta maoirseachta - <i>Téacs comhréitigh ón Uachtaránacht</i>

Gheobhaidh na toscaireachtaí, anseo thíos, téacs comhréitigh ón Uachtaránacht maidir leis an togra thuasluaite, atá le cur faoi bhráid na Comhairle ar an 25 Bealtaine 2018.

Togra le haghaidh

TREOIR Ó PHARLAIMINT NA hEORPA AGUS ÓN gCOMHAIRLE

lena leasaítear Treoir 2013/36/AE maidir le heintitis dhíolmhaithe, cuideachtaí sealbhaíochta airgeadais, cuideachtaí sealbhaíochta airgeadais measctha, an luach saothair, bearta agus cumhachtaí maoirseachta agus bearta caomhnaithe caipitil

(Téacs atá ábhartha maidir le LEE)

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 53(1) de,

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ón mBanc Ceannais Eorpach¹

Ag féachaint don tuairim ó Choiste na Réigiún²,

Ag gníomhú dóibh i gcomhréir leis an ngnáthnós imeachta reachtach,

¹ IO C [...], [...], lch. [...].

² IO C , , lch..

De bharr an méid seo a leanas:

- (1) Glacadh Treoir 2013/36/AE ó Pharlaimint na hEorpa agus ón gComhairle³ agus Rialachán (AE) Uimh. 575/2013 ó Pharlaimint na hEorpa agus ón gComhairle⁴ mar fhreagairt ar an ngéarchéim airgeadais a thosaigh in 2007-2008. Chuidigh na bearta reachtacha sin go mór leis an gcóras airgeadais san Aontas Eorpach a neartú agus bá é an toradh a bhí air sin go raibh teacht aniar níos fearr ag institiúidí i gcoinne suaití as sin amach. In ainneoin na bearta sin a bheith an-chuimsitheach ar fad, níor tugadh aird ar na laigí ar fad a sainaithníodh a raibh tionchar acu ar institiúidí. Lena chois sin, cuireadh cuid de na bearta a moladh ar dtús faoi réir clásail athbhreithnithe nó níor sonraíodh go leordhóthanach iad chun iad a chur chun feidhme go rianúil.
- (2) Is é is aidhm don Treoir seo aghaidh a thabhairt ar na deacrachtaí a bhaineann le forálacha ar léir nach raibh siad soiléir go leor agus ar baineadh léirmhínthe éagsúla astu dá bharr sin nó a measadh go raibh siad ró-achrannach le haghaidh institiúidí ar leith. Tá coigeartuithe ar Threoir 2013/36/AE ann freisin a bhfuil gá leo i ndiaidh reachtaíocht ábhartha eile de chuid an Aontais Eorpaigh a ghlacadh, mar shampla Treoir 2014/59/AE ó Pharlaimint na hEorpa agus ón gComhairle⁵ nó na hathruithe a beartaíodh i gcomhthráth le Rialachán (AE) Uimh. 575/2013. Ar deireadh, cuirfear an creat rialála reatha i gcomhréim níos fearr le forbairtí idirnáisiúnta leis na leasuithe a beartaíodh chun comhleanúnachas agus inchomparáideacht idir na dlínsí a chur chun cinn.

³ Rialachán (AE) Uimh. 575/2013 ó Pharlaimint na hEorpa agus ón gComhairle an 26 Meitheamh 2013 maidir le ceanglais stuamachta i gcomhair institiúidí creidmheasa agus gnólachtaí infheistíochta agus lena leasaítear Rialachán (AE) Uimh. 648/2012, (IO L 176, 27.6.2013, lch. 1).

⁴ Treoir 2013/36/AE ó Pharlaimint na hEorpa agus ón gComhairle an 26 Meitheamh 2013 maidir le rochtain ar ghníomhaíocht institiúidí creidmheasa agus maoirseacht stuamachta ar institiúidí creidmheasa agus ar ghnólachtaí infheistíochta, lena leasaítear Treoir 2002/87/CE agus lena n-aisghairtear Treoir 2006/48/CE agus Treoir 2006/49/CE (IO L 176, 27.6.2013, lch. 338).

⁵ Treoir 2014/59/AE ó Pharlaimint na hEorpa agus ón gComhairle an 15 Bealtaine 2014 lena mbunaítear creat do théarnamh agus do réiteach institiúidí creidmheasa agus gnólachtaí infheistíochta agus lena leasaítear Treoir 82/891/CEE ón gComhairle agus Treoracha 2001/24/CE, 2002/47/CE, 2004/25/CE, 2005/56/CE, 2007/36/CE, 2011/35/AE, 2012/30/AE agus 2013/36/AE, agus Rialachán (AE) Uimh. 1093/2010 agus Rialachán (AE) Uimh. 648/2012 ó Pharlaimint na hEorpa agus ón gComhairle (IO L 173, 12.6.2014, lch. 190).

- (3) Féadann cuideachtaí sealbhaíochta airgeadais agus cuideachtaí sealbhaíochta airgeadais measctha bheith ina máthairghnóthais de ghrúpaí baincéireachta agus ceanglaítear ceanglais stuamachta a chur i bhfeidhm ar bhonn chás comhdhlúite na gcuideachtaí sealbhaíochta sin. Ó tharla nach bhfuil an institiúid arna rialú ag na cuideachtaí sealbhaíochta sin i gcónaí in ann comhlíonadh na gceanglas ar bhonn comhdhlúite a áirithiú ar fud an ghrúpa, ní mór go dtabharfar cuideachtaí sealbhaíochta airgeadais áirithe agus cuideachtaí sealbhaíochta airgeadais measctha áirithe faoi raon feidhme díreach cumhachtaí maoirseachta de bhun Threoir 2013/36/AE agus Rialachán (AE) Uimh. 575/2013 chun comhlíonadh ar bhonn comhdhlúite a áirithiú. Dá bhrí sin, ba cheart go gcuirfear ar fáil nós imeachta ar leith formheasa agus cumhachtaí díreacha maoirseachta ar chuideachtaí sealbhaíochta airgeadais áirithe agus cuideachtaí sealbhaíochta airgeadais measctha áirithe d'fhonn a áirithiú go bhféadfar freagracht dhíreach a chur ar chuideachtaí sealbhaíochta den sórt sin i ndáil le comhlíonadh ceanglais stuamachta chomhdhlúite gan iad a chur faoi réir ceanglais bhreise stuamachta chomhdhlúite ar leibhéal aonair.
- (3a) Agus cuideachtaí sealbhaíochta áirithe á bhformheas nó maoirseacht á déanamh orthu, níor cheart cosc a chur ar ghrúpaí ó chinneadh a dhéanamh maidir le socruithe sonracha inmheánacha agus dáileadh na gcúraimí laistigh den ghrúpa, de réir mar is cuí leo, chun a áirithiú go gcomhlíonfar ceanglais chomhdhlúite, agus níor cheart cosc a chur ar ghníomhaíocht dhíreach maoirseachta ar na hinstitiúidí sin laistigh den ghrúpa sin atá i mbun comhlíonadh ceanglais stuamachta ar bhonn comhdhlúite a áirithiú.
- (3b) Faoi imthosca sonracha, d'fhéadfadh cuideachta sealbhaíochta airgeadais nó cuideachta sealbhaíochta airgeadais mheasctha a bunaíodh chun críche rannpháirtíochtaí i ngnóthais a shealbhú a dhíolmhú óna bhformheas. Cé go n-aithnítear go bhféadfadh cuideachta sealbhaíochta airgeadais dhíolmhaithe nó cuideachta sealbhaíochta airgeadais mheasctha dhíolmhaithe cinntí a dhéanamh i ngnáthchúrsa a gnó, níor cheart go ndéanadh sí cinntí bainistíochta, oibríochtúla nó airgeadais a dhéanadh difear do ghrúpa nó do na fochuideachtaí sin sa ghrúpa sin ar institiúidí iad nó ar institiúidí airgeadais iad. Agus measúnú á dhéanamh ar chomhlíonadh an cheanglais sin, ba cheart do na húdaráis inniúla na ceanglais ábhartha faoin dlí corparáideach a bhfuil an chuideachta sealbhaíochta airgeadais nó cuideachta sealbhaíochta airgeadais mheasctha faoina réir a chur san áireamh.

- (4) Cuirtear de chúram ar an maoirseoir comhdhlúthaithe na príomhfhreagrachtaí maidir le maoirseacht a dhéanamh ar bhonn comhdhlúite. Dá bhrí sin ní mór go mbeadh an maoirseoir comhdhlúthaithe rannpháirteach go cuí i bhformheas agus maoirseacht na gcuideachtaí sealbhaíochta airgeadais agus na gcuideachtaí sealbhaíochta airgeadais measctha. I gcás nach ionann an maoirseoir comhdhlúthaithe agus an t-údarás inniúil sa Bhallstát ina bhfuil an chuideachta sealbhaíochta airgeadais nó an chuideachta sealbhaíochta airgeadais mheasctha, déanfar an formheas sin trí chinneadh comhpháirteach. Ba cheart don Bhanc Ceannais Eorpach, agus maoirseacht a dhéanamh aige ar mháthairchuideachtaí institiúidí creidmheasa ar bhonn comhdhlúite de bhun Airteagal 4(1)(g) de Rialachán (AE) Uimh. 1024/2013 ón gComhairle, a chúraimí a fheidhmiú maidir le cuideachtaí sealbhaíochta airgeadais agus cuideachtaí sealbhaíochta airgeadais measctha a fhormheas agus maoirseacht a dhéanamh orthu.
- (5) Léiríodh sa tuarascáil ón gCoimisiún COM(2016) 510 an 28 Iúil 2016 go bhfuil cuid de na prionsabail, nuair a chuirtear i bhfeidhm ar institiúidí beaga agus neamhchasta iad, mar atá na ceanglais maidir leis an iarchur agus na híocaíochtaí in ionstraimí a leagtar amach i bpointe (l) agus i bpointe (m) d'Airteagal 94(1) de Threoir 2013/36/AE, ró-achrannach agus nach bhfuil siad i gcomhréir lena mbuntáistí stuamachta. Ar an dóigh chéanna, fuarthas gur mó an costas na ceanglais sin a chur i bhfeidhm ná a sochair stuamachta i gcás foirne a bhfuil íosleibhéil luacha saothair inathraithe aici ós rud é gur beag dreasacht, más ann di ar chor ar bith, atá ag foireann riosca iomarcach a ghlacadh de bharr na leibhéil sin luacha saothair. Cé gur cheart mar phrionsabal ginearálta go gceadófaí do Bhallstáit ceanglais luacha saothair a dhearadh i gcás inarb iomchuí ionas go mbeidís in oiriúint leis na cleachtais luacha saothair mar atá siad sna margaí náisiúnta acu agus in oiriúint le próifíl phoist agus freagrachtaí na mball foirne ábhartha, ba cheart go gceadófaí dóibh ar a laghad institiúidí beaga agus neamhchasta agus baill foirne le leibhéil ísle luacha saothair a dhíolmhú, ar a laghad, ó cheanglais maidir le hiarchur agus íocaíocht amach in ionstraimí ina n-iomláine.

- (6) Tá gá le critéir shoiléire, chomhleanúnacha agus chomhchuibhithe maidir leis na hinstitiúidí beaga agus neamhchasta sin a shainaithint agus íosleibhéil luacha saothair inathraithe a shainaithint freisin chun cóineasú maoirseachta a áirithiú agus chun cothrom iomaíochta a chur ar fáil d'institiúidí agus chun cosaint leordhóthanach a thabhairt do thaisceoirí, d'infheisteoirí agus do thomhaltóirí ar fud an Aontais Eorpaigh. San am céanna, is iomchuí roinnt solúbthachta a thabhairt do na Ballstáit chun na critéir sin a mhodhnú i gcás ina measfaidh siad gur gá é sin.
- (7) Ceanglaítear le Treoir 2013/36/AE go gcuimseoidh cuid shubstaintiúil, agus ar aon chuma ar a laghad 50%, de luach saothair inathraitheach cothromaíocht de scaireanna nó leasanna úinéireachta coibhéiseacha a bheidh faoi réir struchtúr dlíthiúil na hinstitiúide lena mbaineann, nó ionstraimí atá nasctha le scaireanna nó ionstraimí neamhairgid coibhéiseacha, i gcás institiúide neamhliostaithe; agus, nuair is féidir, ionstraimí malartacha Leibhéal 1 nó Leibhéal 2 a chomhlíonann coinníollacha ar leith. De réir an phrionsabail seo, is iad na hinstitiúidí neamhliostaithe amháin dá gceadaítear ionstraimí a úsáid atá nasctha le scaireanna agus cuirfear de cheangal, dá réir sin freisin, ar na hinstitiúidí liostaithe scaireanna a úsáid. Fuarthas sa tuarascáil ón gCoimisiún COM(2016) 510 an 28 Iúil 2016 go bhféadfaí gur ualaí agus costais riaracháin shuntasacha d'institiúidí liostaithe iad an toradh a bheadh ar úsáid na scaireanna. San am céanna, is féidir sochair stuamachta coibhéiseacha a bhaint amach trí cheadú d'institiúidí liostaithe ionstraimí a úsáid atá nasctha le scaireanna ar ionstraimí iad a rianaíonn luach na scaireanna. Dá bhrí sin, ba cheart an fhéidearthacht ionstraimí a úsáid atá nasctha le scaireanna a leathnú le go gcumhdófar institiúidí liostaithe.
- (8) Is tábhachtach na forlíontáin cistí dílse arna bhforchur ag údaráis inniúla mar spreagadh do leibhéal foriomlán cistí dílse institiúide agus is tábhachtach do rannpháirtithe an mhargaidh iad sin mar go mbíonn éifeacht ag leibhéal cistí dílse breise arna bhforchur ar an bpointe truíceir maidir le srianta ar íocaíochtaí díbhinní, íocaíochtaí bónas agus íocaíochtaí faoi ionstraimí Chaipiteal Breise Leibhéal 1. Ba cheart sainmhíniú soiléir a thabhairt ar na coinníollacha lena cheart forlíontáin chaipitil a fhorchur chun a áirithiú go gcuirfear rialacha i bhfeidhm go comhleanúnach ar fud na mBallstát agus chun feidhmiú cuí an mhargaidh a áirithiú.

- (9) Ba cheart ceanglais bhreise cistí dílse arna bhforchur ag údaráis inniúla a shocrú i gcomhréir le cás sonrach institiúide agus ba cheart údar maith a thabhairt leis. Ní féidir ceanglais bhreise cistí dílse a fhorchur chun aghaidh a thabhairt ar rioscaí nó ar ghnéithe de rioscaí a eisiatar go sainráite nó nach bhfuil cumhdaithe go sainráite faoi na ceanglais cistí dílse i Rialachán (AE) Uimh. 575/2013, ach amháin a mhéid a mheastar a bheith riachtanach i bhfianaise staid shonrach na hinstitiúide. Ba cheart na ceanglais sin a shuí de réir ord tosaíochta na gceanglas cistí dílse os cionn na n-íoscheanglas cistí dílse agus faoi bhun an cheanglais maoláin chomhcheangailte. Mar thoradh ar chineál institiúidsonrach na gceanglas cistí dílse breise, níor cheart iad a úsáid mar uirlis chun aghaidh a thabhairt ar rioscaí macrastuamachta nó sistéamacha. Mar sin féin, níor cheart go gcuirfeadh sé sin bac ar na húdaráis inniúla aghaidh a thabhairt, lena n-áirítear trí bhíthin na gceanglas cistí dílse breise, ar na rioscaí arna dtabhú ag institiúidí aonair mar gheall ar a ngníomhaíochtaí, lena n-áirítear iad siúd a léiríonn tionchar cúinsí eacnamaíocha áirithe nó forbairtí sa mhargadh maidir le próifíl riosca institiúide aonair.
- (9a) San athbhreithniú agus sa mheastóireacht mhaoirseachta, ba cheart go gcuirfí san áireamh méid, struchtúr agus eagrúchán inmheánach na n-institiúidí agus cineál, raon feidhme agus castacht a gcuid gníomhaíochtaí. I gcás próifílí riosca comhchosúla a bheith ag institiúidí éagsúla, mar shampla, toisc go bhfuil samhlacha gnó comhchosúla nó suíomh geografach neamhchosaintí comhchosúil acu nó go bhfuil siad cleamhnaithe leis an scéim cosanta institiúideach céanna, ba cheart do na húdaráis inniúla a bheith in ann modheolaíocht le haghaidh an phróisis athbhreithnithe agus meastóireachta a dhearadh chun tréithe agus rioscaí comhchoiteanna institiúidí a bhfuil an próifíl riosca céanna acu a shainiú. Leis an dearadh sin, áfach, níor cheart go mbeadh cosc ar údaráis inniúla rioscaí sonracha a mbeadh tionchar acu ar gach institiúid a chur san áireamh nó go n-athrófaí cineál institiúidsonrach na mbeart a fhorchuirfear.

- (10) Is ceanglais chomhthreomhara iad an ceanglas cóimheasa gearála agus na ceanglais cistí dílse rioscabhunaithe. Dá bhrí sin, ba cheart aon fhorlíontáin cistí dílse arna bhforchur ag údaráis inniúla chun aghaidh a thabhairt ar riosca na gearála iomarcaí a chur leis an íoscheanglas cóimheasa gearála agus níor cheart é sin a chur leis an gceanglas cistí dílse rioscabhunaithe. Ina theannta sin, aon chaipiteal de Ghnáthchothromas Leibhéal 1 arna úsáid ag institiúidí chun a gceanglais cóimheasa gearála a chomhlíonadh, ba cheart go gceadófaí é a úsáid chun a gceanglais cistí dílse rioscabhunaithe a chomhlíonadh chomh maith, lena n-áirítear na ceanglais maoláin chomhcheangailte.
- (11) Ba cheart go mbeadh cead ag údaráis inniúla aon choigeartú a dhéanfar ar mhéid an chaipitil os cionn na n-íoscheanglas cistí dílse, na gceanglas cistí dílse breise agus na gceanglas maoláin chomhcheangailte a chur in iúl d'institiúid a gceapann siad gur cheart don institiúid sin a choimeád chun déileáil le cásanna réamhbhreathnaitheacha struis. Ós rud é gur sprioc-chaipiteal atá i gceist leis an treoir sin, ba cheart a mheas gur os cionn na gceanglas cistí dílse agus na gceanglas maoláin chomhcheangailte atá sé agus níor cheart, sa chás go mainneofaí an sprioc sin a bhaint amach, go gcuirfí i ngníomh na srianta ar dháileacháin dá bhforáiltear in Airteagal 141 de Threoir 2013/36/AE. Ós rud go léirítear ionchais mhaoirseachta sa treoir maidir le cistí dílse breise, níor cheart oibleagáidí éigeantacha maidir le nochtadh a leagan amach don treoir ná toirmeasc a chur ar údaráis inniúla an treoir a iarraidh faoi Threoir 2013/36/AE agus Rialachán (AE) Uimh 575/2013. I gcás ina mainneoidh institiúid an sprioc-chaipiteal a bhaint amach arís agus arís eile, ba cheart don údarás inniúil bheith i dteideal bearta maoirseachta a chur i bhfeidhm agus, i gcás inarb iomchuí, ceanglais maidir le cistí dílse breise a fhorchur.

- (12) Chuir freagraithe ar Ghlaó an Choimisiúin ar Fhianaise ar chreat rialála sheirbhísí airgeadais an Aontais in iúl go méadaítear an t-ualach tuairiscithe leis an tuairisciú córasach a chuirtear de cheangal ar údarais inniúla de bhreis ar na ceanglais a leagtar amach i Rialachán (AE) Uimh. 575/2013. Ba cheart don Choimisiún tuarascáil a ullmhú ina sainaitheofar na ceanglais bhreise maidir le tuairisciú córasach agus ba cheart dó a mheasúnú an bhfuil siad i gcomhréir leis an leabhar rialacha aonair maidir le tuairisciú maoirseachta nó nach bhfuil.
- (13) Tá forálacha na Treorach 2013/36/AE maidir leis an riosca ráta úis a thagann as gníomhaíochtaí leabhar neamhthrádála nasctha leis na forálacha ábhartha i [Rialachán XX lena leasaítear Rialachán (AE) Uimh. 575/2013] lena gceanglaítear tréimhse cur chun feidhme níos faide d'institiúidí. Chun cur i bhfeidhm na rialacha maidir leis an riosca ráta úis a thagann as gníomhaíochtaí leabhar neamhthrádála a ailíniú, ba cheart feidhm a bheith ag na forálacha is gá chun forálacha ábhartha na Treorach seo a chomhlíonadh ón dáta céanna leis na forálacha ábhartha i Rialachán (AE) Uimh. [XX].
- (13a) Níor cheart, leis an Treoir seo, go gcuirfí cosc ar na Ballstáit bearta a chur chun feidhme sa dlí náisiúnta atá ceaptha chun feabhas a chur ar athléimneacht an chórais airgeadais, amhail, ach gan a bheith teoranta do, na teorainneacha iasachta/luacha, teorainneacha fiachais/ioncaim, teorainneacha fiach-sheirbhíse/ioncaim agus ionstraimí eile lena dtugtar aghaidh ar chaighdeáin iasachtaithe.
- (14) Chun ríomh an riosca ráta úis a bhaineann le gníomhaíochtaí leabhar neamhthrádála a chomhchuibhiú i gcás nach bhfuil córais inmheánacha na n-institiúidí sásúil chun an riosca sin a thomhas, ba cheart a thabhairt de chumhacht don Choimisiún caighdeáin theicniúla rialála a ghlacadh maidir le mionsonraí cur chuige chaighdeánaithe a fhorbairt trí na caighdeáin theicniúla rialála a leagtar amach in Airteagal 84(4) de Threoir 2013/36/AE trí bhíthin gníomhartha tarmligthe de bhun Airteagal 290 den Chonradh ar Fheidhmiú an Aontais Eorpaigh (CFAE) agus i gcomhréir le hAirteagal 10 go hAirteagal 14 de Rialachán (AE) Uimh. 1093/2010.

- (15) Chun feabhas a chur ar an gcumas a bheidh ag na húdaráis inniúla na hinstitiúidí sin a shainaithint a d'fhéadfadh bheith faoi réir caillteanais iomarcacha ina ngníomhaíochtaí leabhar neamhthrádála de thoradh athruithe a d'fhéadfadh teacht ar rátaí úis, ba cheart an chumhacht a thabhairt don Choimisiún caighdeáin theicniúla rialála a ghlacadh maidir leis na sé chás maoirseachta suaite a shonrú a chaithfidh na hinstitiúidí go léir a chur i bhfeidhm chun athruithe ar luach eacnamaíoch gnáthscaireanna a ríomh dá dtagraítear in Airteagal 98(5), na toimhdí coiteanna a chaithfidh institiúidí a chur i bhfeidhm ina gcórais inmheánacha chun críche an ríofa chéanna agus maidir leis an ngá a d'fhéadfadh a bheith le critéir shonracha a chinneadh le hinstitiúidí a shainaithint, institiúidí ina bhféadfadh sé go mbeadh údar maith le bearta maoirseachta i ndiaidh laghdú ar an nglanioncam úis mar gheall ar athruithe ar rátaí úis trí bhíthin gníomhartha tarmligthe de bhun Airteagal 290 de CFAE agus i gcomhréir le hAirteagal 10 go hAirteagal 14 de Rialachán (AE) Uimh. 1093/2010.
- (16) ☐
- (17) ☐
- (18) Sula nglacfar gníomhartha i gcomhréir le hAirteagal 290 den Chonradh ar Fheidhmiú an Aontais Eorpaigh, tá sé ríthábhachtach go ndéanfaidh an Coimisiún comhairliúcháin iomchuí le linn a chuid oibre ullmhúcháin, lena n-áirítear comhairliúcháin ar leibhéal saineolaithe, agus go ndéanfar na comhairliúcháin i gcomhréir leis na prionsabail a leagtar síos i gComhaontú Idirinstitiúideach an 13 Aibreán 2016 maidir le Reachtóireacht Níos Fearr. Go sonrach, chun rannpháirtíocht chomhionann in ullmhú na ngníomhartha tarmligthe a áirithiú, gheobhaidh Parlaimint na hEorpa agus an Chomhairle na doiciméid uile ag an am céanna leis na saineolaithe sna Ballstáit, agus beidh rochtain chórasach ag a gcuid saineolaithe ar chruinnithe ghrúpaí saineolaithe an Choimisiúin a bheidh ag déileáil le hullmhú na ngníomhartha tarmligthe.

- (19) Ós rud é nach féidir leis na Ballstáit cuspóirí na Treorach seo, mar atá reachtaíocht de chuid an Aontais atá ann cheana a dhaingniú agus a athscagadh lena n-áirítear ceanglais stuamachta atá i bhfeidhm maidir le hinstiúidí creidmheasa agus gnólachtaí infheistíochta ar fud an Aontais, a bhaint amach go leordhóthanach ach gur féidir, ar bhonn a bhfairsinge agus ar n-éifeachtaí, na cuspóirí sin a bhaint amach níos fearr ar leibhéal an Aontais, féadfaidh an tAontas bearta a ghlacadh i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Treoir seo thar a bhfuil riachtanach chun na cuspóirí sin a ghnóthú.
- (20) I gcomhréir le Dearbhú Comhpháirteach Polaitiúil an 28 Meán Fómhair 2011 ó na Ballstáit agus ón gCoimisiún maidir le doiciméid mhíniúcháin, ghlac na Ballstáit mar chúram orthu féin, i gcásanna a bhfuil údar cuí leo, doiciméad amháin nó níos mó a chur leis an bhfógra maidir lena mbearta trasuite, ar doiciméid iad lena mínítear an gaol idir codanna de threoir agus páirteanna comhfhreagracha na n-ionstraimí náisiúnta trasuite. I ndáil leis an Treoir seo, measann an reachtóir go bhfuil údar cuí le doiciméid den sórt sin a tharchur.
- (21) D'fhonn a áirithiú go léiríonn caipiteal maolánach fritimthriallach mar is ceart an riosca d'earnáil na baincéireachta mar gheall ar fhás iomarcach creidmheasa, ba cheart d'institiúidí creidmheasa agus do ghnólachtaí infheistíochta a gcuid maoláin institiúidsonracha a ríomh mar mheán ualaithe na rátaí maolánacha fritimthriallacha a bhfuil feidhm acu sna tíortha ina a bhfuil a gcuid neamhchosaintí creidmheasa lonnaithe. Dá bhrí sin, ba cheart do gach Ballstát údarás a ainmniú a bheidh freagrach as an ráta maolánach fritimthriallach a leagan síos maidir le neamhchosaintí atá lonnaithe sa Bhallstát sin. Ba cheart go gcuirfí san áireamh sa ráta maolánach sin fás na leibhéal creidmheasa agus na hathruithe ar an gcóimheas idir creidmheas agus OTI sa Bhallstát sin, agus aon athróg ábhartha eile maidir leis na rioscaí do chobhsaíocht an chórais airgeadais.

- (22) Ba cheart go mbeadh na Ballstáit in ann ceangal a chur ar institiúidí áirithe, sa bhreis ar chaipiteal maolánach caomhantais agus ar chaipiteal maolánach fritimthriallach, maolán maidir le riosca sistéamach d'fhonn rioscaí sistéamacha nó macrastuamachta nach gcumhdaítear faoi Rialachán (AE) Uimh. 575/2013 agus Airteagal 131 de [...] Threoir 2013/36/AE a thoirmeasc i gcás ina bhfuil riosca saofa sa chóras airgeadais a bhféadfadh éifeacht dhíobhálacha a bheith aige ar an gcóras airgeadais agus ar an bhfiorghuilleagar i mBallstát ar leith. Ba cheart feidhm a bheith ag ráta an mhaoláin maidir le riosca sistéamach i gcás gach neamhchosaint nó gach fothacar neamhchosaintí agus na n-institiúidí go léir, nó i gcás ceann amháin nó níos mó d'fhothacair na n-institiúidí sin, i gcásanna ina léiríonn na h-institiúidí próifílí riosca comhchosúla ina ngníomhaíochtaí gnó.
- (23) Táthar ag súil go mbeidh ról lárnach ag BERS i gcomhordú na mbeart macrastuamachta, chomh maith le tarchur faisnéise maidir le bearta macrastuamachta atá beartaithe sna Ballstáit, go háirithe trí bhearta macrastuamachta arna nglacadh a fhoilsiú ar a láithreán gréasáin agus trí fhaisnéis a roinnt le húdaráis tar éis na bhfógraí maidir le bearta macrastuamachta atá beartaithe. D'fhonn freagairtí iomchuí beartais i measc na mBallstát a áirithiú, táthar ag súil go ndéanfaidh BERS faireachán ar leordhóthanacht agus ar chomhsheasmhacht bheartais macrastuamachta na mBallstát, lena n-áirítear trí fhaireachán a dhéanamh ar cibé an úsáidtear na huirlisí a úsáidtear ar bhealach comhsheasmhach, neamhfhorluiteach.
- (23a) Ba cheart go mbeadh sé d'aidhm ag na húdaráis inniúla nó na húdaráis ainmnithe ábhartha aon úsáid dhúbáilteach nó neamh-chomhsheasmhach na mbeart macrastuamachta a leagtar síos i dTreoir 2013/36/AE agus Rialachán (AE) Uimh. 575/2013, a sheachaint. Go háirithe, ba cheart do na húdaráis inniúla nó ainmnithe ábhartha breithniú cuí a dhéanamh cibé an bhfuil bearta a rinneadh faoi Airteagal 133 de Threoir 2013/36/AE dúbáilteach nó neamh-chomhsheasmhach i dtaca le bearta eile atá ann faoi láthair nó a bheidh ann amach anseo faoi Airteagal 124, Airteagal 164 nó Airteagal 458 de Rialachán (AE) Uimh. 575/2013.

- (23b) Ba cheart do na húdaráis inniúla nó na húdaráis ainmnithe a bheith in ann leibhéal nó leibhéil chur i bhfeidhm an mhaoláin O-SII a chinneadh, ar bhonn chineál agus dáileadh na rioscaí atá leabaithe i struchtúr an ghrúpa.. In imthosca áirithe, d'fhéadfadh sé gurb iomchuí don údarás inniúil nó ainmnithe gan maolán O-SII a fhorchur ach amháin ar leibhéal níos ísle ná an leibhéal comhdhlúthaithe is airde.
- (23c) De réir na modheolaíochta measúnaithe do G-SIIanna a d'fhoilsigh Coiste Basel, is táscairí iad éilimh agus dliteanais thrasdlínseacha na hinstitiúide a léiríonn tábhacht shistéamach fhoriomlán na hinstitiúide agus an tionchar a d'fhéadfaí a imirt ar an gcóras domhanda airgeadais dá dteipfeadh uirthi. Léiríonn na táscairí sin na hábhair shonracha imní, i ndáil mar shampla, leis an deacracht bhreise a bhainfeadh le comhordú réiteach na n-institiúidí a bhfuil gníomhaíochtaí suntasacha trasteorann acu. Leis an dul chun cinn a rinneadh maidir leis an gcur chuige coiteann don réiteach de bharr athneartú an leabhair rialacha aonair agus maidir le bunú an tsásra réitigh aonair, cuireadh go mór leis an gcumas grúpaí trasteorann a réiteach ar bhealach ordúil laistigh den aontas baincéireachta. Dá bhrí sin, agus gan dochar d'inniúlacht na n-údarás inniúil nó ainmnithe a mbreithiúnas maoirseachta a fheidhmiú, ba cheart scór malartach a ríomh a léireodh an dul chun cinn sin agus ba cheart do na húdaráis inniúla nó ainmnithe é sin a chur san áireamh agus measúnú á dhéanamh acu ar thábhacht shistéamach institiúidí creidmheasa, gan difear a dhéanamh do na sonraí arna soláthar chuig Coiste Basel chun ainmneoirí idirnáisiúnta a chinneadh. Ba cheart do ÚBE dréachtchaighdeán theicniúla rialála cothrom le dáta a ullmhú chun an mhodheolaíocht bhreise sainaitheantais do G-SIIanna a shonrú le go bhféadfaí sainiúlachtaí an chreata réitigh Eorpaigh chomhtháite a aithint i gcomhthéacs SRA. Ní úsáidfear an mhodheolaíocht nuashonraithe sin ach amháin chun críocha an maolán G-SII a chalabhrú.
- (24) Ba cheart, dá bhrí sin, Treoir 2013/36/CE a leasú dá réir.

TAR ÉIS AN TREOIR SEO A GHLACADH:

Airteagal 1

Leasuithe ar Threoir 2013/36/AE

Leasaítear Treoir 2013/36/AE mar a leanas:

(1) Leasaítear Airteagal 2 mar a leanas:

(a) leasaítear mír 5 mar seo a leanas:

(1) scriostar pointe (4)

(1a) cuirtear an méid seo a leanas in ionad phointe (6):

"6 Sa Ghearmáin, 'Kreditanstalt für Wiederaufbau', 'Landwirtschaftliche Rentenbank', 'Bremer Aufbau-Bank GmbH', 'Hamburgische Investitions- und Förderbank', 'Investitionsbank Berlin', 'Investitionsbank des Landes Brandenburg', 'Investitionsbank Schleswig-Holstein', 'Investitions- und Förderbank Niedersachsen – NBank', 'Investitions- und Strukturbank Rheinland-Pfalz', 'L-Bank, Staatsbank für Baden-Württemberg', 'LfA Förderbank Bayern', 'NRW.BANK', 'Saarländische Investitionskreditbank AG', 'Sächsische Aufbaubank – Förderbank', 'Thüringer Aufbaubank', gnóthais a aithnítear faoin 'Wohnungsgemeinnützigkeitsgesetz' mar chomhlachtaí beartais tithíochta Stáit agus nach idirbhearta baincéireachta atá mar phríomhghníomhaíocht acu, agus gnóthais a aithnítear faoin dlí sin mar ghnóthais tithíochta neamhbhrabúis;"

(1b) cuirtear an méid seo a leanas in ionad phointe (14):

"(14) sa Liotuáin, an 'kredito unijos' seachas 'centrinės kredito unijos';"

(1c) cuirtear an méid seo a leanas in ionad phointe 16:

"(16) san Ísiltír, an 'Nederlandse Investeringsbank voor Ontwikkelingslanden NV', an 'NV Noordelijke Ontwikkelingsmaatschappij', an 'NV Industriebank Limburgs Instituut voor Ontwikkeling en Financiering', an 'Overijsselse Ontwikkelingsmaatschappij NV' agus kredietunies;"

(2) cuirtear an pointe (24) seo a leanas leis:

"(24) sa Chróit, an "kreditne unije" agus an "Hrvatska banka za obnovu i razvitak";"

(3) cuirtear an pointe (25) seo a leanas leis:

"(25) i Málta, "The Malta Development Bank";

(4) cuirtear an pointe (26) seo a leanas leis:

"(26) in Éirinn, "Corparáid Baincéireachta Straitéiseach na hÉireann";"

(b) ☐

(c) cuirtear an méid seo a leanas in ionad mhír 6:

"6. Déileálfar leis na heintitis dá dtagraítear i bpointe (1) agus i bpointí (3) go (24) de mhír 5 den Airteagal seo mar institiúidí airgeadais chun críoch Airteagal 34 agus Theideal VII, Caibidil 3."

(2) Leasaítear Airteagal 3 mar a leanas:

(a) i mír 1, cuirtear isteach na pointí seo a leanas:

"(60) ciallaíonn 'údarás réitithe' údarás réitithe mar a shainmhínítear é i bpointe (18) d'Airteagal 2(1) de Threoir 2014/59/AE;

(61) ciallaíonn "institiúid a bhfuil tábhacht shistéamach dhomhanda léi" (G-SII) G-SII mar a shainmhínítear í i bpointe (132) d'Airteagal 4(1) de Rialachán (CE) Uimh. 575/2013;

(62) ciallaíonn "institiúid a bhfuil tábhacht shistéamach dhomhanda léi agus nach institiúid de chuid an Aontais Eorpaigh í" (G-SII neamh-Eorpach) G-SII neamh-Eorpach mar a shainmhínítear i bpointe (133) d'Airteagal 4(1) de Rialachán (AE) Uimh. 575/2013

(63) ciallaíonn "grúpa" grúpa mar a shainmhínítear é i bpointe (137) d'Airteagal 4(1) de Rialachán (AE) Uimh. 575/2013.

(64) ciallaíonn "grúpa tríú tír" grúpa tríú tír a mbunaítear an máthairghnóthas i dtríú tír.

(b) cuirtear isteach an mhír 3 seo a leanas:

"3. I gcás ina bhfuil ceanglas nó cumhacht mhaoirseachta sa Treoir seo nó i Rialachán (AE) Uimh. 575/2013 i bhfeidhm ar an leibhéal comhdhlúite nó fo-chomhdhlúite, áireofar ar na téarmaí "institiúid", "máthairinstitiúid i mBallstát", "máthairinstitiúid AE" agus "máthairghnóthas" an méid a leanas freisin:

(a) cuideachtaí sealbhaíochta airgeadais agus cuideachtaí sealbhaíochta airgeadais measctha ar formheasadh iad i gcomhréir le hAirteagal 21a; agus

(b) institiúidí ainmnithe arna rialú ag máthairchuideachta sealbhaíochta airgeadais AE nó máthairchuideachta sealbhaíochta airgeadais mheasctha AE, máthairchuideachta sealbhaíochta airgeadais i mBallstát nó máthairchuideachta sealbhaíochta airgeadais mheasctha i mBallstát i gcás nach bhfuil an mháthairchuideachta ábhartha faoi réir a formheasa i gcomhréir le mír 3a d'Airteagal 21a;

(c) cuideachtaí sealbhaíochta airgeadais, cuideachtaí sealbhaíochta airgeadais measctha nó institiúidí ainmnithe de bhonn phointe (d) d'Airteagal 21a(5),

chun a áirithiú go bhfuil na ceanglais sin á gcur i bhfeidhm agus cumhachtaí maoirseachta á bhfeidhmiú ar an leibhéal fo-chomhdhlúite nó ar an leibhéal comhdhlúite i gcomhréir leis an Treoir seo agus le Rialachán (AE) Uimh. 575/2013."

(3) In Airteagal 4, cuirtear an méid seo a leanas in ionad mhír 8:

"8. Áiritheoidh na Ballstáit go mbeidh na húdaráis sin, i gcás ina bhfuil cumhacht an réitigh ag údaráis seachas na húdaráis inniúla, ag obair i ndlúthchomhar leis na húdaráis inniúla agus go mbeidh siad ag dul i gcomhairle leo maidir le pleananna réitigh a ullmhú agus i ngach cás eile nuair is gá sin sa Treoir seo, i dTreoir 2014/59/AE ó Pharlaimint na hEorpa agus ón gComhairle⁶ nó i Rialachán (AE) Uimh. 575/2013."

(4) In Airteagal 8(2), cuirtear an méid seo a leanas in ionad phointe (b):

"(b) na ceanglais a bhfuil feidhm acu maidir le scairshealbhóirí agus comhaltaí a bhfuil sealúchais cháilitheacha acu, nó, i gcás nach bhfuil aon sealúchais cháilitheacha ann, maidir leis an 20 scairshealbhóir nó comhalta is mó, de bhun Airteagal 14; agus".

(5) In Airteagal 9, cuirtear na míreanna nua seo a leanas leis:

"3. Tabharfaidh na Ballstáit fógra don Choimisiún agus do ÚBE faoi na dlíthe náisiúnta lena gceadaítear go sainráite do ghnóthais seachas institiúidí creidmheasa dul i mbun gnó taiscí agus cistí inaisíoctha eile a ghlacadh ón bpobal.

4. De bhun an Airteagail seo, ní fhéadfaidh na Ballstáit institiúidí creidmheasa a dhíolmhú ón Treoir seo ná ó Rialachán (AE) Uimh. 575/2013."

⁶ Treoir 2014/59/AE ó Pharlaimint na hEorpa agus ón gComhairle an 15 Bealtaine 2014 lena mbunaítear creat do théarnamh agus do réiteach institiúidí creidmheasa agus gnólachtaí infheistíochta agus lena leasaítear Treoir 82/891/CEE ón gComhairle agus Treoracha 2001/24/CE, 2002/47/CE, 2004/25/CE, 2005/56/CE, 2007/36/CE, 2011/35/AE, 2012/30/AE agus 2013/36/AE, agus Rialachán (AE) Uimh. 1093/2010 agus Rialachán (AE) Uimh. 648/2012 ó Pharlaimint na hEorpa agus ón gComhairle (IO L 173, 12.6.2014, lch. 190).

- (6) Cuirtear an méid seo a leanas in ionad Airteagal 10:

"Airteagal 10

Clár na n-oibríochtaí agus an struchtúr eagraíochtúil

Éileoidh na Ballstáit go ngabhfaidh clár oibríochtaí le hiarratais ar údarú ar clár oibríochtaí é lena leagtar amach na cineálacha gnó atáthar ag brath a dhéanamh agus struchtúr eagraíochtúil na hinstitiúide creidmheasa, lena n-áirítear na máthairghnóthais, cuideachta sealbhaíochta airgeadais agus cuideachta sealbhaíochta airgeadais mheasctha laistigh den ghrúpa a shonrú."

- (7) In Airteagal 14, cuirtear an méid seo a leanas in ionad mhír 2:

"2. Diúltóidh na húdaráis inniúla don údarú gníomhaíocht institiúide creidmheasa a thosú más rud é, i ndiaidh an gá atá le bainistíocht fhóna agus stuama institiúide creidmheasa a chur san áireamh, nach bhfuil siad sásta faoi oiriúnacht na scairshealbhóirí nó na gcomhaltaí i gcomhréir leis na critéir a leagtar amach in Airteagal 23(1). Beidh feidhm ag Airteagal 23(2) agus ag Airteagal 23(3) agus ag Airteagal 24."

- (8) in Airteagal 18, cuirtear an méid seo a leanas in ionad phointe (d):

"(d) ní chomhlíonann an institiúid na ceanglais stuamachta a leagtar amach i gCuid a Trí, i gCuid a Ceathair agus i gCuid a Sé a thuilleadh, cé is moite de na ceanglais a leagtar síos in Airteagal 92a agus in Airteagal 92b, de Rialachán (AE) Uimh. 575/2013 nó arna bhforchur faoi Airteagal 104(1)(a) nó Airteagal 105 den Treoir seo nó ní féidir bheith ag brath ar an institiúid a thuilleadh chun a hoibleagáidí a chomhlíonadh i leith a cuid creidiúnaithe, agus, go háirithe, ní thugann sí urrús a thuilleadh le haghaidh na sócmhainní a chuir a taisceoirí faoina cúram."

- (9) Cuirtear isteach Airteagal 21a agus Airteagal 21b mar a leanas:

"Airteagal 21a

*Cuideachtaí sealbhaíochta airgeadais agus cuideachtaí sealbhaíochta airgeadais
measctha a fhormheas*

1. Féachfaidh máthairchuideachtaí sealbhaíochta airgeadais i mBallstát, máthairchuideachtaí sealbhaíochta airgeadais mheasctha i mBallstát, máthairchuideachtaí sealbhaíochta airgeadais AE, máthairchuideachtaí sealbhaíochta airgeadais measctha AE le formheas a fháil i gcomhréir leis an Airteagal seo. Féachfaidh cuideachtaí sealbhaíochta airgeadais eile nó cuideachtaí sealbhaíochta airgeadais measctha eile le formheas a fháil i gcomhréir leis an Airteagal seo i gcás inar gá dóibh an Treoir seo nó Rialachán (AE) Uimh. 575/2013 a chomhlíonadh ar bhonn fo-chomhdhlúite.
2. Chun críche mhír 1, cuirfidh cuideachtaí sealbhaíochta airgeadais agus cuideachtaí sealbhaíochta airgeadais measctha dá dtagraítear sa mhír sin an fhaisnéis a leanas ar fáil don mhaoirseoir comhdhlúthaithe agus, i gcás nach ionann iad, don údarás inniúil sa Bhallstát ina bhfuil siad lonnaithe:
 - (a) struchtúr eagraíochtúil an ghrúpa a bhfuil an chuideachta sealbhaíochta airgeadais agus an chuideachta sealbhaíochta airgeadais mheasctha mar chuid de, ina sonraítear go soiléir na fochuideachtaí agus, i gcás inarb infheidhme, na máthairghnóthais, agus suíomh agus cineál na gníomhaíochta a dhéanann gach ceann de na heintitis laistigh den ghrúpa;
 - (b) faisnéis maidir le hainmniúchán beirte, ar a laghad, arb iad a dhéanann an chuideachta sealbhaíochta airgeadais nó an chuideachta sealbhaíochta airgeadais mheasctha a stiúradh agus maidir le comhlíonadh na gceanglas a leagtar amach in Airteagal 121 maidir le cáilíocht stiúrtóirí;
 - (c) faisnéis maidir le comhlíonadh na gcritéir a leagtar amach in Airteagal 14 i ndáil le scairshealbhóirí agus comhaltaí, i gcás ina bhfuil institiúid creidmheasa ag an gcuideachta sealbhaíochta airgeadais nó ag an gcuideachta sealbhaíochta airgeadais mheasctha mar fhochuideachta;

(d) eagrúchán inmheánach agus dáileadh na gcúraimí laistigh den ghrúpa;

(e) aon fhaisnéis eile a d'fhéadfadh a bheith riachtanach chun an measúnú dá dtagraítear i mír 3 agus i mír 3a a dhéanamh.

I gcás ina dtarlaíonn formheas na cuideachta sealbhaíochta airgeadais nó cuideachta sealbhaíochta airgeadais mheasctha i gcomhthráth leis an measúnú dá dtagraítear in Airteagal 22, déanfaidh an t-údarás inniúil, chun críche an Airteagail sin, de réir mar is iomchuí, comhordú leis an maoirseoir comhdhlúthaithe arna chinneadh i gcomhréir le Airteagal 111 agus, más éagsúil, leis an údarás inniúil sa Bhallstát ina bhfuil an chuideachta sealbhaíochta airgeadais nó an chuideachta sealbhaíochta airgeadais mheasctha bunaithe. Sa chás sin, déanfar an tréimhse mheasúnaithe dá dtagraítear sa dara fomhír d'Airteagal 22(3) a chur ar fionraí ar feadh tréimhse níos faide ná 20 lá oibre go dtí go mbeidh an nós imeachta a leagtar amach in Airteagal 21a curtha i gcrích.

3. Ní fhéadfar cuideachta sealbhaíochta airgeadais nó cuideachta sealbhaíochta airgeadais mheasctha a fhorghnó de bhun an Airteagail seo ach amháin i gcás ina bhfuil gach ceann de na coinníollacha seo a leanas comhlíonta:

- (a) tá socruithe agus dáileadh inmheánach na gcúraimí laistigh den ghrúpa leordhóthanach chun críche na ceanglais a fhorchuirtear faoin Treoir seo agus faoi Rialachán (AE) Uimh. 575/2013 a chomhlíonadh ar bhonn comhdhlúite nó ar bhonn fo-chomhdhlúite agus, go háirithe, tá éifeacht acu maidir leis an méid a leanas:
 - (i) gach fochuideachta de chuid na cuideachta sealbhaíochta airgeadais nó na cuideachta sealbhaíochta airgeadais mheasctha a chomhordú, lena n-áirítear, i gcás inar gá, trí dháileadh leordhóthanach na gcúraimí i measc fo-institiúidí;
 - (ii) coinbhleachtaí idirghrúpa a chosc nó a bhainistiú; agus
 - (iii) na beartais uile-ghrúpa arna leagan síos ag an máthairchuideachta sealbhaíochta airgeadais nó ag an máthairchuideachta sealbhaíochta airgeadais mheasctha a fhorfheidhmiú ar fud an ghrúpa.

- (b) ní chuireann struchtúr eagraíochtúil an ghrúpa a bhfuil an chuideachta sealbhaíochta airgeadais nó an chuideachta sealbhaíochta airgeadais mheasctha mar chuid de, bac ar stiúradh éifeachtach na bhfo-institiúidí nó na máthairghnóthas i dtaca leis na hoibleagáidí aonair, comhdhlúite agus, i gcás inarb iomchuí, fo-chomhdhlúite a bhfuil siad faoina réir, ná ní dhéanann sé an méid sin a chosc ar bhealach eile. Cuirfear san áireamh sa mheasúnú ar an gcritéar sin, go háirithe, suíomh na cuideachta sealbhaíochta airgeadais nó cuideachta sealbhaíochta airgeadais mheasctha i ngrúpa ilsrathach, struchtúr na scairsealbhóireachta agus ról na cuideachta sealbhaíochta airgeadais nó na cuideachta sealbhaíochta airgeadais mheasctha laistigh den ghrúpa;
- (c) comhlíontar na critéir a leagtar amach in Airteagal 14 agus na ceanglais atá in Airteagal 121.

3a. Ní gá an chuideachta sealbhaíochta airgeadais nó an chuideachta sealbhaíochta airgeadais mheasctha a fhormheas faoin Airteagal seo i gcás ina gcomhlíonfar na coinníollacha uile seo a leanas:

- (a) is é príomhghníomhaíocht na cuideachta sealbhaíochta airgeadais sealúchais a fháil i bhfochuideachtaí nó, i gcás cuideachta sealbhaíochta airgeadais mheasctha, is é an phríomhghníomhaíocht atá aici i dtaca le hinstiúidí nó institiúidí airgeadais sealúchais i bhfochuideachtaí a fháil;
- (b) níor ainmníodh an chuideachta sealbhaíochta airgeadais nó an chuideachta sealbhaíochta airgeadais mheasctha mar eintitis réitigh in aon cheann de ghrúpaí réitigh an ghrúpa i gcomhréir leis an straitéis réitigh arna chinneadh ag an údarás réitigh ábhartha de bhun Threoir 2014/59/AE;
- (c) tá fo-institiúid chreidmheasa ainmnithe le bheith freagrach as comhlíonadh na gceanglas stuamachta ag an ngrúpa ar bhonn comhdhlúite agus tugtar di na hacmhainní riachtanacha uile agus an t-údarás dlíthiúil chun na hoibleagáidí sin a chomhlíonadh ar bhealach éifeachtach;

- (d) níl an chuideachta sealbhaíochta airgeadais nó an chuideachta sealbhaíochta airgeadais mheasctha rannpháirteach i gcinntí bainistithe, oibríochtúla nó airgeadais a bhfuil tionchar acu ar an ngrúpa a dhéanamh nó a bhfuil tionchar acu ar a fhochuideachtaí atá ina n-institiúidí nó ina n-institiúidí airgeadais;
- (e) níl aon bhac ar mhaoirseacht éifeachtach a dhéanamh ar an ngrúpa ar bhonn comhdhlúite.

Cuideachtaí sealbhaíochta airgeadais nó cuideachtaí sealbhaíochta airgeadais measctha arna ndíolmhú óna bhformheas i gcomhréir leis an mír seo, ní dhéanfar iad a eisiamh ón imlíne chomhdhlúthaithe mar a leagtar síos í sa Treoir seo agus i Rialachán (AE) Uimh. 575/2013.

4. Déanfaidh an maoirseoir comhdhlúthaithe arna chinneadh i gcomhréir le Airteagal 111 faireachán ar chomhlíonadh na gcoinníollacha dá dtagraítear i mír 3 nó, i gcás inarb infheidhme, i mír 3a ar bhonn leanúnach. Cuirfidh cuideachtaí sealbhaíochta airgeadais nó cuideachtaí sealbhaíochta airgeadais measctha an fhaisnéis atá riachtanach ar fáil don mhaoirseoir comhdhlúthaithe arna chinneadh i gcomhréir le hAirteagal 111 chun faireachán a dhéanamh ar bhonn leanúnach ar eagrúchán struchtúrach an ghrúpa agus comhlíonadh na gcoinníollacha dá dtagraítear i mír 3 nó, i gcás inarb infheidhme, mír 3a. Déanfaidh an maoirseoir comhdhlúthaithe an fhaisnéis seo a chomhroinnt leis an údarás inniúil sa Bhallstát ina bhfuil an chuideachta sealbhaíochta airgeadais nó an chuideachta sealbhaíochta airgeadais mheasctha bunaithe.
5. I gcás inar chinn an maoirseoir comhdhlúthaithe nach bhfuil na coinníollacha a leagtar síos i mír 3 á gcomhlíonadh nó nach bhfuil siad á gcomhlíonadh a thuilleadh, beidh an chuideachta sealbhaíochta airgeadais nó an chuideachta sealbhaíochta airgeadais mheasctha faoi réir bearta maoirseachta iomchuí chun leanúnachas agus sláine na maoirseachta comhdhlúite agus comhlíonadh cheanglais na Treorach seo agus Rialachán (AE) Uimh. 575/2013 a áirithiú nó a thabhairt ar ais, de réir mar a bheidh, ar bhonn comhdhlúite. I gcás cuideachta sealbhaíochta airgeadais mheasctha, cuirfear san áireamh sna bearta maoirseachta, go háirithe, an tionchar ar an ilchuideachta airgeadais.

Féadfaidh an méid a leanas a bheith i gceist sna bearta maoirseachta:

- (a) feidhmiú na gceart vótála a bhaineann le scaireanna na bhfo-institiúidí atá i seilbh na cuideachta sealbhaíochta airgeadais nó na cuideachta sealbhaíochta airgeadais measctha a chur ar fionraí;
- (b) eisiúint urghairí nó pionós i gcoinne na cuideachta sealbhaíochta airgeadais, na cuideachta sealbhaíochta airgeadais measctha nó bhaill an chomhlachta bainistíochta agus bainisteoirí faoi réir Airteagail 65 go 72;
- (c) treoracha a thabhairt don chuideachta sealbhaíochta airgeadais nó don chuideachta sealbhaíochta airgeadais mheasctha na rannpháirtíochtaí ina cuid fochuideachtaí ar institiúidí iad a aistriú chuig a scairshealbhóirí;
- (d) ar bhonn sealadach, cuideachta sealbhaíochta airgeadais, cuideachta sealbhaíochta airgeadais mheasctha nó institiúid eile laistigh den ghrúpa a ainmniú le bheith freagrach as comhlíonadh cheanglais na Treorach seo agus Rialachán (AE) Uimh. 575/2013 ar bhonn comhdhlúite;
- (e) srian nó toirmeasc a chur ar dháileacháin nó íocaíochtaí úis do scairshealbhóirí;
- (f) a cheangal ar chuideachtaí sealbhaíochta airgeadais nó cuideachtaí sealbhaíochta airgeadais measctha dhífheistiú ó institiúidí nó eintitis in earnáil an airgeadais nó a sealúchas iontu a laghdú;
- (g) a cheangal ar chuideachtaí sealbhaíochta airgeadais nó cuideachtaí sealbhaíochta airgeadais measctha plean a chur i láthair chun filleadh láithreach ar chomhlíonadh.

6. I gcás ina gcinneann an maoirseoir comhdhlúthaithe nach bhfuil na coinníollacha in Airteagal 3a á gcomhlíonadh a thuilleadh, iarrfaidh an chuideachta sealbhaíochta airgeadais nó an chuideachta sealbhaíochta airgeadais mheasctha formheas i gcomhréir leis an Airteagal seo.

7. Chun críche cinntí a dhéanamh maidir le formheas agus díolmhú ó fhormheas dá dtagraítear i mír 3 agus 3a faoi seach, agus na bearta a dhéanamh dá dtagraítear i mír 5 agus mír 6, i gcás ina bhfuil an maoirseoir comhdhlúthaithe éagsúil ón údarás inniúil sa Bhallstát ina bhfuil an chuideachta sealbhaíochta airgeadais nó an chuideachta sealbhaíochta airgeadais mheasctha bunaithe, oibreoidh an dá údarás i gcomhairle iomlán le chéile. Ullmhóidh an maoirseoir comhdhlúthaithe an measúnú maidir leis na hábhair dá dtagraítear i míreanna 3, 3a, 5 agus 6, de réir mar is infheidhme, agus cuirfidh sé an measúnú sin ar aghaidh chuig an údarás inniúil sa Bhallstát ina bhfuil an chuideachta sealbhaíochta airgeadais nó an chuideachta sealbhaíochta airgeadais mheasctha bunaithe. Déanfaidh an dá údarás gach a bhfuil ar a gcumas chun teacht ar chinneadh comhpháirteach laistigh de dhá mhí ón dáta a bhfaightear an measúnú thuasluaite.

Déanfar an cinneadh comhpháirteach a dhoiciméadú go cuí agus déanfar an réasúnaíocht a bhaineann leis a leagan amach ann. Cuirfidh an maoirseoir comhdhlúthaithe an cinneadh comhpháirteach in iúl don chuideachta sealbhaíochta airgeadais nó don chuideachta sealbhaíochta airgeadais mheasctha.

I gcás easaontais, staonfaidh an maoirseoir comhdhlúthaithe nó an t-údarás inniúil sa Bhallstát ina bhfuil an chuideachta sealbhaíochta airgeadais nó an chuideachta sealbhaíochta airgeadais mheasctha bunaithe ó chinneadh a dhéanamh agus cuirfidh sé an t-ábhar faoi bhráid ÚBE i gcomhréir le hAirteagal 19 de Rialachán (AE) Uimh. 1093/2010. Déanfaidh ÚBE a chinneadh laistigh de mhí amháin. Déanfaidh na húdaráis inniúla lena mbaineann cinneadh comhpháirteach a ghlacadh i gcomhréir le cinneadh ÚBE. Ní chuirfear an t-ábhar faoi bhráid ÚBE tar éis dheireadh na tréimhse dhá mhí ná tar éis cinneadh comhpháirteach a bheith déanta

- 7a. I gcás cuideachtaí sealbhaíochta airgeadais measctha, i gcás inar éagsúil an maoirseoir comhdhlúthaithe arna chinneadh i gcomhréir le hAirteagal 111, nó an t-údarás inniúil sa Bhallstát ina bhfuil an chuideachta sealbhaíochta airgeadais mheasctha bunaithe ón gcomhordaitheoir arna chinneadh i gcomhréir le hAirteagal 10 de Threoir 2002/87/CE, beidh comhaontú an chomhordaitheora ag teastáil chun críche cinntí nó cinntí comhpháirteacha dá dtagraítear i míreanna 3, 3a, 5 agus 6 de réir mar is infheidhme. I gcás ina bhfuil comhaontú an chomhordaitheoir ag teastáil, réiteoidh na húdaráis Eorpacha maoirseachta ábhartha na heasaontais, agus déanfaidh siad a gcinneadh laistigh de mhí amháin. Beidh cinneadh, cinneadh comhpháirteach nó socraíocht gan dochar do na hoibleagáidí faoi Threoir 2002/87/CE nó faoi Threoir 009/138/CE.
8. I gcás ina ndiúltaítear cuideachta sealbhaíochta airgeadais nó cuideachta sealbhaíochta airgeadais mheasctha a fhormheas de bhun an Airteagail seo, cuirfidh an maoirseoir comhdhlúthaithe an t-iarratasóir ar an eolas faoin gcinneadh agus na cúiseanna atá leis sin laistigh de cheithre mhí tar éis dó an t-iarratas a fháil, nó i gcás ina bhfuil an t-iarratas neamhiomlán, laistigh de cheithre mhí ón dáta a bhfaighfear an fhaisnéis iomlán is gá chun an cinneadh a dhéanamh.

I ngach cás, déanfar cinneadh maidir le formheas a cheadú nó a dhiúltú laistigh de shé mhí ón iarratas a fháil. Féadfaidh aon cheann de na bearta dá dtagraítear i mír 5 a bheith ag gabháil leis an diúltú, sa chás inar gá.

Airteagal 21b
Máthairghnóthas idirmheánach AE

1. Maidir le dhá institiúid nó níos mó san Aontas atá mar chuid den ghrúpa tríú tír céanna, beidh máthairghnóthas idirmheánach AE amháin acu bunaithe san Aontas.
 - (1a). Féadfaidh údaráis inniúla cead a thabhairt do na hinstitiúidí dá dtagraítear i mír 1 dhá mháthairghnóthas idirmheánacha AE a bheith acu i gcás ina gcinntíonn na húdaráis inniúla go mbeadh máthairghnóthas idirmheánach AE amháin neamhréireach le ceanglas éigeantach i gcomhréir le rialacha na tríú tíre ina bhfuil a cheannoifig ag máthairghnóthas deiridh an ghrúpa tríú tíre.
2. Beidh máthairghnóthas idirmheánach AE ina institiúid creidmheasa arna húdarú i gcomhréir le hAirteagal 8, nó ina chuideachta sealbhaíochta airgeadais nó ina chuideachta sealbhaíochta airgeadais mheasctha arna formheas i gcomhréir le hAirteagal 21a.

De mhaolú ar an gcéad fhomhír, i gcás nach bhfuil aon cheann de na hinstitiúidí dá dtagraítear i mír 1 ina hinstitiúid chreidmheasa nó nach mór an dara máthairchuideachta idirmheánach AE a bhunú i ndáil le gníomhaíochtaí infheistíochta chun ceangal sainordaitheach dá dtagraítear i mír 1a a chomhlíonadh, féadfaidh an mháthairchuideachta idirmheánach AE nó an dara máthairchuideachta idirmheánach AE, faoi seach, a bheith ina gnólacht infheistíochta arna húdarú i gcomhréir le Airteagal 5(1) de Threoir 2014/65/AE.
3. Ní bheidh feidhm ag mír 1, ag mír 1a ná ag mír 2 i gcás ina mbeidh luach iomlán sócmhainní an ghrúpa tríú tír san Aontas níos ísle ná EUR 40 billiún.

4. Chun críocha an Airteagail seo, is é suim na nithe seo a leanas luach iomlán sócmhainní an ghrúpa tríú tír san Aontas:
- (a) méid iomlán na sócmhainní atá ag gach institiúid den ghrúpa tríú tír san Aontas a thiocfaidh as a clár comhardaithe comhdhlúite, nó a thiocfaidh as a clár comhardaithe aonair, i gcás nach gcomhdhlúthaítear clár comhardaithe de chuid institiúide; agus
 - (b) méid iomlán na sócmhainní atá ag gach brainse den ghrúpa tríú tír a údaraítear le bheith ag oibriú san Aontas i gcomhréir le hAirteagal 47.
5. Tabharfaidh na húdaráis inniúla fógra do ÚBE faoin bhfaisnéis seo a leanas i ndáil le gach grúpa tríú tír atá ag oibriú ina ndlínse:
- (a) ainmneacha na n-institiúidí faoi mhaoirseacht ar le grúpa tríú tír iad, mar aon le méid iomlán a sócmhainní;
 - (b) ainmneacha agus méid iomlán na sócmhainní a chomhfhreagraíonn do bhrainsí a údaraítear sa Bhallstát sin de bhun Airteagal 47 agus na cineálacha gníomhaíochtaí a bhfuil údarás ag na brainsí sin a chur i gcrích;
 - (c) ainm agus foirm dhlíthiúil aon mháthairghnóthais idirmheánaigh AE arna bhunú sa Bhallstát sin agus ainm an ghrúpa tríú tír a bhfuil sé ina chuid de.

6. Foilseoidh ÚBE ar a shuíomh gréasáin liosta de na grúpaí tríú tír ar fad atá ag oibriú san Aontas mar aon lena máthairghnóthas idirmheánach AE nó mar aon lena máthairghnóthais idirmheánacha AE , i gcás inarb fheidhme.

Áiritheoidh na húdaráis inniúla go gcomhlíonfaidh gach institiúid atá faoina ndlínse agus ar cuid de ghrúpa tríú tír í, ceann amháin de na coinníollacha seo a leanas:

- (a) beidh máthairghnóthas idirmheánach AE aige;
 - (b) is máthairghnóthas idirmheánach AE é;
 - (c) is í an t-aon institiúid den ghrúpa tríú tír san Aontas; nó
 - (d) is cuid de ghrúpa tríú tír í ar fiú níos lú ná EUR 40 billiún méid iomlán shócmhainní an ghrúpa sin san Aontas.
7. De mhaolú ar mhír 1, beidh, ag grúpaí a oibríonn trí níos mó ná institiúid amháin san Aontas agus ar fiú méid iomlán shócmhainní an ghrúpa sin EUR 40 billiún nó níos mó ar [dháta theacht i bhfeidhm na Treorach seo], máthairghnóthas idirmheánach AE nó, sa chás dá dtagraítear i mír 1a, dhá mháthairghnóthas idirmheánach AE faoi [dháta cur i bhfeidhm na Treorach seo + 4 bliana].
8. Faoi [dháta theacht i bhfeidhm na Treorach seo + sé bliana], déanfaidh an Coimisiún, tar éis dul i gcomhairle le ÚBE, athbhreithniú ar na ceanglais arna bhforchur ar institiúidí leis an Airteagal seo agus cuirfidh sé tuarascáil, mar aon le togra reachtach i gcás inarb infheidhme, faoi bhráid Pharlaimint na hEorpa agus na Comhairle. Sa tuarascáil sin, breathnófar ar an méid a leanas:
- (a) an bhfuil ceanglais an Airteagail seo inoibrithe, riachtanach, agus comhréireach, agus an mbeadh bearta eile níos iomchuí;
 - (b) ar cheart na ceanglais arna bhforchur ar institiúidí leis an Airteagal seo a leasú d'fhonn na cleachtais idirnáisiúnta is fearr a léiriú iontu.

(10) In Airteagal 23(1), cuirtear an méid seo a leanas in ionad phointe (b):

"(b) clú, eolas, scileanna agus taithí, mar a leagtar amach in Airteagal 91(1), aon chomhalta den chomhlacht bainistíochta a stiúrfaidh gnó na hinstitiúide creidmheasa mar thoradh ar an éadáil bheartaithe;"

(11) Leasaítear Airteagal 47 mar a leanas:

(a) cuirtear an mhír nua 1a isteach i ndiaidh mhír 1:

"1a. Cuirfidh na Ballstáit de cheangal ar bhreinsí institiúidí creidmheasa a bhfuil a gceannoifig i dtríú tír a thuairisciú chuig údaráis inniúla, ar bhonn bliantúil ar a laghad, an fhaisnéis seo a leanas:

- (a) iomlán na sócmhainní a chomhfhreagraíonn do na gníomhaíochtaí den bhrainse a údaraítear sa Bhallstát sin;
- (b) faisnéis maidir leis na sócmhainní leachtacha atá ar fáil don bhrainse, go háirithe maidir le hinfhaighteacht na sócmhainní leachtacha seo in airgeadraí an Aontais;
- (c) na cistí dílse atá ar a chúl ag an mbrainse;
- (d) na socruithe cosanta taiscí atá ar fáil do thaisceoirí sa bhrainse;
- (e) a socruithe bainistíochta riosca;

- (f) na socruithe rialachais, lena n-áirítear na príomhfheidhmeannaigh maidir le gníomhaíochtaí an bhrainse;
 - (g) na pleananna téarnaimh lena gcumhdaítear an brainse; agus
 - (e) aon fhaisnéis eile a measann an t-údarás inniúil gur gá í chun gur féidir faireachán cuimsitheach a dhéanamh ar ghníomhaíochtaí an bhrainse.
- (b) cuirtear an méid seo a leanas in ionad mhír 2:

"2. Tabharfaidh na húdaráis inniúla fógra d'ÚBE faoin méid seo a leanas:

- (a) gach údarú maidir le brainsí a deonaíodh d'institiúidí creidmheasa a bhfuil a gceannoifig i dtríú tír agus aon athruithe ina dhiaidh sin ar na húdaruithe sin;
- (b) iomlán na sócmhainní inchurtha agus iomlán na ndliteanas a chomhfhreagraíonn do bhrainsí údaráithe institiúidí creidmheasa a bhfuil a gceannoifig i dtríú tír, mar a thuairiscítear go tréimhsiúil; agus
- (c) ainm an ghrúpa tríú tír a mbaineann brainse údaráithe leis.

Foilseoidh ÚBE ar a shuíomh gréasáin an liosta de na brainsí tríú tír a údaraíodh chun oibriú sna Ballstáit, lena sonraítear an Ballstát."

- (c) cuirtear an mhír nua seo a leanas isteach i ndiaidh mhír 2:

"2a. Na húdaráis inniúla a dhéanann maoirseacht ar bhraintí institiúidí creidmheasa a bhfuil a gceannoifig i dtríú tír agus na húdaráis inniúla de chuid institiúidí ar cuid den ghrúpa tríú tír céanna iad, comhoibreoidh siad go dlúth chun a áirithiú go ndéanfar gníomhaíochtaí uile an ghrúpa tríú tír san Aontas faoi réir maoirseacht chuimsitheach, nach mbeifear in ann teacht timpeall ar na ceanglais is infheidhme maidir le grúpaí tríú tír de bhun na Treorach seo agus Rialachán (AE) Uimh. 575/2013 agus nach mbeidh aon tionchar díobhálach ar chobhsaíocht airgeadais an Aontais.

Éascóidh ÚBE an comhar idir údaráis inniúla chun críocha fhomhír 1, lena n-áirítear nuair a bheidh comhlíonadh na tairsí dá dtagraítear in Airteagal 21b(3) á fhíorú".

(11a) Cuirtear an tAirteagal 58a nua seo a leanas isteach:

"Airteagal 58a

Faisnéis a tharchur chuig comhlachtaí idirnáisiúnta agus Eorpacha

1. In ainneoin Airteagal 53(1) agus Airteagal 54, féadfaidh na húdaráis inniúla, faoi réir na gcoinníollacha a leagtar amach i mír dó go mír cúig, faisnéis áirithe a tharchur chucu seo a leanas nó í a roinnt leo, freisin:
 - (a) an Ciste Airgeadaíochta Idirnáisiúnta agus an Banc Domhanda chun críocha measúnuithe le haghaidh clár measúnaithe na hearnála airgeadais;
 - (b) an Banc um Shocraíochtaí Idirnáisiúnta chun críocha staidéir tionchair cainníochtúil;
 - (c) an Bord um Chobhsaíocht Airgeadais chun críocha a fheidhme faireachais;
 - (d) an Coimisiún Eorpach;
 - (e) an Sásra Cobhsaíochta Eorpach agus an tSaoráid Eorpach um Chobhsaíocht Airgeadais; agus

- (f) na húdaráis réitigh agus an Bord Réitigh Aonair.
2. Ní fhéadfaidh na húdaráis inniúla faisnéis rúnda a roinnt ach amháin tar éis iarraidh shainráite a fháil ón gcomhlacht iomchuí, ar iarraidh í ina gcomhlíonfar na coinníollacha seo a leanas ar a laghad:
- (a) beidh údar maith leis an iarraidh sin i bhfianaise na gcúraimí sonracha a dhéanann an comhlacht iarrthach i gcomhréir lena shainordú reachtúil;
 - (b) beidh an iarraidh cruinn go leor maidir le cineál, raon feidhme, agus formáid na faisnéise a éilítear, agus maidir le modh a nochta nó a tarchurtha;
 - (c) beidh fíorghá leis an bhfaisnéis a iarradh chun cúraimí sonracha an chomhlachta iarrthaigh a dhéanamh agus ní rachaidh sé thar na cúraimí reachtúla a tugadh don chomhlacht iarrthach;
 - (d) ní chuirfear an fhaisnéis ach chucu siúd amháin a bhfuil baint dhíreach acu le feidhmíocht an taise shonraigh, ná ní nochtfar ach dóibh siúd amháin í;
 - (e) iad siúd a bhfuil rochtain acu ar an bhfaisnéis, beidh siad faoi réir ceanglais maidir le rúndacht ghairmiúil atá chomh dian céanna, ar a laghad, agus atá na ceanglais dá dtagraítear in Airteagal 53(1).
3. I gcás ina ndéanann ceann de na heintitis dá dtagraítear i bpointí (a) go (e) de mhír 1 an iarraidh, ní fhéadfaidh na húdaráis inniúla ach faisnéis chomhiomlán nó faisnéis anaithnid a tharchur agus is in áitreabh an údaráis inniúil amháin a fhéadfaidh siad faisnéis eile a roinnt.
4. I gcás ina ndéanann ceann de na húdaráis dá dtagraítear i bpointe (f) de mhír 1 an iarraidh, déanfar aon tarchur faisnéise ón údarás inniúil chuig an údarás iarrthach trí bhíthin bealaí slána cumarsáide.

5. A mhéid a bheidh próiseáil sonraí pearsanta i gceist leis an nochtadh faisnéise, comhlíonfaidh aon phróiseáil a dhéanann an comhlacht iarrthach na ceanglais is infheidhme i Rialachán 2016/679.

(11b) In Airteagal 64, cuirtear an méid seo a leanas in ionad mhír 1:

"Tabharfar do na húdaráis inniúla go léir na cumhachtaí maoirseachta chun cur isteach ar ghníomhaíocht a dhéanann institiúidí, cuideachtaí sealbhaíochta airgeadais agus cuideachtaí sealbhaíochta airgeadais mheasctha, ar cumhachtaí iad sin atá riachtanach dá bhfeidhmiúchán, lena n-áirítear go háirithe an ceart chun údarú a tharraingt siar i gcomhréir le hAirteagal 18, na cumhachtaí is gá i gcomhréir le hAirteagal 18, na cumhachtaí is gá i gcomhréir le hAirteagal 102, na cumhachtaí a leagtar amach i mír 104 agus i mír 105, agus na cumhachtaí chun na bearta dá dtagraítear in Airteagal 21a a dhéanamh."

(11c) In Airteagal 66(1) cuirtear pointe (e) isteach mar a leanas:

"(e) mainneachtain iarratas a dhéanamh ar fhormheas, ar sárú é sin ar Airteagal 21a, nó aon sárú eile ar na ceanglais a leagtar amach in Airteagal 21a."

(11d) In Airteagal 67(1), cuirtear isteach an pointe (q) seo a leanas:

"(q) mainníonn máthairinstitiúid, máthairchuideachta sealbhaíochta airgeadais nó máthairchuideachta sealbhaíochta airgeadais mheasctha aon ghníomhaíocht a dhéanamh a d'fhéadfadh a bheith ag teastáil chun a áirithiú go gcomhlíonfar na ceanglais stuamachta a leagtar amach i gCuid a Trí, i gCuid a Ceathair, i gCuid a Sé nó i gCuid a Seacht de Rialachán (AE) Uimh. 575/2013 nó a fhorchuirtear faoi Airteagal 104(1)(a) nó Airteagal 105 den Treoir seo ar an leibhéal comhdhlúite nó fo-chomhdhlúite."

(12) In Airteagal 75, cuirtear an méid seo a leanas in ionad mhír 1:

"1. Baileoidh na húdaráis inniúla an fhaisnéis a nochtar i gcomhréir leis na critéir um nochtadh arna mbunú i bpointí (g), (h), (i) agus (k) d'Airteagal 450(1) de Rialachán (AE) Uimh. 575/2013 agus bainfidh siad úsáid aisti chun treochtaí agus cleachtais luach saothair a thagarmharcáil. Cuirfidh na húdaráis inniúla an fhaisnéis sin ar fáil do ÚBE."

(13) Cuirtear an méid seo a leanas in ionad Airteagal 84:

"Airteagal 84

Riosca úis a thagann as gníomhaíochtaí leabhar neamhthrádála

1. Áiritheoidh na húdaráis inniúla go gcuirfidh institiúidí córais inmheánacha i bhfeidhm nó go mbainfidh siad úsáid as an modheolaíocht chaighdeánaithe chun rioscaí a shainaithint, a mheas, a bhainistiú agus a mhaolú, ar rioscaí iad a thiocfaidh as athruithe a d'fhéadfadh teacht ar rátaí úis a mbeadh tionchar acu ar luach eacnamaíoch cothromais agus ar ghlanioncam úis na ngníomhaíochtaí leabhar neamhthrádála atá ag institiúid.
2. Rioscaí a thiocfaidh as athruithe a d'fhéadfadh teacht ar raonta difríochta creidmheasa a mbeadh tionchar acu ar luach eacnamaíoch cothromais agus ar ghlanioncam úis na ngníomhaíochtaí leabhar neamhthrádála atá ag institiúid, áiritheoidh na húdaráis inniúla go gcuirfidh institiúidí córais i bhfeidhm chun na rioscaí sin a mheasúnú agus faireachán a dhéanamh orthu.
3. Féadfaidh údaráis inniúla ceangal a chur ar institiúid úsáid a bhaint as an modheolaíocht chaighdeánaithe dá dtagraítear i mír 1 i gcás nach mbeidh na córais inmheánacha arna gcur i bhfeidhm ag na hinstitiúidí sin sásúil chun na rioscaí dá dtagraítear i mír 1 a mheasúnú.
4. Chun críocha an Airteagail seo, forbróidh ÚBE dréachtchaighdeáin theicniúla rialála chun sonrú a dhéanamh ar mhionsonraí modheolaíochta caighdeánaithe, a fhéadfaidh institiúidí a úsáid chun na rioscaí dá dtagraítear i mír 1 a mheas.

Cuirfidh ÚBE na dréachtchaighdeáin theicniúla rialála sin faoi bhráid an Choimisiúin faoi cheann [bliain amháin tar éis theacht i bhfeidhm na Treorach seo].

Tarmlichtear an chumhacht chuig an gCoimisiún chun na caighdeáin theicniúla rialála dá dtagraítear sa chéad fhomhír a ghlacadh i gcomhréir le hAirteagal 10 go hAirteagal 14 de Rialachán (AE) Uimh. 1093/2010.

5. Eiseoidh ÚBE treoirlínte chun an méid seo a leanas a shainiú:

- (a) na critéir faoina ndéanfaidh córas inmheánach institiúide measúnú ar na rioscaí dá dtagraítear i mír 1;
- (b) na critéir faoina ndéanfaidh institiúidí na rioscaí dá dtagraítear i mír 1 a shainiú, a bhainistiú agus a mhaolú;
- (c) na critéir faoina ndéanfaidh institiúidí na rioscaí dá dtagraítear i mír 2 a mheasúnú agus faireachán a dhéanamh orthu;
- (d) na critéir faoina gcinnfear na córais inmheánacha arna gcur i bhfeidhm ag na h-institiúidí chun críocha mhír 1 nach bhfuil sásúil, dá dtagraítear i mír 3;

eiseoidh ÚBE na treoirlínte sin faoin [bliain amháin tar éis theacht i bhfeidhm na Treorach seo]."

(14) In Airteagal 85, cuirtear an méid seo a leanas in ionad mhír (1):

"1. Áiritheoidh na húdaráis inniúla go gcuirfidh institiúidí beartais agus próisis i bhfeidhm chun an neamhchosaint ar riosca oibriúcháin a mheasúnú agus a bhainistiú, lena n-áirítear an riosca de bharr samhaltú agus na rioscaí a thiocfaidh as seachfhoinsiú, agus chun teagmhais ard-déine minicíochta íseal a chumhdach. Cuirfidh institiúidí in iúl cad é atá i gceist le riosca oibriúcháin chun críocha na mbeartas agus na nósanna imeachta sin."

(15) Leasaítear Airteagal 92 mar a leanas:

(a) scriostar mír 1.

(b) i mír 2, cuirtear an méid seo a leanas in ionad na habairte tosaigh:

"Áiritheoidh na Ballstáit, agus iad ag bunú agus ag cur i bhfeidhm na mbeartas luacha saothair iomláin, lena n-áirítear tuarastail agus sochair phinsin lánroghnacha, do chatagóirí foirne a raibh tionchar ábhartha ag a ngníomhaíochtaí gairmiúla ar phróifíl riosca na hinstitiúide, go gcomhlíonfaidh institiúidí na ceanglais seo a leanas ar dhóigh agus a mhéid agus atá oiriúnach dá méid, dá n-eagrúchán inmheánach agus do chineál, do raon feidhme agus do chastacht a gcuid gníomhaíochtaí."

(c) cuirtear isteach an mhír (3) seo a leanas:

"3. Chun críocha mhír 2, ar áireamh sna catagóirí foirne a mbíonn tionchar ábhartha ag a gcuid gníomhaíochtaí gairmiúla ar phróifíl riosca na hinstitiúide, beidh, ar a laghad, na catagóirí seo a leanas:

- (a) comhaltaí uile chomhlacht bainistíochta agus lucht bainistíochta sinsearaí na hinstitiúide;
- (b) baill foirne a bhfuil freagracht bainistíochta acu ar fheidhmeanna rialaithe agus ar aonaid ghnó ábhartha na hinstitiúide;
- (d) baill foirne atá i dteideal luach saothair suntasach sa bhliain airgeadais roimhe sin, ar an gcoinníoll go gcomhlíonfar na coinníollacha seo a leanas:
 - (i) is fiú EUR 500 000, ar a laghad, luach saothair an bhaill foirne agus tá sé ar cóimhéid, ar a laghad, leis an meánluach saothair a tugadh do bhord bainistíochta na hinstitiúide agus don lucht bainistíochta sinsearaí dá dtagraítear i bpointe (a);
 - (ii) déanann an ball foirne a ghníomhaíocht ghairmiúil laistigh d'aonad gnó ábhartha agus is gníomhaíocht í de chineál a bhfuil tionchar suntasach aici ar phróifíl riosca an aonaid ábhartha gnó."

(16) Leasaítear Airteagal 94 mar a leanas:

(a) i mír 1(l), cuirtear an méid seo a leanas in ionad phointe (i):

"(i) scaireanna nó, faoi réir struchtúr dlíthiúil na hinstitiúide lena mbaineann, leasanna úinéireachta coibhéiseacha; nó ionstraimí atá nasctha le scaireanna, nó, faoi réir struchtúr dlíthiúil na hinstitiúide lena mbaineann, ionstraimí neamhairgid coibhéiseacha;"

(aa) Leasaítear mír 2 mar a leanas:

"Forbróidh an tÚdarás Baincéireachta Eorpach (ÚBE) dréachtchaighdeáin rialála theicniúla chun na cineálacha ionstraimí a shonrú a chomhlíonann na coinníollacha a leagtar amach i bpointe (l)(ii) de mhír 1.

Cuirfidh ÚBE na dréachtchaighdeáin theicniúla rialála sin faoi bhráid an Choimisiúin faoin 31 Márta 2014.

Forbróidh ÚBE dréachtchaighdeáin rialála theicniúla lena leagtar amach na critéir d'fhonn na nithe seo a leanas a shainiú ionas go n-aithneofar baill foirne a mbíonn tionchar ábhartha ag a gcuid gníomhaíochtaí ar phróifíl riosca na hinstitiúide dá dtagraítear in Airteagal 92(3):

- (a) freagrachtaí bainistíochta, feidhmeanna rialaithe agus aonaid ghnó ábhartha;
- (b) aonad gnó ábhartha agus tionchar suntasach ar phróifíl riosca an aonaid ábhartha gnó; agus
- (c) catagóirí eile foirne nach dtagraítear go sainráite dóibh in Airteagal 92(3), a bhfuil tionchar ag a gcuid gníomhaíochtaí ar phróifíl riosca na hinstitiúide, ar tionchar é atá chomh hábhartha céanna le tionchar na gcatagóirí foirne dá dtagraítear sa mhír sin.

Cuirfidh ÚBE na dréachtchaighdeáin rialála theicniúla sin faoi bhráid an Choimisiúin faoin [6 mhí tar éis theacht i bhfeidhm na Treorach seo].

Tarmligtear an chumhacht chuig an gCoimisiún chun na caighdeáin theicniúla rialála dá dtagraítear sa chéad fhomhír a ghlacadh i gcomhréir le hAirteagal 10 go hAirteagal 14 de Rialachán (AE) Uimh. 1093/2010".

(b) cuirtear na míreanna seo a leanas leis:

"3. De mhaolú ar mhír 1, ní bheidh feidhm ag na ceanglais a leagtar amach i bpointe (l), i bpointe (m) agus sa dara fhomhír de phointe (o) maidir leis an méid seo a leanas, ar a laghad:

- (a) institiúid nach institiúid mhór í mar a shainmhínítear i bpointe (1) d'Airteagal 430a de Rialachán (AE) Uimh. 575/2013, agus a bhfuil luach a sócmhainní, ar an meán agus ar bhonn aonair nó, i gcás inarb infheidhme, ar bhonn comhdhlúite, i gcomhréir leis an Treoir seo agus le Rialachán (AE) Uimh. 575/2013, cothrom le nó níos lú ná EUR 5 bhilliún in imeacht na tréimhse ceithre bliana go díreach roimh an mbliain airgeadais reatha;
- (b) ball foirne nach dtéann a luach saothair inathraitheach bliantúil thar EUR 50 000 agus nach bhfuil sé níos mó ná aon trian de luach saothair iomlán bliantúil an bhaill foirne sin. Chun críocha an phointe seo, féadfaidh na Ballstáit na tairseacha dá dtagraítear anseo a mhodhnú, agus aird á tabhairt ar shainiúlachtaí cleachtais luacha saothair sa mhargadh náisiúnta ábhartha agus ar na freagrachtaí agus ar phróifíl phoist na mball foirne sin.

3a. Féadfaidh Ballstát:

- (a) an tairseach dá dtagraítear i mír 3(a) a íslíú i gcás institiúidí seachas institiúid mhór mar a shainmhínítear i bpointe (1) d'Airteagal 430a de Rialachán (AE) Uimh. 575/2013 í, agus aird á tabhairt ar chineál agus raon feidhme a ngníomhaíochtaí, a n-eagrúchán inmheánach nó, i gcás inarb infheidhme, saintréithe an ghrúpa lena mbaineann siad; nó
- (b) an tairseach dá dtagraítear i mír 3(a) a mhéadú chomh hard le huasmhéid EUR 15 bhilliún, ar an gcoinníoll nach institiúid mhór mar a shainmhínítear i bpointe (1) d'Airteagal 430a de Rialachán (AE) Uimh. 575/2013 í an institiúid agus go gcomhlíonann sí na critéir a leagtar amach i bpointí (b) go (e) d'Airteagal 430a(4) de Rialachán (AE) Uimh. 575/2013."

4. Faoi [ceithre bliana tar éis theacht i bhfeidhm na Treorach seo], déanfaidh an Coimisiún, i ndlúthchomhar le ÚBE, athbhreithniú agus cuirfidh sé tuarascáil i dtoll a chéile ar chur i bhfeidhm mhír 3 agus mhír 3a agus cuirfidh sé an tuarascáil sin, agus togra reachtach, más iomchuí, faoi bhráid Pharlaimint na hEorpa agus na Comhairle.

5. Glacfaidh ÚBE treoirlínte a éascóidh cur chun feidhme mhír 3 agus mhír 3a agus a áiríteoidh go gcuirfear i bhfeidhm ar bhonn comhsheasmhach iad."

(17) Leasaítear Airteagal 97 mar a leanas:

(a) scriostar pointe (b) de mhír 1;

(b) cuirtear an mhír nua 4a seo a leanas isteach i ndiaidh mhír 4:

"4a. Féadfaidh na húdaráis inniúla na modheolaíochtaí le haghaidh chur i bhfeidhm an phróisis athbhreithnithe agus meastóireachta dá dtagraítear i mír 1 a shaincheapadh d'fhonn institiúidí a bhfuil próifílí riosca comhchosúla acu a chur san áireamh, samhlacha gnó comhchosúla nó suíomhanna geografacha comhchosúla neamhchosaintí, mar shampla. Féadfaidh tagarmharcanna riosca-bhunaithe agus táscairí cainníochtúla a bheith ar na modheolaíochtaí saincheaptha sin, agus féadfar aird chuí a thabhairt leo ar na rioscaí sonracha nach mbeidh cosaint ag gach institiúid orthu, agus ní dhéanfaidh siad difear do cineál institiúidsonrach na mbeart arna bhforchur i gcomhréir le Airteagal 104a.

Tabharfaidh na húdaráis inniúla fógra do ÚBE nuair a úsáideann siad modheolaíochtaí saincheaptha de bhun na míre seo. Déanfaidh ÚBE faireachán ar na cleachtais mhaoirseachta agus eiseoidh sé treoirlínte chun a shonrú conas ba cheart measúnú a dhéanamh ar phróifílí riosca comhchosúla chun críocha na míre seo agus chun a áirithiú go mbeidh cur i bhfeidhm comhsheasmhach comhréireach ann maidir le modheolaíochtaí institiúid-shaincheaptha comhchosúla ar fud an Aontais. Glacfar na treoirlínte sin i gcomhréir le hAirteagal 16 de Rialachán (AE) Uimh. 1093/2010".

(18) Leasaítear Airteagal 98 mar a leanas:

(a) i mír (1), scriostar pointe (j);

(b) cuirtear an méid seo a leanas in ionad mhír 5:

"5. Áireofar leis an athbhreithniú agus leis an meastóireacht a dhéanfaidh na húdaráis inniúla neamhchosaint institiúidí ar riosca ráta úis a thagann as gníomhaíochtaí leabhar neamhthrádála. Déanfaidh na húdaráis inniúla na cumhachtaí maoirseachta a fheidhmiú sna cásanna seo a leanas, ar a laghad, ach amháin má mheasann siad, bunaithe ar an athbhreithniú agus ar an meastóireacht dá dtagraítear sa mhír seo, gur leormhaith an bainistiú a dhéanann an institiúid ar riosca ráta úis a thagann as gníomhaíochtaí leabhar neamhthrádála agus nach bhfuil an institiúid neamhchosanta go hiomarcach ar riosca ráta úis a thagann as gníomhaíochtaí leabhar neamhthrádála:

(a) i gcás institiúidí ina laghdaíonn luach eacnamaíoch a gcothromais dá dtagraítear in Airteagal 84(1) níos mó ná 15% dá caipiteal Leibhéal 1 mar thoradh ar athrú tobann gan choinne ar rátaí úis mar a leagtar amach in aon cheann de na sé chás maoirseachta suaite a chuirtear i bhfeidhm ar rátaí úis;

(b) i gcás ina dtagann laghdú mór ar ghlanioncam úis na hinstitiúide mar thoradh ar athrú tobann gan choinne ar rátaí úis mar a leagtar amach in aon cheann den dá chás maoirseachta suaite a chuirtear i bhfeidhm ar rátaí úis dá dtagraítear i bpointe (b) d'Airteagal 448(3) de Rialachán 575/2013;

Chun críche na míre seo, ciallaíonn 'cumhachtaí maoirseachta' aon cheann de na cumhachtaí seo a leanas:

- (a) na cumhachtaí dá dtagraítear in Airteagal 104(1);
- (b) an chumhacht toimhdí samhaltaithe agus paraiméadracha a fhorchur, seachas iad siúd a shaináithin ÚBE de bhun Airteagal 98(5a)(b), rud a léireoidh institiúidí nuair a ríomhfaidh siad luach eacnamaíoch cothromais faoi Airteagal 84(1).
- (c) cuirtear isteach an mhír 5a seo a leanas:

"5a. Forbróidh ÚBE dréachtchaighdeáin theicniúla rialála d'fhonn na nithe seo a leanas a shonrú chun críche mhír 5:

- (a) sé chás maoirseachta suaite a chuirtear i bhfeidhm ar rátaí úis i leith gach airgeadra;
- (b) i bhfianaise na gcaighdeán stuamachta arna gcomhaontú go hidirnáisiúnta, na toimhdí coiteanna samhaltaithe agus paraiméadracha, seachas toimhdí iompraíochta, a léireoidh institiúidí agus luach eacnamaíoch cothromais á ríomh faoi phointe (a) de mhír 5 acu agus atá teoranta don mhéid seo a leanas:
 - (i) an tslí ina láimhseáiltear cothromas na hinstitiúide féin;
 - (ii) cuimsiú, comhdhéanamh agus lascainiú sreafaí airgid atá íogair do rátaí úis a eascraíonn as sócmhainní agus dliteanais na hinstitiúide agus as míreanna na hinstitiúide atá lasmuigh den chlár comhardaithe, lena n-áirítear láimhseáil corrlach tráchtála agus comhpháirteanna eile raon difríochta;
 - (iii) samhlacha dinimiciúla agus/nó statacha de na cláir chomhardaithe a úsáid agus an láimhseáil a dhéantar, dá bharr, ar shuíomhanna amúchta agus ar shuíomhanna atá ag aibiú.
- (c) toimhdí samhaltaithe agus paraiméadracha comhchoiteanna a léireoidh institiúidí nuair a ríomhfaidh siad an glanioncam úis agus cad is "meath mór" chun críche mhír 5;

Cuirfidh ÚBE na dréachtchaighdeáin theicniúla rialála sin faoi bhráid an Choimisiúin faoi cheann [bliain amháin tar éis theacht i bhfeidhm na Treorach seo].

Tarmligtear an chumhacht chuig an gCoimisiún chun na caighdeáin theicniúla rialála dá dtagraítear sa chéad fhomhír a ghlacadh i gcomhréir le hAirteagal 10 go hAirteagal 14 de Rialachán (AE) Uimh. 1093/2010."

(19) In Airteagal 99(2), scriostar pointe (b).

(20) Scriostar Airteagal 103.

(21) Leasaítear Airteagal 104 mar a leanas:

(a) Cuirtear an méid seo a leanas in ionad mhír 1:

"1. Chun críocha Airteagail 97, 98(4) agus (5), 101(4) agus 102 agus Rialachán (AE) Uimh. 575/2013 a chur i bhfeidhm, beidh ar a laghad na cumhachtaí seo a leanas ag na húdaráis inniúla:

- (a) a chur de cheangal ar institiúidí cistí dílse breise a bheith acu os cionn na gceanglas a leagtar amach i Rialachán (AE) Uimh. 575/2013, faoi na coinníollacha a leagtar síos in Airteagal 104a;
- (b) a chur de cheangal orthu socrúithe, próisis, sásraí agus straitéisí a dhaingniú a chuirtear i bhfeidhm i gcomhréir le hAirteagal 73 agus le hAirteagal 74;
- (c) a chur de cheangal ar institiúidí plean a chur i láthair chun comhlíonadh na gceanglas maoirseachta de bhun na Treorach seo agus Rialachán (AE) Uimh. 575/2013 a thabhairt ar ais agus spriocdháta a leagan síos chun an plean a chur chun feidhme, lena n-áirítear feabhsuithe ar an bplean sin maidir leis an raon feidhme agus an spriocdháta;
- (d) a chur de cheangal ar institiúidí beartas soláthair ar leith nó láimhseáil sócmhainní i dtéarmaí ceanglas cistí dílse a chur i bhfeidhm;

- (e) gnó, oibríochtaí nó líonra institiúidí a shrianadh nó teorainn a chur leo nó dífheistiú gníomhaíochtaí a iarraidh a chuirfidh fóntacht institiúide faoi rioscaí iomarcacha;
 - (f) a chur de cheangal ar institiúidí laghdú a dhéanamh ar an riosca a bhaineann le gníomhaíochtaí, táirgí agus córais institiúidí, lena n-áirítear gníomhaíochtaí seachfhoinsithe;
 - (g) a chur de cheangal ar institiúidí luach saothair inathraitheach mar chéatadán de ghlanioncaim a shrianadh i gcás ina mbeidh sé ar neamhréir le bonn caipitil fóna a chaomhnú;
 - (h) a chur de cheangal ar institiúidí glanbhrabúis a úsáid chun na cistí dílse a threisiú;
 - (i) dáileacháin nó íocaíochtaí úis arna ndéanamh ag institiúid do scairshealbhóirí, do chomhaltaí nó do shealbhóirí ionstraimí Breise Leibhéal 1 a shrianadh nó iad a thoirmeasc i gcás nach ionann an toirmeasc sin agus mainneachtain na hinstitiúide;
 - (j) ceanglais maidir le tuairisciú breise nó tuairisciú níos minice a fhorchur, lena n-áirítear tuairisciú ar shuíomhanna caipitil agus leachtachta;
 - (k) ceanglais leachtachta shonracha a fhorchur, lena n-áirítear srianta ar neamhréireanna aibíochta idir sócmhainní agus dliteanais;
 - (l) nochtaí breise a cheangal.
- (b) leasaítear mír 2 mar seo a leanas:

2. Chun críocha mhír 1(j), ní fhéadfaidh údaráis inniúla ceanglais maidir le tuairisciú breise nó tuairisciú níos minice a fhorchur ar institiúidí ach amháin i gcás nach faisnéis dhúblach í an faisnéis a bheidh le tuairisciú agus ina bhfuil gá leis an bhfaisnéis bhreise chun críocha Airteagal 97 go hAirteagal 102. Measfar gur faisnéis dhúblach í aon faisnéis bhreise a fhéadfar a éileamh ar institiúidí i gcás inar tuairiscíodh an faisnéis chéanna cheana, nó faisnéis atá mórán mar an gcéanna léi, ar bhealach ar bith eile don údarás inniúil. Ní éileoidh an t-údarás inniúil ar institiúid faisnéis bhreise a thuairisciú i gcás ina bhfuair an t-údarás inniúil faisnéis cheana féin atá i bhformáid éagsúil nó atá ar leibhéal éagsúil gráinneachta agus nach gcuirfidh an fhormaid ná an ghráinneacht sin cosc air faisnéis a tháirgeadh a bheidh ar comhcháilíocht agus ar comhiontaofacht leis an bhfaisnéis bhreise eile a thuairisceofaí seachas sin.";

(c) scriostar mír 3.

(22) Cuirtear isteach an tAirteagal 104a, an tAirteagal 104b agus an tAirteagal 104c seo a leanas:

"Airteagal 104a
Ceanglas cistí dílse breise

1. Forchuirfidh na húdaráis inniúla an ceanglas cistí dílse breise dá dtagraítear in Airteagal 104(1)(a) i gcás ina ndeimhneoidh siad, ar bhonn na n-athbhreithnithe a rinneadh i gcomhréir le hAirteagal 97 agus le hAirteagal 101, aon cheann de na cásanna seo a leanas i leith institiúid aonair:

- (a) tá an institiúid neamhchosantach ar rioscaí nó ar ghnéithe de rioscaí nach gcumhdaítear nó nach gcumhdaítear go leordhóthanach faoi na ceanglais cistí dílse a leagtar amach i i gCuid a Trí, i gCuid a Ceathair, i gCuid a Cúig agus i gCuid a Seacht de Rialachán (AE) Uimh. 575/2013 mar a shonraítear i mír 2;
- (b) ní chomhlíonann an institiúid na ceanglais a leagtar amach in Airteagal 73 agus in Airteagal 74 den Treoir seo nó in Airteagal 393 de Rialachán (AE) Uimh. 575/2013 agus ní dócha go mbeadh bearta eile maoirseachta leordhóthanach d'fhonn a áirithiú go bhféadfaí na ceanglais sin a chomhlíonadh laistigh de thréimhse ama iomchuí;

- (c) meastar nach leor na coigeartuithe dá dtagraítear in Airteagal 98(4) go bhféadfaidh an institiúid a suíomhanna a dhíol nó a fhálú amach laistigh de thréimhse ghearr gan caillteanais ábhartha a thabhtú faoi ghnáthchoinníollacha margaidh;
- (d) léirítear leis an measúnú a dhéantar i gcomhréir le hAirteagal 101(4) gur cosúil gur ceanglais cistí dílse neamhleora an toradh a bheidh ar neamh-chomhlíonadh na gceanglas maidir leis an gcur chuige ceadaithe a chur i bhfeidhm;
- (e) mainnfhonn an institiúid leibhéal leordhóthanach cistí dílse breise a bhunú nó a choinneáil d'fhonn na teoracha arna gcur in iúl i gcomhréir le hAirteagal 104b(3) a chumhdach;
- (f) cásanna eile institiúidsonrach a measann an t-údarás inniúil gur cúis inní ábhartha maoirseachta iad.

Ní dhéanfaidh na húdaráis inniúla na ceanglais cistí dílse breise dá dtagraítear in Airteagal 104(1)(a) a fhorchur ach amháin chun na rioscaí a chlúdach a thabhaíonn institiúidí aonair de bharr a ngníomhaíochtaí, lena n-áirítear iad siúd a léiríonn tionchar cúinsí eacnamaíocha áirithe nó forbairtí margaidh maidir le próifíl riosca institiúide aonair.

2. Chun críocha mhír 1(a), ní mheasfar gur rioscaí nó gnéithe rioscaí iad ach amháin más rioscaí nó gnéithe rioscaí iad nach gcumhdaítear nó nach gcumhdaítear go leordhóthanach leis na ceanglais cistí dílse a leagtar amach i gCuid a Trí, i gCuid a Ceathair, i gCuid a Cúig agus i gCuid a Seacht de Rialachán (AE) Uimh. 575/2013 i gcás inarb airde méideanna, cineálacha agus dáileachán an chaipitil a mheasann an t-údarás inniúil a bheith leordhóthanach ag cur san áireamh an t-athbhreithniú maoirseachta a dhéanfaidh na hinstitiúidí ar an measúnú i gcomhréir leis an gcéad fhomhír d'Airteagal 73 ná ceanglais cistí dílse na hinstitiúide a leagtar amach i gCuid a Trí, i gCuid a Ceathair, i gCuid a Cúig agus i gCuid a Seacht de Rialachán (AE) Uimh. 575/2013.

Chun críocha na chéad fhomhíre, agus próifíl riosca gach institiúide á cur san áireamh, déanfaidh na húdaráis inniúla na rioscaí nach bhfuil cosaint ag an institiúid orthu a mheas lena n-áirítear an méid seo a leanas:

- (a) rioscaí nó gnéithe rioscaí a eisiatar go sainráite ó na ceanglais cistí dílse, nó nach dtugtar aghaidh orthu go sainráite sna ceanglais céanna sin a leagtar amach i gCuid a Trí, i gCuid a Ceathair, i gCuid a Cúig agus i gCuid a Seacht de Rialachán (AE) Uimh. 575/2013; agus
- (b) rioscaí nó gnéithe rioscaí ar dócha go ndéanfar gannmheas orthu in ainneoin go gcomhlíontar na ceanglais is infheidhme a leagtar amach i gCuid a Trí, i gCuid a Ceathair, i gCuid a Cúig agus i gCuid a Seacht de Rialachán (AE) Uimh. 575/2013.

Sa mhéid go bhfuil rioscaí nó gnéithe rioscaí faoi réir socrúithe idirthréimhseacha nó forálacha marthanachta sa Treoir seo nó i Rialachán (AE) Uimh. 575/2013, ní mheasfar gur rioscaí nó gnéithe rioscaí ar dócha go ndéanfar gannmheas orthu in ainneoin go gcomhlíontar na ceanglais is infheidhme a leagtar amach i gCuid a Trí, i gCuid a Ceathair, i gCuid a Cúig agus i gCuid a Seacht de Rialachán (AE) Uimh. 575/2013.

Chun críocha na chéad mhíre, cumhdófar le cistí dílse breise na rioscaí ábhartha uile nó na gnéithe uile de na rioscaí sin nach bhfuil cumhdaithe, nó nach bhfuil cumhdaithe go leordhóthanach, leis na ceanglais cistí dílse a leagtar amach i gCuid a Trí, i gCuid a Ceathair, i gCuid a Cúig agus i gCuid a Seacht de Rialachán (AE) Uimh. 575/2013.

Is féidir a mheas gurb ábhartha an riosca ráta úis a thagann as suíomhanna neamhthrádála sna cásanna dá dtagraítear in Airteagal 98(5), ar a laghad, ach amháin má mheasann na húdaráis inniúla, bunaithe ar an athbhreithniú agus ar an meastóireacht dá dtagraítear sa mhír chéanna sin, gur leormhaith an bainistiú a dhéanann an institiúid ar riosca ráta úis a thagann as gníomhaíochtaí leabhar neamhthrádála agus nach iomarcach neamhchosaint na hinstitiúide ar riosca ráta úis a thagann as gníomhaíochtaí leabhar neamhthrádála.

3. Cinnfidh na húdaráis inniúla leibhéal na gcistí dílse breise a cheanglaítear le hAirteagal 104(1)(a) mar an difríocht idir an caipiteal a mheastar a bheith leordhóthanach de bhun mhír 2 agus na ceanglais cistí dílse a leagtar amach i gCuid a Trí, i gCuid a Ceathair, i gCuid a Cúig agus i gCuid a Seacht de Rialachán (AE) Uimh. 575/2013.
4. Comhlíonfaidh an institiúid an ceanglas cistí dílse breise dá dtagraítear in Airteagal 104(1)(a) le cistí dílse a chomhlíonann na coinníollacha seo a leanas:
 - (a) comhlíonfar ar a laghad trí cheathrú den cheanglas cistí dílse breise le caipiteal Leibhéal 1;
 - (b) beidh ar a laghad trí cheathrú de chaipiteal Leibhéal 1 comhdhéanta de chaipiteal de Ghnáthchothromas Leibhéal 1.

De mhaolú ar an gcéad fhomhír, féadfaidh an t-údarás inniúil a cheangal ar an institiúid a ceanglas cistí dílse breise a chomhlíonadh le cion níos mó de chaipiteal Leibhéal 1, nó de chaipiteal Gnáthchothromas Leibhéal 1 i gcás inar gá agus ag féachaint d'imthosca sonracha na hinstitiúide.

Ní bhainfear úsáid as cistí dílse arna n-úsáid chun an ceanglas cistí dílse breise dá dtagraítear in Airteagal 104(1)(a) a chomhlíonadh chun aon cheann de na ceanglais cistí dílse a leagtar amach i bpointe (a), i bpointe (b) agus i bpointe (c) d'Airteagal 92(1) de Rialachán (AE) Uimh. 575/2013, an ceanglas maoláin chomhcheangailte a shainmhínítear in Airteagal 128(6) den Treoir seo, ná an treoir maidir le cistí dílse breise dá dtagraítear in Airteagal 104b a chomhlíonadh.

De mhaolú ar an tríú fhomhír, féadfar úsáid a bhaint as an gceanglas cistí dílse breise dá dtagraítear in Airteagal 104(1)(a) arna bhforchur ag na húdaráis inniúla chun aghaidh a thabhairt ar rioscaí na gearála iomarcaí nach gcumhdaítear go leordhóthanach le hAirteagal 92(1)(d) de Rialachán (AE) Uimh. 575/2013 chun an ceanglas maoláin chomhcheangailte dá dtagraítear in Airteagal 128(6) den Treoir seo a chomhlíonadh.

5. Tabharfaidh an t-údarás inniúil údar cuí i scríbhinn do gach institiúid leis an gcinneadh ceangal cistí dílse breise a fhorchur faoi Airteagal 104(1)(a) ar a laghad trí chuntas soiléir a thabhairt ar an measúnú iomlán ar na heilimintí dá dtagraítear i mír 1 go mír 4. Áireofar air sin, sa chás a leagtar amach i mír 1(e), ráiteas sonrach le haghaidh na gcúiseanna lena measfar nach leor a thuilleadh treoir chaipitil a fhorchur.
6. []

Airteagal 104b

Treoir maidir le cistí dílse breise

1. De bhun na straitéisí agus na bpróiseas dá dtagraítear in Airteagal 73, bunóidh institiúidí a gcaipiteal inmheánach ar leibhéal cuí cistí dílse atá leordhóthanach chun na rioscaí uile nach bhfuil cosaint ag institiúid orthu a chumhdach agus chun an méid seo a leanas a áirithiú:
- (a) nach mbeidh de thoradh ar luaineachtaí eacnamaíocha timthriallacha sárú ar na ceanglais sin; agus
 - (b) gur féidir le cistí dílse na hinstitiúide na caillteanais ionchasacha a chomhshó a thagann as cásanna struis, lena n-áirítear iad siúd arna sainaithint sa tástáil struis maoirseachta dá dtagraítear in Airteagal 100.
2. Déanfaidh na húdaráis inniúla athbhreithniú rialta ar leibhéal an chaipitil inmheánaigh a shocraíonn gach institiúid i gcomhréir le mír 1 mar chuid den athbhreithniú agus den mheastóireacht a dhéanfar i gcomhréir le hAirteagal 97 agus le hAirteagal 101 a chur san áireamh, lena n-áirítear torthaí na dtástálacha struis dá dtagraítear in Airteagal 100.

De bhun na n-athbhreithnithe sin, cinnfidh na húdaráis inniúla an leibhéal foriomlán cistí dílse le haghaidh gach institiúide a measann siad a bheidh cuí.

3. Cuirfidh na húdaráis inniúla a dtreoir mhaoirseachta maidir le cistí dílse breise in iúl d'institiúidí, arb é a bheidh ann an difear idir an leibhéal foriomlán cistí dílse a mheasann na húdaráis inniúla a bheidh cuí agus méid na gcistí dílse a cheanglaítear le Cuid a Trí, Cuid a Ceathair, Cuid a Cúig agus Cuid a Seacht de Rialachán (AE) Uimh. 575/2013 agus de bhun Airteagal 104(1)(a) agus Airteagal 128 na Treorach seo, i gcás ina mbeidh an difear sin deimhneach.
4. Ní mór do threoir na n-údarás inniúil maidir le cistí dílse breise de bhun mhír 3 a bheith institiúidsónrach. Leis an treoir sin, féadfar rioscaí a chumhdach a dtugtar aghaidh orthu le ceanglais cistí dílse breise arna bhforchur de bhun Airteagal 104a sa mhéid go gcumhdaítear léi gnéithe de na rioscaí sin nach gcumhdaítear cheana féin faoin gceanglas sin, agus sa mhéid sin amháin.
5. Mura gcomhlíontar an treoir dá dtagraítear i mír 3 i gcás ina gcomhlíonann institiúid na ceanglais a leagtar amach i gCuid a Trí, i gCuid a Ceathair, i gCuid a Cúig agus i gCuid a Seacht de Rialachán (AE) Uimh. 575/2013, ní spreagfar na srianta dá dtagraítear in Airteagal 141 leis an gceanglas maidir le cistí dílse breise dá dtagraítear in Airteagal 104(1)(a) ná leis an gceanglas maoláin chomhcheangailte dá dtagraítear in Airteagal 128(6).

Airteagal 104c
Comhar le húdaráis réitithe

1. ☐
 2. Déanfaidh na húdaráis inniúla fógra faoin gceanglas maidir le cistí dílse breise arna fhorchur ar institiúidí de bhun Airteagal 104(1)(a) agus faoi aon treoird maidir le cistí dílse breise a thabhairt d'institiúidí i gcomhréir le hAirteagal 104b."
- (23) Scriostar pointe (d) d'Airteagal 105.
- (24) In Airteagal 108, scriostar mír 3.
- (25) In Airteagal 109, cuirtear an méid seo a leanas in ionad mhír 2 agus mhír 3
- "2. Cuirfidh na húdaráis inniúla de cheangal ar na máthairghnóthais agus na fochuideachtaí atá faoi réir na Treorach seo na hoibleagáidí a leagtar amach i Roinn II den Chaibidil seo ar bhonn comhdhlúite nó fo-chomhdhlúite a chomhlíonadh, chun a áirithiú go bhfuil na socruithe, na próisis agus na sásraí a cheanglaítear le Roinn II den Chaibidil seo comhsheasmhach agus comhtháite agus gur féidir aon sonraí agus aon fhaisnéis atá ábhartha do chuspóir na maoirseachta a chur ar fáil. Go sonrach, áiritheoidh siad go gcuirfidh na máthairghnóthais agus na fochuideachtaí atá faoi réir na Treorach seo na socruithe, na próisis agus na sásraí sin chun feidhme ina gcuid fochuideachtaí nach bhfuil faoi réir na Treorach seo, lena n-áirítear iad sin a bunaíodh in lárionaid airgeadais eischósta. Beidh na socruithe, na próisis agus na sásraí sin comhsheasmhach agus comhtháite freisin agus beidh na fochuideachtaí sin in ann aon sonraí agus aon fhaisnéis atá ábhartha do chuspóir na maoirseachta a chur ar fáil.

3. Ní bheidh oibleagáidí a d'eascair ó Roinn II den Chaibidil seo maidir le foghnóthais, nach bhfuil siad féin faoi réir na Treorach seo, infheidhme más féidir leis an máthairinstitiúid AE a léiriú do na húdaráis inniúla go bhfuil cur i bhfeidhm Roinn II neamhdhleathach faoi rialacha na tríú tíre ina bhfuil an fhochuideachta bunaithe."

(25a) In Airteagal 109, cuirtear isteach an mhír 4 seo a leanas:

4. Ní bheidh feidhm ar bhonn comhdhlúite ag na ceanglais luacha saothair a leagtar síos in Airteagal 92, in Airteagal 94 ná in Airteagal 95 maidir le ceachtar acu seo a leanas:

- (a) foghnóthais atá bunaithe san Aontas i gcás ina bhfuil na foghnóthais sin faoi réir ceanglais shonracha luacha saothair i gcomhréir le hionstraimí eile de dhlí an Aontais;
- (b) foghnóthais atá bunaithe i dtríú tír, i gcás ina mbeadh na foghnóthais sin faoi réir ceanglais shonracha luacha saothair i gcomhréir le hionstraimí eile de dhlí an Aontais dá mbeidís bunaithe san Aontas".

(25b) Cuirtear an méid seo a leanas in ionad Airteagal 111:

Airteagal 111

Cinneadh ar an maoirseoir comhdhlúthaithe

1. I gcás inar máthairinstitiúid creidmheasa i mBallstát é nó inar máthairchuideachta institiúide creidmheasa AE é máthairghnóthas, is é an t-údarás inniúil a dhéanann maoirseacht ar an máthairinstitiúid creidmheasa sin nó ar an máthairinstitiúid creidmheasa AE ar bhonn aonair a dhéanfaidh maoirseacht ar bhonn comhdhlúite.

I gcás inar máthairghnólacht infheistíochta i mBallstát é nó inar máthairghnólacht infheistíochta AE é máthairghnóthas, agus nach institiúid creidmheasa aon cheann dá fhochuideachtaí, is é an t-údarás inniúil a dhéanann maoirseacht ar an máthairghnólacht infheistíochta nó ar an máthairghnólacht infheistíochta AE sin ar bhonn aonair a dhéanfaidh maoirseacht ar bhonn comhdhlúite.

I gcás inar máthairghnólacht infheistíochta i mBallstát é nó inar máthairghnólacht infheistíochta AE é máthairghnóthas, agus inar institiúid creidmheasa ceann amháin ar a laghad dá fhochuideachtaí, is é údarás inniúil na hinstitiúide creidmheasa, nó i gcás ina bhfuil roinnt institiúidí creidmheasa ann, is é údarás inniúil na hinstitiúide creidmheasa ar mó méid iomlán a cláir chomhardaithe a dhéanfaidh maoirseacht ar bhonn comhdhlúite.

2. I gcás inar máthairchuideachta sealbhaíochta airgeadais i mBallstát é nó inar máthairchuideachta sealbhaíochta airgeadais mheasctha i mBallstát é nó inar máthairchuideachta sealbhaíochta airgeadais AE é nó inar máthairchuideachta sealbhaíochta airgeadais mheasctha AE é máthairghnóthas institiúide, is é údarás inniúil na hinstitiúide a dhéanann maoirseacht ar bhonn aonair ar an institiúid sin a dhéanfaidh maoirseacht ar bhonn comhdhlúite.
3. I gcás ina bhfuil an mháthairchuideachta sealbhaíochta airgeadais chéanna i mBallstát ag dhá institiúid nó níos mó nó i gcás ina bhfuil an mháthairchuideachta sealbhaíochta airgeadais mheasctha chéanna acu i mBallstát nó an mháthairchuideachta sealbhaíochta airgeadais AE chéanna nó an mháthairchuideachta sealbhaíochta airgeadais mheasctha AE chéanna ag dhá institiúid údaráithe nó níos mó san Aontas, is iad na húdaráis seo a leanas a dhéanfaidh maoirseacht ar bhonn comhdhlúite:
 - (a) údarás inniúil na hinstitiúide creidmheasa nach bhfuil ach institiúid creidmheasa amháin laistigh den ghrúpa;
 - (b) údarás inniúil na hinstitiúide creidmheasa ar mó méid iomlán a cláir chomhardaithe, i gcás ina bhfuil roinnt institiúidí creidmheasa laistigh den ghrúpa; nó
 - (c) údarás inniúil an ghnólachta infheistíochta ar mó méid iomlán a chlár chomhardaithe, i gcás nach bhfuil aon institiúid creidmheasa sa ghrúpa.

4. I gcás ina gceanglaítear comhdhlúthú de bhun mhír 3 nó mhír 6 d'Airteagal 18 de Rialachán (AE) Uimh. 575/2013, is é údarás inniúil an ghnólachta infheistíochta ar mó méid iomlán a chláir chomhardaithe, nó, i gcás nach bhfuil aon institiúid creidmheasa sa ghrúpa, údarás inniúil an ghnólachta infheistíochta ar mó méid iomlán a chláir chomhardaithe a dhéanfaidh maoirseacht ar bhonn comhdhlúite.
- 4a. De mhaolú ar an tríú fomhír de mhír 1, ar phointe (b) de mhír 3 agus ar mhír 4, i gcás ina ndéanann údarás inniúil maoirseacht ar bhonn aonair ar níos mó ná ceann amháin de na hinstitiúidí creidmheasa laistigh de ghrúpa, is é an t-údarás inniúil a dhéanann maoirseacht ar bhonn aonair ar cheann amháin nó níos mó ná ceann amháin de na hinstitiúidí creidmheasa laistigh den ghrúpa ar mó méid iomlán chláir chomhardaithe na n-institiúidí creidmheasa sin a ndéantar maoirseacht orthu ná méid iomlán chláir chomhardaithe na n-institiúidí creidmheasa a ndéanann aon údarás inniúil eile maoirseacht orthu ar bhonn aonair a bheidh ina mhaoirseoir comhdhlúthaithe.
- De mhaolú ar phointe (c) de mhír 3, i gcás ina ndéanann údarás inniúil maoirseacht ar bhonn aonair ar níos mó ná ceann amháin de na gnólachtaí infheistíochta laistigh de ghrúpa, is é an t-údarás inniúil a dhéanann maoirseacht ar bhonn aonair ar cheann amháin nó níos mó de na gnólachtaí infheistíochta laistigh de ghrúpa ar mó, i bhfoirm chomhiomlán, méid iomlán a chláir chomhardaithe, a bheidh ina mhaoirseoir comhdhlúthaithe.
5. I gcásanna áirithe, déanfaidh na húdaráis inniúla, trí chomhaontú comhchoiteann, na critéir dá dtagraítear i mír 1, i mír 3 agus i mír 4 a tharscaoileadh agus údarás inniúil difriúil a cheapadh chun maoirseacht a dhéanamh ar bhonn comhdhlúite i gcás nach mbeadh sé iomchuí na critéir sna míreanna sin a chur i bhfeidhm, agus aird á tabhairt ar na hinstitiúidí lena mbaineann agus ar thábhacht chomparáideach a gcuid gníomhaíochtaí sna Ballstáit ábhartha, nó ar an ngá lena áirithiú go leanfaidh an t-údarás inniúil céanna den mhaoirseacht ar an leibhéal comhdhlúite. I gcásanna den sórt sin, beidh an ceart éisteacht a fháil sula ndéanann na húdaráis inniúla an cinneadh ag máthairinstitiúid AE, nó ag máthairchuideachta sealbhaíochta airgeadais AE, nó ag máthairchuideachta sealbhaíochta airgeadais mheasctha AE nó ag an institiúid ar mó méid iomlán a clár chomhardaithe, de réir mar is infheidhme.

6. Tabharfaidh na húdaráis inniúla fógra don Choimisiún agus do ÚBE faoi aon chomhaontú a thagann faoi raon feidhme mhír 5."

(26) Cuirtear an méid seo a leanas in ionad Airteagal 113:

"Airteagal 113

Cinntí comhpháirteacha maidir le ceanglais stuamachta institiúidsonracha

1. Déanfaidh an maoirseoir comhdhlúthaithe agus na húdaráis inniúla atá freagrach as maoirseacht a dhéanamh ar fhochuideachtaí máthairinstitiúide AE nó máthairchuideachta sealbhaíochta airgeadais AE nó máthairchuideachta sealbhaíochta airgeadais mheasctha AE gach a bhfuil ar a gcumas teacht ar chinneadh comhpháirteach maidir leis an méid seo a leanas:
 - (a) i dtaca le cur i bhfeidhm Airteagal 73 agus Airteagal 97, leordhóthanacht leibhéal comhdhlúite na gcistí dílse a chinneadh atá i seilbh an ghrúpa institiúidí maidir lena staid airgeadais agus a phróifíl riosca agus leibhéal na gcistí dílse is gá chun Airteagal 104(1)(a) a chur i bhfeidhm ar gach eintiteas laistigh den ghrúpa institiúidí agus ar bhonn comhdhlúite;
 - (b) i dtaca le bearta chun aghaidh a thabhairt ar ábhair thábhachtacha agus ar thorthaí ábhartha a bhaineann le maoirseacht leachtachta agus a bhaineann le leordhóthanacht na heagraíochta freisin agus láimhseáil rioscaí mar a cheanglaítear de bhun Airteagal 86 agus a bhaineann leis an ngá atá le ceanglais leachtachta institiúidsonracha i gcomhréir le hAirteagal 105 den Treoir seo;
 - (c) i dtaca le haon treoir mhaoirseachta maidir le cistí dílse breise a chinntear i gcomhréir le hAirteagal 104b(3).

2. Déanfar na cinntí comhpháirteacha dá dtagraítear i mír 1:

- (a) chun críocha mhír 1(a), laistigh de cheithre mhí tar éis don mhaoirseoir comhdhlúthaithe tuarascáil ina ndéantar an measúnú riosca ar an ngrúpa institiúidí i gcomhréir le hAirteagal 104a a chur faoi bhráid na n-údarás inniúil ábhartha eile;
- (b) chun críocha mhír 1(b), laistigh de cheithre mhí tar éis don mhaoirseoir comhdhlúthaithe tuarascáil ina ndéantar an measúnú ar phróifíl riosca leachtachta an ghrúpa institiúidí i gcomhréir le hAirteagal 86 agus le hAirteagal 105 a thíolacadh;
- (c) chun críocha mhír 1(c), laistigh de cheithre mhí tar éis don mhaoirseoir comhdhlúthaithe tuarascáil ina ndéantar an measúnú riosca ar an ngrúpa institiúidí i gcomhréir le hAirteagal 104b a thíolacadh.

Déanfar breithniú cuí sna cinntí comhpháirteacha ar mheasúnú riosca na bhfochuideachtaí arna ndéanamh ag na húdaráis inniúla ábhartha i gcomhréir le hAirteagail 73, 97, 104a agus 104b.

Leagfar amach na cinntí comhpháirteacha dá dtagraítear i bpointe (a) agus i bpointe (b) de mhír 1 i ndoiciméid ina mbeidh na cúiseanna iomlána a chuirfidh an maoirseoir comhdhlúthaithe ar fáil don mháthairchuideachta AE. I gcás easaontú, rachaidh an maoirseoir comhdhlúthaithe i gcomhairle le ÚBE arna iarraidh sin d'aon cheann de na húdaráis inniúla eile lena mbaineann. Féadfaidh an maoirseoir comhdhlúthaithe dul i gcomhairle le ÚBE as a stuaim féin.

3. Mura ndéantar cinneadh comhpháirteach den chineál sin idir na húdaráis inniúla laistigh de na tréimhsí ama dá dtagraítear i mír 2, déanfaidh an maoirseoir comhdhlúthaithe cinneadh ar chur i bhfeidhm Airteagail 73, 86 agus 97, 104(1)(a), 104b agus 105 ar bhonn comhdhlúite tar éis breithniú cuí a dhéanamh ar mheasúnú riosca na bhfochuideachtaí arna ndéanamh ag na húdaráis inniúla ábhartha. Más rud é, ag deireadh na dtréimhsí ama dá dtagraítear i mír 2, go bhfuil aon cheann de na húdaráis inniúla lena mbaineann tar éis an t-ábhar a chur faoi bhráid ÚBE i gcomhréir le hAirteagal 19 de Rialachán (AE) Uimh. 1093/2010, cuirfidh an maoirseoir comhdhlúthaithe a chinneadh siar ar feitheamh aon chinneadh a ghlacfaidh ÚBE i gcomhréir le hAirteagal 19(3) den Rialachán sin, agus glacfaidh sé a chinneadh i gcomhréir le cinneadh ÚBE. Measfar gurb iad na tréimhsí idir-réitigh de réir bhrí an Rialacháin (AE) Uimh. 1093/2010 na tréimhsí ama dá dtagraítear i mír 2. Déanfaidh ÚBE an cinneadh laistigh de mhí amháin. Ní chuirfear an t-ábhar faoi bhráid ÚBE tar éis dheireadh na tréimhse ceithre mhí ná tar éis cinneadh comhpháirteach a bheith déanta.

Maidir leis na húdaráis inniúla faoi seach atá freagrach as maoirseacht a dhéanamh ar fhochuideachtaí máthairinstitiúid creidmheasa AE nó máthairchuideachta sealbhaíochta airgeadais AE nó máthairchuideachta sealbhaíochta airgeadais mheasctha AE ar bhonn aonair nó ar bhonn fo-chomhdhlúite tar éis breithniú cuí a dhéanamh ar thuairimí agus ar ábhair amhrais an mhaoirseora chomhdhlúthaithe, déanfaidh siadsan an cinneadh ar chur i bhfeidhm Airteagail 73, 86, 97, 104(1)(a), 104b agus 105. Más rud é, ag deireadh aon cheann de na tréimhsí ama dá dtagraítear i mír 2, go bhfuil aon cheann de na húdaráis inniúla lena mbaineann tar éis an t-ábhar a chur faoi bhráid ÚBE i gcomhréir le hAirteagal 19 de Rialachán (AE) Uimh. 1093/2010, cuirfidh na húdaráis inniúla a gcinneadh siar ar feitheamh aon chinneadh a ghlacfaidh ÚBE i gcomhréir le hAirteagal 19(3) den Rialachán sin agus glacfaidh siad a gcinneadh i gcomhréir le cinneadh ÚBE. Measfar gurb iad na tréimhsí idir-réitigh de réir bhrí an Rialacháin sin na tréimhsí ama dá dtagraítear i mír 2. Déanfaidh ÚBE an cinneadh laistigh de mhí amháin. Ní chuirfear an t-ábhar faoi bhráid ÚBE i ndiaidh dheireadh na tréimhse ceithre mhí nó i ndiaidh cinneadh comhpháirteach a bheith déanta.

Leagfar an cinneadh amach i ndoiciméad ina mbeidh na cúiseanna iomlána agus cuirfear san áireamh ann measúnú riosca, tuairimí agus ábhair amhrais na n-údarás inniúil eile, arna gcur in iúl le linn na dtréimhsí ama dá dtagraítear i mír 2. Cuirfidh an maoirseoir comhdhlúthaithe an doiciméad ar fáil do na húdaráis inniúla go léir lena mbaineann agus don mháthairinstitiúid AE.

I gcás ina ndeachaigh siad i gcomhairle le ÚBE, déanfaidh na húdaráis inniúla go léir a chomhairle a mheas, agus míneoidh siad aon imeacht suntasach ón gcomhairle sin.

4. Aithneofar na cinntí comhpháirteacha dá dtagraítear i mír 1 agus na cinntí a rinne na húdaráis inniúla in éagmais cinneadh comhpháirteach dá dtagraítear i mír 3 mar chinntí cinntitheacha agus cuirfidh na húdaráis inniúla sna Ballstáit lena mbaineann i bhfeidhm iad.

Déanfar na cinntí comhpháirteacha dá dtagraítear i mír 1 agus aon chinneadh arna dhéanamh in éagmais cinneadh comhpháirteach i gcomhréir le mír 3, a thabhairt cothrom le dáta ar bhonn bliantúil nó, in imthosca eisceachtúla, i gcás ina gcuirfidh údarás inniúil atá freagrach as maoirseacht a dhéanamh ar fhochuideachtaí máthairinstitiúide AE nó, máthairchuideachta sealbhaíochta airgeadais AE nó máthairchuideachta sealbhaíochta airgeadais mheasctha AE, iarratas lánréasúnaithe i scríbhinn chuig an maoirseoir comhdhlúthaithe chun an cinneadh a thabhairt cothrom le dáta maidir le hAirteagal 104(1)(a), Airteagal 104b agus Airteagal 105 a chur i bhfeidhm. Sa chás deiridh, féadfar aghaidh a thabhairt ar an gcinneadh a thabhairt cothrom le dáta ar bhonn déthaobhach idir an maoirseoir comhdhlúthaithe agus an t-údarás inniúil a iarrfaidh amhlaidh.

5. Forbróidh ÚBE dréachtchaighdeáin theicniúla cur chun feidhme chun coinníollacha aonfhoirmeacha a áirithiú a bhaineann leis an gcinneadh comhpháirteach a chur i bhfeidhm dá dtagraítear san Airteagal seo, maidir le hAirteagail 73, 86, 97, 104(1)(a), 104b agus 105 d'fhonn cinntí comhpháirteacha a éascú.

Cuirfidh ÚBE na dréachtchaighdeáin theicniúla cur chun feidhme sin faoi bhráid an Choimisiúin faoin 1 Iúil 2014.

Tugtar de chumhacht don Choimisiún na caighdeáin theicniúla cur chun feidhme dá dtagraítear sa chéad fhomhír a ghlacadh i gcomhréir le hAirteagal 15 de Rialachán (AE) Uimh. 1093/2010."

(26a) Cuirtear an mhír seo a leanas le hAirteagal 115:

"3. I gcás nach ionann an maoirseoir comhdhlúthaithe agus an t-údarás inniúil sa Bhallstát ina bhfuil cuideachta sealbhaíochta airgeadais nó cuideachta sealbhaíochta airgeadais mheasctha bunaithe, ar cuideachta í a dearbhaíodh i gcomhréir le hAirteagal 21a, cuirfear i gcrích le húdarás inniúil an Bhallstáit ina bhfuil an máthairghnóthas bunaithe na socruithe comhordaithe comhoibrithe dá dtagraítear i mír 1."

(27) Leasaítear Airteagal 116 mar a leanas:

(a) Cuirtear an mhír nua 1a seo a leanas isteach i ndiaidh mhír 1:

"(1a). Chun an bealach a réiteach do na cúraimí dá dtagraítear in Airteagal 112(1), 114(1) agus 115(1), bunóidh an maoirseoir comhdhlúthaithe coláistí maoirseoirí freisin i gcás ina mbeidh ceannoifig gach fochuideachta máthairinstitúide AE, máthairchuideachta sealbhaíochta airgeadais AE nó máthairchuideachta sealbhaíochta airgeadais mheasctha AE i dtríú tír, ar choinníoll go bhfuil údarais mhaoirseachta an tríú tír faoi réir ceanglais rúndachta atá coibhéiseach leis na ceanglais a thagann faoi Chaibidil 1, Roinn II den Treoir seo agus i gcás inarb infheidhme, Airteagal 76 agus Airteagal 81 de Threoir 2014/65/AE.";

(b) cuirtear an fhomhír nua seo a leanas le mír 6:

"Féadfaidh an t-údarás inniúil sa Bhallstát ina bhfuil cuideachta sealbhaíochta airgeadais nó cuideachta sealbhaíochta airgeadais mheasctha bunaithe, ar cuideachta í a dearbhaíodh i gcomhréir le Airteagal 21a, a bheith rannpháirteach sa choláiste ábhartha maoirseoirí."

(28) In Airteagal 119, cuirtear an méid seo a leanas in ionad mhír 1:

"1. Faoi réir Airteagal 21a, glacfaidh na Ballstáit aon bhearta is gá chun na cuideachtaí sealbhaíochta airgeadais agus na cuideachtaí sealbhaíochta airgeadais mheasctha a chur faoi mhaoirseacht chomhdhlúite."

(29) In Airteagal 120, cuirtear an méid seo a leanas in ionad mhír 2:

"2. I gcás ina mbeidh cuideachta sealbhaíochta airgeadais mheasctha faoi réir forálacha coibhéiseacha faoin Treoir seo agus faoi Threoir 2009/138/CE, go háirithe i dtéarmaí maoirseachta rioscabhunaithe, féadfaidh an maoirseoir comhdhlúthaithe, le comhaontú mhaoirseoir an ghrúpa in earnáil an árachais, gan ach forálacha na Treorach maidir leis an earnáil airgeadais is mó tábhacht mar a shainmhínítear í in Airteagal 3(2) de Threoir 2002/87/CE a chur i bhfeidhm ar an gcuideachta sealbhaíochta airgeadais mheasctha sin."

(29a) Cuirtear an fhomhír nua seo a leanas isteach in Airteagal 125(1):

"I gcás, de bhun Airteagal 111, nach ionann an maoirseoir comhdhlúthaithe de chuid grúpa ina bhfuil máthairchuideachta sealbhaíochta airgeadais mheasctha agus an comhordaitheoir a cinneadh i gcomhréir le hAirteagal 10 de Threoir 2002/87/CE, comhoibreoidh an dá údarás chun críche chur i bhfeidhm na Treorach seo agus Rialachán (AE) Uimh. 575/2013 ar bhonn comhdhlúite. D'fhonn comhar éifeachtach a éascú agus a bhunú, beidh socruithe scríofa comhordaithe comhoibrithe i bhfeidhm ag an maoirseoir comhdhlúthaithe agus an comhordaitheoir."

(29b) In Airteagal 128, cuirtear an méid seo a leanas in ionad mhír 2:

"2. ciallaíonn 'caipiteal maolánach fritimthriallach institiúidsonrach' na cistí dílse a cheanglaítear ar institiúid a choinneáil i gcomhréir le hAirteagal 130;"

(29c) Cuirtear an méid seo a leanas in ionad Airteagal 129 agus Airteagal 130:

"Airteagal 129

Ceanglas maidir le caipiteal maolánach caomhantais a chothabháil

1. Cuirfidh na Ballstáit de cheangal ar institiúidí caipiteal maolánach caomhantais a choimeád de chaipiteal Gnáthchothromas Leibhéal 1 atá cothrom le 2.5 % de mhéid iomlán an riosca nach bhfuil cosaint acu air, ar riosca é arna ríomh i gcomhréir le hAirteagal 92(3) de Rialachán (AE) Uimh. 575/2013, ar bhonn aonair agus ar bhonn comhdhlúite, de réir mar is infheidhme i gcomhréir le Cuid a hAon, Teideal II den Rialachán sin, sa bhreis ar chaipiteal Gnáthchothromas Leibhéal 1 a choinnítear chun an ceanglas cistí dílse arna bhforchur ag pointí (a) go (c) d'Airteagal 92(1) den Rialachán sin.
2. De mhaolú ar mhír 1, féadfaidh Ballstát gnólachtaí infheistíochta beaga agus meánmhéide a dhíolmhú ó na ceanglais a leagtar amach sa mhír sin i gcás nach bagairt í díolúine den sórt sin ar chobhsaíocht an chórais airgeadais sa Bhallstát sin.

Cuimseofar sa chinneadh maidir le cur i bhfeidhm iomlán díolúine den sórt sin, míniú iomlán réasúnaithe i dtaobh cén fáth nach bagairt í an díolúine sin ar chobhsaíocht chórais airgeadais an Bhallstáit mar aon leis an sainmhíniú beacht ar cé hiad na gnólachtaí infheistíochta beaga agus meánmhéide atá díolmhaithe.

Déanfaidh na Ballstáit a chinneann díolúine den sórt sin a chur i bhfeidhm fógra a thabhairt do BERS. Cuirfidh BERS na fógraí sin ar aghaidh chuig an gCoimisiún, ÚBE agus údaráis inniúla ainmnithe na mBallstát lena mbaineann dá réir sin.

3. Chun críche mhír 2, ainmneoidh an Ballstát an t-údarás atá i gceannas ar an Airteagal seo a chur i bhfeidhm. Is é an t-údarás inniúil nó an t-údarás ainmnithe a bheidh san údarás sin.

4. Chun críche mhír 2, déanfar gnólachtaí infheistíochta a aicmiú mar ghnólachtaí beaga nó mar ghnólachtaí meánmhéide i gcomhréir le Moladh 2003/361/CE ón gCoimisiún an 6 Bealtaine 2003 maidir leis an sainmhíniú ar mhicreaghnóthais, ar ghnóthais bheaga agus mheánmhéide (1).
5. Ní bhainfidh institiúidí úsáid as caipiteal Gnáthchothromas Leibhéal 1, a choimeádtar d'fhonn an ceanglas faoi mhír 1 den Airteagal seo a chomhlíonadh, chun aon cheanglais a fhorchuirtear faoi Airteagal 104a, agus aon teoracha a fhorchuirtear faoi Airteagal 104b, a chomhlíonadh.
6. I gcás ina mainneoidh institiúid an ceanglas faoi mhír 1 den Airteagal seo a chomhlíonadh ina iomláine, beidh sí faoi réir na srianta ar dháileacháin a leagtar amach in Airteagal 141(2) agus (3).

Airteagal 130

Ceanglas maidir le caipiteal maolánach fritimthriallach institiúidsonrach a choimeád

1. Cuirfidh na Ballstáit de cheangal ar institiúidí caipiteal maolánach fritimthriallach institiúidsonrach a choimeád atá comhionann le méid iomlán na neamhchosaintí ar riosca arna ríomh i gcomhréir le hAirteagal 92(3) de Rialachán (AE) Uimh. 575/2013 arna iolrú faoi mheán ualaithe na rátaí maolánacha fritimthriallacha arna ríomh i gcomhréir le hAirteagal 140 den Treoir seo, ar bhonn aonair agus ar bhonn comhdhlúite, de réir mar is infheidhme i gcomhréir le Cuid a hAon, Teideal II den Rialachán sin.
2. De mhaolú ar mhír 1, féadfaidh Ballstát gnólachtaí infheistíochta beaga agus meánmhéide a dhíolmhú ó na ceanglais a leagtar amach sa mhír sin i gcás nach bagairt í díolúine den sórt sin ar chobhsaíocht an chórais airgeadais sa Bhallstát sin.

Cuimseofar sa chinneadh maidir le cur i bhfeidhm iomlán díolúine den sórt sin, míniú iomlán réasúnaithe i dtaobh cén fáth nach bagairt í an díolúine sin ar chobhsaíocht chóras airgeadais an Bhallstáit mar aon leis an sainmhíniú beacht ar cé hiad na gnólachtaí infheistíochta beaga agus meánmhéide atá díolmhaithe.

Déanfaidh na Ballstáit a chinneann díolúine den sórt sin a chur i bhfeidhm fógra a thabhairt do BERS. Cuirfidh BERS na fógraí sin ar aghaidh chuig an gCoimisiún, ÚBE agus údaráis inniúla agus údaráis ainmnithe na mBallstát lena mbaineann gan mhoill.

3. Chun críche mhír 2, ainmneoidh an Ballstát an t-údarás atá i gceannas ar an Airteagal seo a chur i bhfeidhm. Is é an t-údarás inniúil nó an t-údarás ainmnithe a bheidh san údarás sin.
4. Chun críche mhír 2, déanfar gnólachtaí infheistíochta a chatagóiriú mar ghnólachtaí beaga agus meánmhéide i gcomhréir le Moladh 2003/361/CE.
5. Comhlíonfaidh na hinstiúidí an ceanglas arna leagan ag mír 1 le caipiteal Gnáthchothromas Leibhéal 1, a bheidh sa bhreis ar aon chaipiteal Gnáthchothromas Leibhéal 1 a choimeádtar chun na ceanglais cistí dílse a chomhlíonadh a fhorchuirtear le pointe (a) go pointe (c) d'Airteagal 92(1) de Rialachán (AE) Uimh. 575/2013, an ceanglas maidir le caipiteal maolánach caomhantais a choimeád faoi Airteagal 129 den Treoir seo agus aon cheanglas a fhorchuirtear faoi Airteagal 104 den Treoir seo.
6. I gcás ina mainneoidh instiúid an ceanglas faoi mhír 1 den Airteagal seo a chomhlíonadh ina iomláine, beidh sí faoi réir na srianta ar dháileacháin a leagtar amach in Airteagal 141(2) agus (3)."

(30) Cuirtear an méid seo a leanas in ionad Airteagal 131:

"Airteagal 131

Institiúidí domhanda agus institiúidí eile a bhfuil tábhacht shistéamach leo

1. Ainmneoidh na Ballstáit an t-údarás atá i gceannas ar institiúidí a bhfuil tábhacht shistéamach dhomhanda leo (G-SIIanna) a shainaithint, ar bhonn comhdhlúite, agus, institiúidí eile a bhfuil tábhacht shistéamach leo san Aontas (O-SIIanna) a shainaithint ar bhonn aonair, fo-chomhdhlúite nó comhdhlúite, i gcás inarb infheidhme. Is é an t-údarás inniúil nó an t-údarás ainmnithe a bheidh san údarás sin. Féadfaidh na Ballstáit níos mó ná údarás amháin a ainmniú.

Beidh aon cheann díobh seo a leanas ina G-SIIanna:

- (a) grúpa a mbeidh máthairinstitiúid AE, máthairchuideachta sealbhaíochta airgeadais AE nó máthairchuideachta sealbhaíochta airgeadais mheasctha AE i gceannas air; nó
- (b) institiúid nach fochuideachta máthairinstitiúide AE, fochuideachta máthairchuideachta sealbhaíochta airgeadais AE ná fochuideachta máthairchuideachta sealbhaíochta airgeadais mheasctha AE í.

Féadfaidh O-SIIanna a bheith ina n-institiúid nó ina ngrúpa a bhfuil máthairinstitiúid creidmheasa AE, máthairchuideachta sealbhaíochta airgeadais AE nó máthairchuideachta sealbhaíochta airgeadais mheasctha AE, máthairinstitiúid i mBallstát, máthairchuideachta sealbhaíochta airgeadais i mBallstát nó máthairchuideachta sealbhaíochta airgeadais mheasctha i mBallstát, i gceannas orthu.

2. Is ar na catagóirí seo a leanas a bheidh modheolaíocht an tsainaitheantais do G-SIIanna bunaithe:

- (a) méid an ghrúpa;
- (b) idirnascthacht an ghrúpa leis an gcóras airgeadais;
- (c) inionadaitheacht na seirbhísí nó an bhonneagair airgeadais a chuireann an grúpa ar fáil;

- (d) castacht an ghrúpa;
- (e) gníomhaíocht trasteorann an ghrúpa, lena n-áirítear gníomhaíocht trasteorann idir na Ballstáit agus idir Ballstát agus tríú tír.

Beidh ualú comhionann ag gach catagóir agus beidh sé comhdhéanta de tháscairí inchainníochtúla.

Déanfaidh an mhodheolaíocht scór foriomlán a sholáthar do gach eintiteas dá dtagraítear i mír 1 ar a ndearnadh measúnú, rud a fhágann gur féidir G-SIIanna a shainaithint agus a leithdháileadh ar fhochatagóir mar a thuairiscítear i mír 9.

2a. Is ar na catagóirí seo a leanas a bheidh modheolaíocht an tsainaitheantais do G-SIIanna bunaithe:

- (a) na catagóirí dá dtagraítear i bpointí (a) go (d) de mhír 2;
- (b) gníomhaíocht trasteorann an ghrúpa, gan gníomhaíochtaí an ghrúpa ar fud na mBallstát rannpháirteach a áireamh mar a shainmhínítear in Airteagal 4 de Rialachán (AE) Uimh. 806/2014.

Beidh ualú comhionann ag gach catagóir agus beidh sé comhdhéanta de tháscairí inchainníochtúla. I gcás na gcatagóirí dá dtagraítear i bpointe (a) is ionann na táscairí agus na táscairí comhfhreagracha arna gcinneadh de bhun mhír 2.

Déanfaidh an mhodheolaíocht bhreise sainaitheantais scór foriomlán breise a sholáthar do gach eintiteas dá dtagraítear i mír 1 ar a ndearnadh measúnú, ar dá bhonn a fhéadfaidh údaráis inniúla nó údaráis ainmnithe ceann de na bearta a ghlacadh dá dtagraítear i bpointe (c) de mhír 10.

3. Sainaitheofar O-SIIanna i gcomhréir le mír 1. Déanfar tábhacht shistéamach a mheasúnú ar bhonn ceann amháin, ar a laghad, de na critéir seo a leanas:

- (a) méid;
- (b) tábhacht do gheilleagar an Aontais nó don Bhallstát ábhartha;
- (c) suntas na ngníomhaíochtaí trasteorann;
- (d) idirnascthacht na hinstiúide nó an ghrúpa leis an gcóras airgeadais.

Déanfaidh ÚBE, tar éis dó dul i gcomhairle le BERS, treoirlínte a fhoilsiú faoin 1 Eanáir 2015 maidir leis na critéir d'fhonn na coinníollacha a chinneadh chun an mhír seo a chur i bhfeidhm i dtaca le measúnú a dhéanamh ar O-SIIanna. Cuirfear san áireamh sna treoirlínte sin na creataí idirnáisiúnta d'institiúidí intíre a bhfuil tábhacht shistéamach leo agus sainiúlachtaí náisiúnta agus sainiúlachtaí an Aontais.

4. Déanfaidh gach G-SII, ar bhonn comhdhlúite, maolán G-SII a choimeád a chomhfhreagróidh don fhochatagóir ar a ndéantar G-SII a leithdháileadh. Caipiteal Gnáthchothromas Leibhéal 1 a bheidh sa mhaolán sin, ar caipiteal Gnáthchothromas Leibhéal 1 forlíontach é.
 5. Féadfaidh an t-údarás inniúil nó an t-údarás ainmnithe a cheangal ar gach O-SII, ar bhonn comhdhlúite, ar bhonn fo-chomhdhlúite nó ar bhonn aonair, de réir mar is infheidhme, maolán O-SII suas le 3 % a choimeád de mhéid iomlán na neamhchosanta ar riosca arna ríomh i gcomhréir le hAirteagal 92(3) de Rialachán (AE) Uimh. 575/2013, agus na critéir maidir le sainaitheint O-SII á gcur san áireamh. Caipiteal Gnáthchothromas Leibhéal 1 a bheidh sa mhaolán sin.
- "5a. Faoi réir údarú an Choimisiúin mar a thuairiscítear thíos, féadfaidh an t-údarás inniúil nó an t-údarás ainmnithe a cheangal ar gach O-SII, ar bhonn comhdhlúite, ar bhonn fo-chomhdhlúite nó ar bhonn aonair, de réir mar is infheidhme, maolán O-SII os cionn 3 % a choimeád de mhéid iomlán na neamhchosanta ar riosca arna ríomh i gcomhréir le hAirteagal 92(3) Rialachán (AE) Uimh. 575/2013. Caipiteal Gnáthchothromas Leibhéal 1 a bheidh sa mhaolán sin.

Laistigh de mhí amháin tar éis an fhógra dá dtagraítear i mír 7, tabharfaidh BERS tuairim don Choimisiún cibé acu a mheastar gur iomchuí nó nach iomchuí maolán O-SII. Ina theannta sin, féadfaidh ÚEB a thuairim faoin maolán a thabhairt don Choimisiún i gcomhréir le hAirteagal 34(1) de Rialachán (AE) Uimh. 1093/2010.

Laistigh de dhá mhí tar éis dó tuairim BERS a fháil, glacfaidh an Coimisiún gníomh cur chun feidhme lena n-údaráítear an t-údarás inniúil nó an t-údarás ainmnithe an beart atá beartaithe a ghlacadh, agus measúnú BERS agus ÚBE á gcur san áireamh, más ábhartha, agus má tá sé sásta nach bhfuil éifeachtaí díobhálacha i gceist le maolán O-SII do chóras airgeadais i bpáirt nó ina iomláine de Bhallstáit eile nó de chuid an Aontais ina iomláine ina bhfoirmeoidh nó ina gcruthóidh sé constaic i gcoinne fheidhmiú cheart an mhargaidh inmheánaigh.

6. Agus é á chur de cheangal maolán O-SII a choimeád comhlíonfaidh an t-údarás inniúil nó an t-údarás ainmnithe an méid seo a leanas:

(a) ní bheidh éifeachtaí díobhálacha díréireacha i gceist le maolán O-SII do chóras airgeadais i bpáirt nó ina iomláine de Bhallstáit eile nó de chuid an Aontais ina iomláine ina bhfoirmeoidh nó ina gcruthóidh sé constaic i gcoinne fheidhmiú an mhargaidh inmheánaigh;

(b) ní mór go ndéanfaidh an t-údarás inniúil nó an t-údarás ainmnithe maolán O-SII a athbhreithniú ar a laghad uair sa bhliain.

7. Sula ndéantar maolán O-SII a shocrú nó a athshocrú, tabharfaidh an t-údarás inniúil nó an t-údarás ainmnithe fógra do BERS mí amháin roimh fhoilsiú an chinnidh dá dtagraítear i mír 5 agus tabharfaidh sé fógra do BERS trí mhí roimh fhoilsiú chinneadh an údaráis inniúil nó an údaráis ainmnithe dá dtagraítear i mír 5a. Cuirfidh BERS na fógraí sin ar aghaidh chuig an gCoimisiún, ÚBE agus údaráis inniúla agus údaráis ainmnithe na mBallstát gan mhoill. Tabharfaidh an fógra sin tuairisc mhionsonraithe ar an méid seo a leanas:

- (a) an bonn cirt lena meastar gur dócha go mbeidh maolán O-SII éifeachtach agus comhréireach chun an riosca a mhaolú;
- (b) measúnú ar thionchar dóchúil dearfach nó diúltach mhaolán O-SII ar an margadh inmheánach bunaithe ar fhaisnéis atá ar fáil don Bhallstát;
- (c) ráta maolánach O-SII is mian leis an mBallstát a shocrú.

8. Gan dochar d'Airteagal 133 agus do mhír 5 den Airteagal seo, i gcás inar fochuideachta de G-SII nó de O-SII é O-SII, ar institiúid nó grúpa é ar a bhfuil máthairinstitiúid AE i gceannas, agus atá faoi réir mhaolán O-SII ar bhonn comhdhlúite, ní bheidh an maolán a bhfuil feidhm aige ar an leibhéal aonair nó ar an leibhéal fo-chomhdhlúite maidir le O-SII níos mó ná pé acu is lú:

- (a) suim an ráta mhaolánaigh is airde i gcás G-SII nó O-SII i dtaca leis an ráta maolánach is infheidhme maidir leis an ngrúpa ar an leibhéal comhdhlúite agus 1 % de mhéid iomlán na neamhchosanta ar riosca arna ríomh i gcomhréir le hAirteagal 92(3) de Rialachán (AE) Uimh. 575/2013; agus
- (b) 3% de mhéid iomlán na neamhchosanta ar riosca arna ríomh i gcomhréir le hAirteagal 92(3) de Rialachán (AE) Uimh. 575/2013, nó an ráta a d'údaraigh an Coimisiún le cur i bhfeidhm ar an ngrúpa ar an leibhéal comhdhlúite i gcomhréir le mír 5a.

9. Beidh ar a laghad cúig fhochatagóir de G-SIIanna ann. Déanfar an teorainn is ísle agus na teorainneacha idir gach fochatagóir a chinneadh ar bhonn na scór faoi mhodheolaíocht an tsainaitheantais dá dtagraítear i mír 2. Déanfar na scoithscóir idir fochatagóirí cóngaracha a shainmhíniú go soiléir agus cloífidh siad leis an bprionsabal go bhfuil síormhéadú líneach ann lena mbaineann tábhacht chórasach, idir gach fochatagóir as a dtiocfaidh méadú líneach ar an gceanglas maidir le caipiteal breise Ghnáthchothromas Leibhéal 1, cé is moite den fhochatagóir is airde. Chun críocha na míre seo, is í tábhacht shistéamach an tionchar a mheastar a bheidh ag anás G-SII ar an margadh airgeadais domhanda. Sannfar maolán G-SII 1 % de mhéid iomlán na neamhchosanta riosca arna ríomh i gcomhréir le hAirteagal 92(3) de Rialachán (AE) Uimh. 575/2013 ar an bhfochatagóir is ísle agus déanfar an maolán a shanntar ar gach fochatagóir a mhéadú 0,5 % grádán ar a laghad de mhéid iomlán na neamhchosanta ar riosca arna ríomh i gcomhréir le hAirteagal 92(3) de Rialachán (AE) Uimh. 575/2013.
10. Gan dochar do mhír 1 agus do mhír 9, agus é ag úsáid na bhfochatagóirí agus na scoithscór dá dtagraítear i mír 9, agus breithiúnas iontaofa maoirseachta á thabhairt aige, féadfaidh an t-údarás inniúil nó an t-údarás ainmnithe an méid seo a leanas a dhéanamh:
- (a) G-SII a athdháileadh ó fhochatagóir níos ísle go fochatagóir níos airde;
 - (b) eintiteas dá dtagraítear i mír 1 ag a bhfuil scór foriomlán dá dtagraítear i mír 2 atá níos ísle ná scoithscór na fochatagóire is ísle a leithdháileadh ar an bhfochatagóir sin nó ar fhochatagóir níos airde, rud a fhágann go ndéanfar é a ainmniú mar G-SII.

(c) an Sásra Réitigh Aonair á chur san áireamh, ar bhonn an scóir fhoriomláin breise dá dtagraítear i mír 2a:

(i) G-SII a athdháileadh ó fhochatagóir níos airde go fochatagóir níos ísle, nó

(ii) maolán G-SII a shannadh atá níos ísle ná 1% den neamhchosaint iomlán ar riosca arna ríomh i gcomhréir le hAirteagal 92(3) de Rialachán (AE) Uimh. 575/2013, fad is go bhfuil an scór breise foriomlán níos ísle ná scoithscór na fochatagóire is ísle.

11. [] .

12. Tabharfaidh an t-údarás inniúil nó an t-údarás ainmnithe fógra do BERS, ina bhfuil ainmneacha G-SIIanna agus O-SIIanna agus na fochatagóire ar a leithdháiltear gach G-SII faoi seach. Beidh san fhógra na cúiseanna iomlána a bhfuil breithiúnas maoirseachta á thabhairt nó nach bhfuil sé i gcomhréir le mír 10, pointe a, pointe b agus pointe c. Cuirfidh BERS na fógraí ar aghaidh chuig an gCoimisiún agus ÚBE gan mhoill, agus cuirfidh sé na hainmneacha sin ar fáil don phobal. Cuirfidh na húdaráis inniúla nó na húdaráis ainmnithe an fhochatagóir ar a leithdháiltear gach G-SII ar fáil don phobal.

Déanfaidh an t-údarás inniúil nó an t-údarás ainmnithe sainathint G-SIIanna agus O-SIIanna agus leithdháileadh G-SII ar na fochatagóirí faoi seach a athbhreithniú uair sa bhliain, agus tuairisceoidh sé an toradh don institiúid lena mbaineann a bhfuil tábhacht shistéamach léi, do BERS a chuirfidh na torthaí ar aghaidh chuig an gCoimisiún agus chuig ÚEB gan mhoill. Cuirfidh an t-údarás inniúil nó an t-údarás ainmnithe an liosta nuashonraithe de na hinstitiúidí arna sainathint a bhfuil tábhacht shistéamach leo ar fáil don phobal agus an fhochatagóir ar a leithdháiltear gach G-SII arna shainaithint.

13. Ní úsáidfidh institiúidí a bhfuil tábhacht shistéamach leo caipiteal Ghnáthchothromas Leibhéal 1 a choimeádtar chun na ceanglais faoi mhír 4 agus faoi mhír 5 a chomhlíonadh chun aon cheann de na ceanglais a chomhlíonadh a fhorchuirtear faoi phointe (a) go pointe (c) d'Airteagal 92(1) de Rialachán (AE) Uimh. 575/2013 agus Airteagail 104a, 129, 130, 133 agus 134 den Treoir seo agus aon treoracha a fhorchuirtear faoi Airteagail 104b den Treoir seo.
14. I gcás ina bhfuil grúpa, ar bhonn comhdhlúite, faoi réir mhaolán G-SII agus mhaolán O-SII, beidh feidhm ag an maolán atá níos airde.
15. I gcás ina bhfuil institiúid faoi réir maolán um riosca sistéamach, arna shocrú i gcomhréir le hAirteagal 133, déanfar é sin a chnardh le maolán O-SII nó G-SII a chuirtear i bhfeidhm i gcomhréir leis an Airteagal seo.

I gcás inar mhó suim an ráta mhaolánaigh um riosca sistéamach arna ríomh chun críocha mhír 12, mhír 13 nó mhír 14 d'Airteagal 133 den Treoir seo agus an ráta maolánach O-SII nó ráta maolánach G-SII a bhfuil an institiúid chéanna faoina réir, ná 5%, beidh feidhm ag an nós imeachta a leagtar amach i mír 5a.

16. ☐
17. I gcás institiúide atá mar chuid de ghrúpa nó d'fhoghrúpa lena mbaineann G-SII nó O-SII, ní thabharfaidh sé sin le tuiscint choíche go bhfuil an institiúid sin, ar bhonn aonair, faoi réir comhcheanglas maoláin atá níos ísle ná suim an chaipitil mhaolánaigh caomhantais, an chúlchiste fhritimthriallaigh, agus suim mhaolán O-SII agus an mhaoláin um riosca sistéamach is infheidhme ar bhonn aonair.

18. Déanfaidh ÚBE dréachtchaighdeáin theicniúla rialála a fhorbairt, chun críocha an Airteagail seo, leis na modheolaíochtaí a shonrú faoina ndéanfaidh an t-údarás inniúil nó an t-údarás ainmnithe institiúid nó grúpa a shainaitheint mar G-SII ar a bhfuil máthairinstitiúid AE, máthairchuideachta sealbhaíochta airgeadais AE nó máthairchuideachta sealbhaíochta airgeadais mheasctha AE i gceannas, agus leis an modheolaíocht a shonrú maidir leis an sainmhíniú ar na focchatagóirí agus maidir le leithdháileadh G-SIIanna i bhfocchatagóirí bunaithe ar an tábhacht shistéamach a bhaineann leo, agus aon chaighdeáin a comhaontaíodh go hidirnáisiúnta á gcur san áireamh. Cuirfidh ÚBE na dréachtchaighdeáin theicniúla rialála sin faoi bhráid an Choimisiúin faoin 30 Meitheamh 2014.

Tarmligtear an chumhacht chuig an gCoimisiún chun na caighdeáin theicniúla rialála dá dtagraítear sa chéad fhomhír agus sa dara fhomhír a ghlacadh i gcomhréir le hAirteagal 10 go hAirteagal 14 de Rialachán (AE) Uimh. 1093/2010."

(30a) Cuirtear an méid seo a leanas in ionad Airteagal 133 agus Airteagal 134:

"Airteagal 133

Ceanglas maidir le maolán um riosca sistéamach a choimeád

1. Féadfaidh gach Ballstát maolán um riosca sistéamach maidir le caipiteal Gháthchothromas Leibhéal 1 don earnáil airgeadais nó i dtaca le fothacar amháin nó níos mó den earnáil sin maidir le gach neamhchosaint nó le fothacar neamhchosaintí dá dtagraítear i mír 8 a thabhairt isteach, d'fhonn rioscaí sistéamacha nó macrastuamachta nach gcumhdaítear le Rialachán (AE) Uimh. 575/2013 ná le hAirteagal 131 na Treorach seo a sheachaint agus a mhaolú, sa chiall gur rioscaí iad a chuirfeadh isteach ar an gcóras airgeadais ag a mbeadh iarmhairtí tromchúiseacha diúltacha ar an gcóras airgeadais agus ar an bhfíorgheilleagar i mBallstát sonrach.

1a. Ríomhfaidh na hinstitiúidí an maolán um riosca sistéamach ('B_{SR}') mar seo a leanas:

$$B_{SR} = r^T \cdot E^T + \sum_i r^i \cdot E^i$$

i gcás:

i = an t-innéacs lena gcuirtear fothacar neamhchosaintí in iúl mar a shainmhínítear i mír 8;

r^T = an ráta maolánach is infheidhme maidir le méid iomlán na neamhchosanta ar riosca d'institiúid;

E^T = méid iomlán na neamhchosanta ar riosca d'institiúid arna ríomh i gcomhréir le hAirteagal 92(3) de Rialachán (AE) Uimh. 575/2013;

r^i = an ráta maolánach is infheidhme i dtaca le méid na neamhchosanta ar riosca maidir le neamhchosaintí i , dá dtagraítear i mír 8;

E^i = méid na neamhchosanta ar riosca d'institiúid maidir le fothacar neamhchosaintí i , arna ríomh i gcomhréir le hAirteagal 92(3) de Rialachán (AE) Uimh. 575/2013.

2. Chun críocha mhír 1, ainmneoidh an Ballstát an t-údarás a bheidh i gceannas ar an maolán um riosca sistéamach a bhunú agus ar neamhchosaintí agus fothacair na n-institiúidí a mbeidh feidhm aige ina leith a shainaithint. Is é an t-údarás inniúil nó an t-údarás ainmnithe a bheidh san údarás sin a ainmneofar.
3. Chun críocha mhír 1, féadfaidh an t-údarás inniúil nó an t-údarás ainmnithe, de réir mar is infheidhme, a cheangal ar na h-institiúidí caipiteal a choimeád, a bheidh sa bhreis ar an gcaipiteal Ghnáthchothromas Leibhéal 1 atá acu chun an ceanglas maidir le cistí dílse a fhorchuirtear le pointe (a) go pointe (c) d'Airteagal 92(1) de Rialachán (AE) Uimh. 575/2013 a chomhlíonadh, maolán um riosca sistéamach maidir le caipiteal Ghnáthchothromas Leibhéal 1 arna ríomh i gcomhréir le mír 1a, ar bhonn aonair, comhdhlúite, nó fo-chomhdhlúite, de réir mar is infheidhme i gcomhréir le Cuid a hAon, Teideal II den Rialachán sin. 4.

Ní úsáidfídh institiúidí caipiteal Ghnáthchothromas Leibhéal 1 a choimeádtar chun an ceanglas faoi mhír 3 a chomhlíonadh, chun aon cheann de na ceanglais a chomhlíonadh a fhorchuirtear faoi phointe (a) go pointe (c) d'Airteagal 92(1) de Rialachán (AE) Uimh. 575/2013 agus Airteagail 104a, 129 agus, 130 agus 131 den Treoir seo agus aon teoracha a fhorchuirtear faoi Airteagal 104b den Treoir seo.

5. ☐
6. I gcás institiúide atá mar chuid de ghrúpa nó d'fhoghrúpa lena mbaineann G-SII nó O-SII, ní thabharfaidh sé sin le tuiscint choíche go bhfuil an institiúid sin, ar bhonn aonair, faoi réir comhcheanglas maoláin atá níos ísle ná suim an chaipitil mhaolánaigh caomhantais, an chúlchiste fhritimthriallaigh, mhaolán O-SII agus an mhaoláin um riosca sistéamach is infheidhme ar bhonn aonair.
7. ☐
8. Féadfaidh go mbeidh feidhm ag maolán um riosca sistéamach ar an méid seo a leanas:
 - (a) gach neamhchosaint atá lonnaithe sa Bhallstát a shocraíonn an maolán sin;

- (b) na neamhchosaintí eárnála seo a leanas sa Bhallstát a shocraíonn an maolán sin:
 - (i) gach neamhchosaint mhiondíola ar dhaoine nádúrtha arna hurrú le réadmhaoín chónaithe;
 - (ii) gach neamhchosaint ar dhaoine dlítheanacha arna hurrú le morgáistí ar réadmhaoín tráchtála dhochorraithe;
 - (iii) gach neamhchosaint ar dhaoine dlítheanacha cé is moite díobh siúd a shonraítear i bpointe (ii);
 - (iv) gach neamhchosaint ar dhaoine nádúrtha cé is moite díobh siúd a shonraítear i bpointe (i).
- (c) gach neamhchosaint atá lonnaithe i mBallstáit eile, faoi réir mhír 14 agus mhír 17;
- (d) neamhchosaintí eárnála, mar a shainítear i bpointe (b) iad, atá lonnaithe i mBallstáit eile amháin lena bhféadfar aitheantas a thabhairt do ráta maolánach arna shocrú ag Ballstát eile i gcomhréir le hAirteagal 134;
- (e) neamhchosaintí i dtríú tíortha;
- (f) fo-earnálacha d'aon cheann de na catagóirí neamhchosaintí a aithnítear i bpointe (b) den mhír seo.

- 8a. Tar éis dó dul i gcomhairle le BERS, foilseoidh ÚBE treoirlínte faoin [30 Meitheamh 2020] maidir leis na fo-earnálacha iomchuí neamhchosaintí ar ar féidir leis an údarás inniúil nó an t-údarás ainmnithe maolán um riosca sistéamach a chur i bhfeidhm i gcomhréir le mír 8, pointe (f).
9. Beidh feidhm ag maolán um riosca sistéamach maidir le gach neamhchosaint, nó fothacar neamhchosaintí dá dtagraítear i mír 8, de na hinstiúidí go léir, nó ceann amháin nó níos mó d'fhothacair na n-instiúidí sin, ar a bhfuil na húdaráis den Bhallstát lena mbaineann inniúil i gcomhréir leis an Treoir seo agus socraítear é de réir céimeanna coigeartaithe, bíodh siad diaidh ar ndiaidh nó luathaithe, de phointe céatadán 0,5. Féadfar ceanglais éagsúla a thabhairt isteach i gcomhair fothacair éagsúla instiúidí agus neamhchosaintí.

10. Agus é á chur de cheangal maolán um riosca sistéamach a choimeád comhlíonfaidh an t-údarás inniúil nó an t-údarás ainmnithe an méid seo a leanas:
- (a) ní bheidh éifeachtaí díobhálacha díréireacha i gceist leis an maolán um riosca sistéamach do chóras airgeadais Ballstát eile i bpáirt nó ina iomláine nó do chóras airgeadais Ballstát de chuid an Aontais ina iomláine ina bhfoirmeoidh nó ina gcruthóidh sé constaic i gcoinne fheidhmiú an mhargaidh inmheánaigh;
 - (b) ní mór go ndéanfaidh an t-údarás inniúil nó an t-údarás ainmnithe an maolán um riosca sistéamach a athbhreithniú ar a laghad gach re bliain.
 - (c) ní thabharfaidh an maolán um riosca sistéamach aghaidh ar na rioscaí a chumhdaítear leis an gcreat a leagtar amach in Airteagal 131.
11. Tabharfaidh an t-údarás inniúil nó an t-údarás ainmnithe, mar is infheidhme, fógra do BERS mí amháin roimh fhoilsiú an chinnidh dá dtagraítear i mír 15. Cuirfidh BERS na fógraí sin ar aghaidh chuig an gCoimisiún, ÚBE agus údarais inniúla agus údarais ainmnithe na mBallstát lena mbaineann gan mhoill. I gcás ina mbeidh feidhm ag ráta maolánach um riosca sistéamach maidir le neamhchosaintí atá lonnaithe i dtríú tíortha, tabharfaidh an t-údarás inniúil nó an t-údarás ainmnithe, de réir mar is infheidhme, fógra do BERS agus cuirfidh BERS an fógra sin ar aghaidh chuig údarais mhaoirseachta na dtríú tíortha sin. Tabharfaidh an fógra tuairisc mhionsonraithe ar an méid seo a leanas:
- (a) an riosca sistéamach nó an riosca macrastuamachta sa Bhallstát;
 - (b) na cúiseanna le méid na rioscaí sistéamacha nó macrastuamachta a bheith ina mbagairt ar chobhsaíocht an chórais airgeadais ar an leibhéal náisiúnta lena dtugtar bonn cirt leis an ráta maolánach um riosca sistéamach;
 - (c) an bonn cirt lena meastar gur dóigh go mbeidh an maolán um riosca sistéamach éifeachtach comhréireach chun an riosca a mhaolú;

- (d) measúnú ar thionchar dóchúil dearfach nó diúltach an mhaoláin um riosca sistéamach ar an margadh inmheánach, bunaithe ar fhaisnéis atá ar fáil don Bhallstát;
- (e) an bonn cirt lena meastar nach leor an beart atá ann faoi Airteagal 130 chun aghaidh a thabhairt ar an riosca sistéamach nó ar an riosca macrastuamachta a sainaithníodh agus éifeachtacht choibhneasta an bhirt sin á cur san áireamh;
- (f) an ráta nó na rátaí maolánacha um riosca sistéamach is mian leis an údarás inniúil nó leis an údarás ainmnithe, de réir mar is infheidhme, a fháil agus na neamhchosaintí a bhfuil feidhm ag an ráta nó ag na rátaí ina leith agus na hinstitiúidí atá faoi réir na gceanglas i ndáil le ráta nó rátaí;
- (g) i gcás ina bhfuil feidhm ag an ráta maolánach um riosca sistéamach maidir le gach neamhchosaint, beidh bonn cirt leis an bhfáth a bhfuil an t-údarás den tuairim nach dúbláil é maolán um riosca sistéamach ar fheidhmiú mhaolán O-SII dá bhforáiltear in Airteagal 131 den Treoir seo.

12. I gcás nach bhforchuirtear, le socrú nó athshocrú ráta nó rátaí maolánacha um riosca sistéamach, ráta maolánach um riosca comhcheangailte sistéamach atá os cionn 3% d'aon cheann de na neamhchosaintí sin, ar aon cheann de na catagóirí neamhchosanta a liostaítear i mír 8 atá faoi réir an ráta mhaolánaigh um riosca sistéamach, leanfaidh an t-údarás inniúil nó an t-údarás ainmnithe de réir mar is infheidhme, an nós imeachta a leagtar síos i mír 11 chun fógra a thabhairt do BERS mí amháin roimh fhoilsiú an chinnidh dá dtagraítear i mír 15.

Chun críocha na míre seo, ní chuirfear san áireamh sa tairseach 3% an t-aitheantas a thugtar do ráta maolánach um riosca sistéamach arna shocrú ag Ballstát eile i gcomhréir le hAirteagal 134.

13. I gcás ina n-eascaíonn ráta maolánach um riosca comhcheangailte sistéamach atá ar leibhéal idir 3 % agus 5 % maidir le haon cheann de na neamhchosaintí sin, as socrú nó athshocrú ráta nó rátaí maolánacha um riosca sistéamach i dtaca le haon cheann de na catagóirí neamhchosanta a liostaítear i mír 8 faoi réir an mhaoláin um riosca sistéamach, iarrfaidh údarás inniúil nó údarás ainmnithe an Bhallstáit a shocraíonn an maolán sin tuairim an Choimisiúin. Tabharfaidh an Coimisiún a thuairim laistigh de mhí amháin tar éis di an iarraidh a fháil. Más tuairim dhiúltach í an tuairim a fhaightear ón gCoimisiún, déanfaidh údarás inniúil nó údarás ainmnithe, de réir mar is infheidhme, an Bhallstáit a shocraíonn an maolán sin an tuairim a chomhlíonadh nó cúiseanna a thabhairt gan déanamh amhlaidh. I gcás gur fochuideachta a bhfuil a máthairghnóthas lonnaithe i mBallstát eile í an institiúid a bhfuil feidhm ag ráta maolánach um riosca sistéamach amháin nó níos mó ina leith, tabharfaidh an t-údarás inniúil nó an t-údarás ainmnithe fógra d'údaráis an Bhallstáit sin, don Choimisiún agus do BERS.

Laistigh de mhí amháin tar éis dó an fógra a fháil, eiseoidh an Coimisiún agus BERS moladh maidir leis na bearta a glacadh i gcomhréir leis an mír seo.

I gcás nach n-aontaíonn údaráis na fochuideachta agus na máthairchuideachta faoin ráta nó na rátaí maolánacha um riosca sistéamach is infheidhme i leith na hinstitiúide sin agus i gcás moladh diúltach a fháil ón gCoimisiún agus ó BERS, féadfaidh an t-údarás inniúil nó an t-údarás ainmnithe, de réir mar is infheidhme, an t-ábhar a chuir faoi bhráid ÚBE agus a chúnaimh a lorg i gcomhréir le hAirteagal 19 de Rialachán (AE) Uimh. 1093/2010. Cuirfear an cinneadh ráta nó rátaí maolánacha um riosca sistéamach a shocrú maidir leis na neamhchosaintí sin ar fionraí go dtí go mbeidh cinneadh glactha ag ÚBE.

I gcás ina gciallaíonn an cinneadh ceann amháin nó níos mó de na rátaí maolánacha um riosca sistéamach a shocrú go dtiocfaidh laghdú ar an ráta nó na rátaí maolánacha a socraíodh roimhe sin nó nach dtiocfaidh aon athrú orthu sin, ní dhéanfaidh an t-údarás inniúil ná an t-údarás ainmnithe, de réir mar is infheidhme, ach na nósanna imeachta a leagtar amach i mír 11 a chomhlíonadh.

14. I gcás ina n-eascraíonn ráta maolánach um riosca comhcheangailte sistéamach atá os cionn 5 % maidir le haon cheann de na neamhchosaintí sin as socrú nó athshocrú ráta nó rátaí maolánacha um riosca sistéamach i dtaca le haon cheann de na catagóirí neamhchosanta a liostaítear i mír 8, féachfaidh an t-údarás inniúil nó an t-údarás ainmnithe, de réir mar is infheidhme, le húdarú a fháil ón gCoimisiún sula ndéanfar maolán um riosca sistéamach a chur chun feidhme. Laistigh de mhí amháin tar éis an fhógra dá dtagraítear i mír 11, tabharfaidh BERS tuairim don Choimisiún cé acu a mheastar gur iomchuí nó nach iomchuí an ráta nó na rátaí maolánacha um riosca sistéamach. Ina theannta sin, féadfaidh ÚBE a thuairim faoin ráta nó na rátaí maolánacha sin a thabhairt don Choimisiún i gcomhréir le hAirteagal 34(1) de Rialachán (AE) Uimh. 1093/2010.

Laistigh de dhá mhí tar éis dó tuairim BERS a fháil, glacfaidh an Coimisiún gníomh cur chun feidhme lena n-údaraítear an t-údarás inniúil nó an t-údarás ainmnithe, de réir mar is infheidhme, an beart atá beartaithe a ghlacadh, agus measúnú BERS agus ÚBE á gcur san áireamh, más ábhartha, agus má tá sé sásta nach bhfuil éifeachtaí díobhálacha i gceist le ráta nó rátaí maolánacha um riosca sistéamach do chóras airgeadais Ballstát eile i bpáirt nó ina iomláine nó do chóras airgeadais Ballstáit de chuid an Aontais ina iomláine ina bhfoirmeoidh nó ina gcruthóidh sé constaic i gcoinne dhea-fheidhmiú an mhargaidh inmheánaigh.

I gcás ina gciallaíonn an cinneadh an ráta maolánach um riosca sistéamach a shocrú go mbeidh laghdú nó nach mbeidh aon athrú ar an ráta maolánach a socraíodh roimhe sin, ní dhéanfaidh, an t-údarás inniúil ná an t-údarás ainmnithe, de réir mar is infheidhme, ach na nósanna imeachta a leagtar amach i mír 11 a chomhlíonadh.

15. Tabharfaidh gach údarás inniúil nó údarás ainmnithe, de réir mar is infheidhme, fógra maidir le socrú nó athshocrú ceann amháin nó níos mó de na rátaí maolánacha um riosca sistéamach trína fhoilsiú ar an suíomh gréasáin iomchuí. Beidh an méid seo a leanas ar a laghad san fhógra:
- (a) an ráta nó na rátaí maolánacha um riosca sistéamach;
 - (b) na hinstitiúidí lena mbaineann an maolán um riosca sistéamach;
 - (b1) na neamhchosaintí lena mbaineann an ráta nó na rátaí maolánacha um riosca sistéamach;
 - (c) bonn cirt leis an ráta nó na rátaí maolánacha um riosca sistéamach a shocrú nó a athshocrú;
 - (d) an dáta óna mbeidh ar na hinstitiúidí an maolán um riosca sistéamach a shocrú nó a athshocrú; agus
 - (e) ainmneacha na dtíortha ina dtugtar aitheantas sa mhaolán um riosca sistéamach do na neamhchosaintí atá lonnaithe sna tíortha sin.

I gcás ina bhféadfaidh an foilseachán dá dtagraítear i bpointe (c) cobhsaíocht an chórais airgeadais a chur i mbaol, ní chuirtear an fhaisnéis faoi phointe (c) san áireamh san fhógra.

16. I gcás ina mainneoidh institiúid an ceanglas faoi mhír 1 den Airteagal seo a chomhlíonadh ina iomláine, beidh sí faoi réir na srianta ar dháileacháin a leagtar amach in Airteagal 141(2) agus (3).

Más rud é go bhfágann cur chun feidhme na srianta sin ar dháileacháin nach sásúil an dul chun cinn a dhéantar i dtaobh Chaipiteal Ghnáthchothromas Leibhéal 1 de chuid na hinstitiúide, i bhfianaise an riosca ábhartha shistéamaigh, féadfaidh na húdaráis inniúla bearta breise a ghlacadh i gcomhréir le hAirteagal 64.

17. I gcás ina gcinneann an t-údarás inniúil nó an t-údarás ainmnithe, de réir mar is infheidhme, an maolán a shocrú ar bhonn na neamhchosaintí i mBallstáit eile, déanfar an maolán a shocrú go cothrom maidir le gach neamhchosaint atá lonnaithe laistigh den Aontas, ach amháin más rud é go bhfuil an maolán socraithe chun an ráta maolánach um riosca sistéamach arna shocrú ag Ballstát eile a shainaithint i gcomhréir le hAirteagal 134.

Airteagal 134

Aitheantas do ráta maolánach um riosca sistéamach

- 1 Féadfaidh Ballstáit eile aitheantas a thabhairt do ráta maolánach um riosca sistéamach arna shocrú i gcomhréir le hAirteagal 133 agus féadfaidh siad an ráta maolánach sin a chur i bhfeidhm maidir le hinstitiúidí údaraithe ar bhonn intíre i dtaca leis na neamhchosaintí atá lonnaithe sa Bhallstát ina socraítear an ráta maolánach sin.
2. I gcás ina dtugann na Ballstáit aitheantas do ráta maolánach um riosca sistéamach i gcomhair institiúidí údaraithe ar bhonn intíre, tabharfar fógra do BERS. Cuirfidh BERS na fógraí sin ar aghaidh chuig an gCoimisiún, chuig ÚBE agus chuig an mBallstát lena socraítear an ráta maolánach um riosca sistéamach sin gan mhoill.
3. Agus cinneadh á dhéanamh maidir le ráta maolánach um riosca sistéamach a aithint, cuirfidh an Ballstát san áireamh an fhaisnéis a thíolaic an Ballstát a shocraíonn an ráta maolánach i gcomhréir le hAirteagal 133(11), (12) nó (13).
- 3a. I gcás ina n-aithníonn na Ballstáit ráta maolánach um riosca sistéamach i gcomhair institiúidí atá údaraithe ar bhonn intíre, féadfaidh an maolán um riosca sistéamach agus an maolán um riosca sistéamach a cuireadh i bhfeidhm i gcomhréir le hAirteagal 133 a charnadh faoi réir an choinníll go dtugtar aghaidh ar rioscaí éagsúla leis na maoláin sin. I gcás ina dtugtar aghaidh leis na maoláin ar na rioscaí céanna, ní bheidh feidhm ach ag an maolán is airde.

4. Féadfaidh Ballstát a shocraíonn ráta maolánach um riosca sistéamach i gcomhréir le hAirteagal 133 iarraidh ar BERS moladh a eisiúint dá dtagraítear in Airteagal 16 de Rialachán (AE) Uimh. 1092/2010 do Bhallstát amháin nó níos mó a fhéadfaidh an ráta maolánach um riosca sistéamach a aithint."

(30b) Cuirtear an méid seo a leanas in ionad Airteagal 136:

"Airteagal 136

Rátaí fritimthriallacha maolánacha a shocrú

1. Ainmneoidh gach Ballstát údarás nó comhlacht poiblí ("údarás ainmnithe") a bheidh freagrach as an ráta fritimthriallach maolánach a shocrú don Bhallstát sin.
2. Déanfaidh gach údarás ainmnithe treoir maidir le maolán do gach ráithe a ríomh a bheidh mar thagairt aige agus breithiúnas á thabhairt aige maidir leis an ráta fritimthriallach maolánach a shocrú i gcomhréir le mír 3. Léireoidh an treoir a thugtar maidir le maolán, ar bhealach ciallmhar, an timthriall creidmheasa agus na rioscaí mar gheall ar fharasbarr an fháis creidmheasa sa Bhallstát agus cuirfear sainiúlachtaí an gheilleagair náisiúnta san áireamh. Beidh sí bunaithe ar chlaonadh cóimheasa creidmheas-go-OTI, óna threocht fhadtéarmach, lena gcuirtear san áireamh, *inter alia*:
 - (a) táscaire ar leibhéil fáis an chreidmheasa laistigh den dlínse sin agus, go háirithe, táscaire lena léirítear na hathruithe ar an gcóimheas creidmheasa a tugadh do OTI sa Bhallstát sin;
 - (b) aon treoir a leanann BERS faoi láthair i gcomhréir le hAirteagal 135(1)(b).

3. Déanfaidh gach údarás ainmnithe measúnú ar a iomchuí atá an ráta frithimthriallach maolánach dá Bhallstát gach ráithe agus an ráta maolánach a shocrú nó a choigeartú de réir mar is gá. Agus é sin á dhéanamh aige, cuirfidh sé an méid seo a leanas san áireamh:
- (a) an treoir a thugtar maidir le maolán arna ríomh i gcomhréir le mír 2;
 - (b) an treoir a leanann BERS faoi láthair i gcomhréir le hAirteagal 135(1)(a), (c) agus (d) agus aon mholtaí a d'eisigh BERS maidir le ráta maolánach a shocrú;
 - (c) athróga eile a mheasann an t-údarás ainmnithe a bheith ábhartha chun aghaidh a thabhairt ar an riosca timthriallach sistéamach.
4. Is idir 0 % agus 2.5 %, agus é calabraithe i gcéimeanna de 0.25 pointe céatadáin nó iolraithe faoi 0.25 pointe céatadáin, a bheidh an ráta frithimthriallach maolánach, arna shloinneadh mar chéatadán de mhéid iomlán na neamhchosanta ar riosca arna ríomh i gcomhréir le hAirteagal 92(3) de Rialachán (AE) Uimh. 575/2013, na n-institiúidí a bhfuil neamhchosaintí creidmheasa acu sa Bhallstát sin. I gcás ina bhfuil údar leis ar bhonn na gcúiseanna a leagtar amach i mír 3, féadfaidh údarás ainmnithe ráta frithimthriallach maolánach a shocrú atá os cionn 2.5% de mhéid iomlán na neamhchosanta arna ríomh i gcomhréir le hAirteagal 92(3) de Rialachán (AE) Uimh. 575/2013 chun na críche a leagtar amach in Airteagal 140(2) den Treoir seo.

5. An chéad uair a dhéanann údarás ainmnithe an ráta fritimthriallach maolánach a shocrú os cionn náid, nó i gcás, ina dhiaidh sin, ina méadaíonn údarás ainmnithe an socrú atá i réim maidir leis an ráta friththimthriallach maolánach, cinnfidh sé freisin an dáta óna mbeidh ar na hinstitiúidí an maolán méadaithe sin a chur chun feidhme chun críocha a chúlchiste fritimthriallach institiúidsonrach a ríomh. Ní bheidh an dáta sin tráth nach déanaí ná 12 mhí tar éis an dáta a bhfógraítear an socrú maidir le maolán méadaithe i gcomhréir le mír 7. I gcás dáta ar lú ná 12 mhí é tar éis an dáta a bhfógraítear an socrú maidir le maolán méadaithe, beidh údar leis an sprioc-am níos giorra ar bhonn imthosca eisceachtúla.
6. I gcás ina laghdaíonn údarás ainmnithe an ráta fritimthriallach maolánach atá ann cheana, bíodh sé laghdaithe go náid nó ná bíodh, cinnfidh sé an tréimhse tháscach a meastar nach dtiocfaidh méadú ar an ráta maolánach lena linn freisin. Mar sin féin, ní bheidh an tréimhse tháscach ina ceangal ar an údarás ainmnithe.
7. Tabharfaidh gach údarás ainmnithe fógra maidir leis an measúnú ráithiúil ar an ráta fritimthriallach maolánach, agus maidir le hathbhreithniú más infheidhme, trína fhoilsiú ar a shuíomh gréasáin. Beidh an méid seo a leanas ar a laghad san fhógra:
 - (a) an ráta fritimthriallach maolánach is infheidhme;
 - (b) an cóimheas ábhartha creidmheas-go-OTI agus an claonadh atá aige ón treocht fhadtéarmach;
 - (c) an treoir a thugtar maidir le maolán arna ríomh i gcomhréir le mír 2;
 - (d) bonn cirt leis an ráta maolánach sin;
 - (e) i gcás ina méadaítear an ráta maolánach, an dáta óna mbeidh ar na hinstitiúidí an ráta méadaithe maolánach sin a chur i bhfeidhm chun críocha a gcúlchiste fritimthriallach institiúidsonrach a ríomh;

- (f) más dáta ar lú ná 12 mhí tar éis dháta an fhógra faoin mír seo é an dáta dá dtagraítear i bpointe (e), déanfar tagairt do na himthosca eisceachtúla ina dtugtar údar leis an sprioc-am níos giorra chun iarratas a dhéanamh;
- (g) i gcás ina laghdaítear an ráta maolánach, an tréimhse tháscach a meastar nach dtiocfaidh méadú ar an ráta maolánach lena linn, maille le bonn cirt leis an tréimhse sin;

Déanfaidh na húdaráis ainmnithe gach beart réasúnach chun uainiú an fhógra sin a chomhordú.

Tabharfaidh na húdaráis ainmnithe fógra faoi gach méadú nó laghdú ar an ráta fritimthriallach maolánach agus an faisnéis is gá mar a shonraítear i bpointí (a) go (g) do BERS. Foilseoidh BERS ar a shuíomh gréasáin gach ráta maolánach den sórt sin ar tugadh fógra ina leith agus gach faisnéis ghaolmhar.

(31) In Airteagal 141, cuirtear an méid seo a leanas in ionad mhír 1 go mír 6:

"1. Ní dhéanfaidh institiúid a chomhlíonann an ceanglas maoláin chomhcheangailte dáileachán i ndáil le caipiteal Ghnáthchothromas Leibhéal 1 a mhéad a laghdódh sé a caipiteal Ghnáthchothromas Leibhéal 1 go leibhéal nach gcomhlíontar an ceanglas maoláin chomhcheangailte a thuilleadh.

2. Ríomhfaidh institiúid a mhainníonn an ceanglas maoláin chomhcheangailte a chomhlíonadh an t-uasmhéid indáilte ('UI') i gcomhréir le mír 4 agus cuirfidh sí an t-uasmhéid indáilte sin in iúl don údarás inniúil.

I gcás ina mbeidh feidhm leis an gcéad fhomhír, ní dhéanfaidh an institiúid aon cheann de na gníomhaíochtaí seo a leanas sula mbeidh an t-uasmhéid indáilte ríofa aici:

- (a) dáileachán a dhéanamh i ndáil le caipiteal Ghnáthchothromas Leibhéal 1;
- (b) oibleagáid a chruthú chun luach saothair inathraitheach nó sochair phinsin lánroghnacha a íoc nó luach saothair inathraitheach a íoc más rud é gur cruthaíodh an oibleagáid chun íoc tráth ar mhainnigh an institiúid na ceanglais maoláin chomhcheangailte a chomhlíonadh;
- (c) íocaíochtaí a dhéanamh ar ionstraimí Chaipiteal Breise Leibhéal 1.

3. I gcás ina mainneoidh institiúid a ceanglas maoláin chomhcheangailte a chomhlíonadh nó bheith os a chionn, ní dháilfidh sí níos mó ná an t-uasmhéid indáilte arna ríomh i gcomhréir le mír 4 trí aon ghníomhaíocht dá dtagraítear i bpointe (a), i bpointe (b) agus i bpointe (c) den dara fomhír de mhír 2.

4. Ríomhfaidh institiúidí an t-uasmhéid indáilte tríd an tsuim arna ríomh i gcomhréir le mír 5 a iolrú faoin bhfachtóir arna chinneadh i gcomhréir le mír 6. Laghdófar an t-uasmhéid indáilte le haon cheann de na gníomhaíochtaí dá dtagraítear i bpointe (a), i bpointe (b) agus i bpointe (c) den dara fomhír de mhír 2.

5. Beidh sa tsuim atá le hiolrú i gcomhréir le mír 4 na nithe seo a leanas:

- (a) brabúis eatramhacha nach n-áirítear ar chaipiteal Ghnáthchothromas Leibhéal 1 de bhun Airteagal 26(2) de Rialachán (AE) Uimh. 575/2013, ar glanbhrabúis iad i ndáil le haon dáileachán brabús nó aon íocaíocht a bhaineann le haon cheann de na gníomhaíochtaí dá dtagraítear i bpointe (a), i bpointe (b) nó i bpointe (c) den dara fomhír de mhír 2 den Airteagal seo;

móide

- (b) brabúis dheireadh na bliana nach n-áirítear ar chaipiteal Ghnáthchothromas Leibhéal 1 de bhun Airteagal 26(2) de Rialachán (AE) Uimh. 575/2013, ar glanbhrabúis iad i ndáil le haon dáileachán brabús nó aon íocaíocht a bhaineann le haon cheann de na gníomhaíochtaí dá dtagraítear i bpointe (a), i bpointe (b) nó i bpointe (c) den dara fomhír de mhír 2 den Airteagal seo;

lúide

- (c) (méideanna a bheadh le híoc i gcáin dá mba rud é go mbeadh na hítimí a shonraítear i bpointe (a) agus i bpointe (b) den mhír seo le coimeád.

6. Déanfar an fachtóir a chinneadh mar a leanas:

- (a) i gcás ina mbeidh caipiteal Ghnáthchothromas Leibhéal 1 arna choimeád ag an institiúid nach n-úsáidtear chun aon cheann de na ceanglais cistí dílse a chomhlíonadh faoi phointe (a), faoi phointe (b) agus faoi phointe (c) d'Airteagal 92(1) de Rialachán (AE) Uimh. 575/2013, agus faoi Airteagal 104(1)(a) den Treoir seo arna shloinneadh mar chéatadán de mhéid iomlán na neamhchosanta ar riosca arna ríomh i gcomhréir le hAirteagal 92(3) de Rialachán (AE) Uimh. 575/2013, laistigh den chéad cheathairíl (is é sin an ceann is ísle) den cheanglas maoláin chomhcheangailte, is é 0 an fachtóir a bheidh ann;

- (b) i gcás ina mbeidh caipiteal Ghnáthchothromas Leibhéal 1 arna choimeád ag an institiúid nach n-úsáidtear chun aon cheann de na ceanglais cistí dílse a chomhlíonadh faoi phointe (a), faoi phointe (b) agus faoi phointe (c) d'Airteagal 92(1) de Rialachán (AE) Uimh. 575/2013 agus faoi Airteagal 104(1)(a) den Treoir seo, arna shloinneadh mar chéatadán de mhéid iomlán na neamhchosanta ar riosca arna ríomh i gcomhréir le hAirteagal 92(3) de Rialachán (AE) Uimh. 575/2013, laistigh den dara ceathairíl den cheanglas maoláin chomhcheangailte, is é 0.2 an fachtóir a bheidh ann;
- (c) i gcás ina mbeidh caipiteal Ghnáthchothromas Leibhéal 1 arna choimeád ag an institiúid nach n-úsáidtear chun na ceanglais cistí dílse a chomhlíonadh faoi phointe (a), faoi phointe (b) agus faoi phointe (c) d'Airteagal 92(1) de Rialachán (AE) Uimh. 575/2013, agus faoi Airteagal 104(1)(a) den Treoir seo, arna shloinneadh mar chéatadán de mhéid iomlán na neamhchosanta ar riosca arna ríomh i gcomhréir le hAirteagal 92(3) de Rialachán (AE) Uimh. 575/2013, laistigh den tríú ceathairíl den cheanglas maoláin chomhcheangailte, is é 0.4 an fachtóir a bheidh ann;
- (d) nuair atá an caipiteal Gnáthchothromas Leibhéal 1 a choinníonn an institiúid nach n-úsáidtear chun na ceanglais cistí dílse a chomhlíonadh faoi (b) agus (c) d'Airteagal 92(1) de Rialachán (AE) Uimh. 575/2013 agus faoi Airteagal 104(1)(a) den Treoir seo, a chuirtear in iúl mar chéatadán de mhéid iomlán na neamhchosanta ar riosca arna ríomh i gcomhréir le hAirteagal 92(3) de Rialachán (AE) Uimh. 575/2013, laistigh den cheathrú ceathairíl (is é sin, an ceann is airde) den cheanglas maoláin chomhcheangailte, is é 0,6 an fachtóir a bheidh ann;

Déanfar cuimsí íochtair agus uachtair gach ceathairíl den cheanglas maoláin chomhcheangailte a ríomh mar a leanas:

$$\text{Lower bound of quartile} = \frac{\text{Combined buffer requirement}}{4} \times (Q_n - 1)$$

$$\text{Upper bound of quartile} = \frac{\text{Combined buffer requirement}}{4} \times Q_n$$

Léiríonn "Q_n" orduimhir na ceathairíle lena mbaineann."

(32) Cuirtear isteach an tAirteagal 141a seo a leanas:

"Airteagal 141a

Mainneachtain maidir leis an gceanglas maoláin chomhcheangailte a chomhlíonadh

Measfar go mainneoidh institiúid an ceanglas maoláin chomhcheangailte a chomhlíonadh chun críocha Airteagal 141 i gcás nach mbeidh cistí dílse agus dliteanais incháilithe aici i méid agus den cháilíocht is gá chun an ceanglas a shainmhínítear in Airteagal 128(6) agus gach ceann de na ceanglais seo a leanas a chomhlíonadh san am céanna:

- (a) Airteagal 92(1)(a) de Rialachán (AE) Uimh. 575/2013 agus an ceanglas in Airteagal 104(1)(a) den Treoir seo;
- (b) Airteagal 92(1)(b) de Rialachán (AE) Uimh. 575/2013 agus an ceanglas in Airteagal 104(1)(a) den Treoir seo;

- (c) Airteagal 92(1)(c) de Rialachán (AE) Uimh. 575/2013 agus an ceanglas in Airteagal 104(1)(a) den Treoir seo."

(32a) Cuirtear isteach na hairteagail nua seo a leanas, Airteagal 141b agus Airteagal 141c, tar éis Airteagal 141a:

"Airteagal 141b

Srianta ar dháileacháin i gcás ina mainnítear an ceanglas maoláin cóimheasa gearála a chomhlíonadh

1. Ní dhéanfaidh institiúid a chomhlíonann an ceanglas maoláin cóimheasa gearála de bhun Airteagal 92(1a) de Rialachán (AE) 575/2013 dáileachán i ndáil le caipiteal Leibhéal 1 a mhéad a laghdódh sé a caipiteal ar Leibhéal 1 go leibhéal nach gcomhlíontar an ceanglas maoláin cóimheasa gearála a thuilleadh.
2. Institiúid a mhainníonn an ceanglas maoláin cóimheasa gearála a chomhlíonadh, ríomhfaidh sí an t-uasmhéid indáilte a bhaineann le cóimheasa gearála ('L-MDA') i gcomhréir le mír 4 agus cuirfidh sí an t-uasmhéid indáilte sin a bhaineann le cóimheas gearála in iúl don údarás inniúil.

I gcás ina mbeidh an chéad fhomhír infheidhme, ní dhéanfaidh an institiúid aon cheann de na gníomhaíochtaí seo a leanas sula mbeidh an t-uasmhéid indáilte a bhaineann le cóimheas gearála ríofa aici:

- (a) dáileachán a dhéanamh i ndáil le caipiteal Ghnáthchothromas Leibhéal 1;
- (b) oibleagáid a chruthú chun luach saothair inathraitheach nó sochair phinsin lánroghnacha a íoc nó luach saothair inathraitheach a íoc más rud é gur cruthaíodh an oibleagáid chun íoc tráth ar mhainnigh an institiúid na ceanglais maoláin chomhcheangailte a chomhlíonadh;
- (c) íocaíochtaí a dhéanamh ar ionstraimí Chaipiteal Breise Leibhéal 1.

3. I gcás ina mainneoidh institiúid a ceanglas maoláin cóimheasa gearála a chomhlíonadh nó bheith os a chionn, ní dháilfidh sí níos mó ná an an t-uasmhéid indáilte a bhaineann le cóimheas gearála arna ríomh i gcomhréir le mír 4 trí aon ghníomhaíocht dá dtagraítear i bpointe (a), i bpointe (b) agus i bpointe (c) den dara fomhír de mhír 2.
4. Ríomhfaidh institiúidí an an t-uasmhéid indáilte a bhaineann le cóimheas gearála tríd an tsuim arna ríomh i gcomhréir le mír 5 a iolrú faoin bhfachtóir arna chinneadh i gcomhréir le mír 6. Laghdófar an an t-uasmhéid indáilte a bhaineann le cóimheas gearála le haon cheann de na gníomhaíochtaí dá dtagraítear i bpointe (a), i bpointe (b) nó i bpointe (c) den dara fomhír de mhír 2.
5. Beidh sa tsuim atá le hiolrú i gcomhréir le mír 4 na nithe seo a leanas:
 - (a) brabúis eatramhacha nach n-áirítear ar chaipiteal Ghnáthchothromas Leibhéal 1 de bhun Airteagal 26(2) de Rialachán (AE) Uimh. 575/2013, ar glanbhrabúis iad i ndáil le haon dáileachán brabús nó aon íocaíocht a bhaineann le haon cheann de na gníomhaíochtaí dá dtagraítear i bpointe (a), i bpointe (b) nó i bpointe (c) den dara fomhír de mhír 2 den Airteagal seo;

móide

- (b) brabúis deiridh bliana nach n-áirítear ar chaipiteal Ghnáthchothromas Leibhéal 1 de bhun Airteagal 26(2) de Rialachán (AE) Uimh. 575/2013, ar glanbhrabúis iad i ndáil le haon dáileachán brabús nó aon íocaíocht a bhaineann leis na gníomhaíochtaí dá dtagraítear i bpointe (a), i bpointe (b) nó i bpointe (c) den dara fomhír de mhír 2 den Airteagal seo;

lúide

- (c) méideanna a bheadh le híoc i gcáin dá mba rud é go mbeadh na hítimí a shonraítear i bpointe (a) agus i bpointe (b) den mhír seo le coimeád.

6. Déanfar an fachtóir dá dtagraítear i mír 4 a chinneadh mar seo a leanas:

- (a) i gcás ina mbeidh caipiteal Leibhéal 1 arna choimeád ag an institiúid nach n-úsáidtear chun na ceanglais a chomhlíonadh faoi Airteagal 92(1)(d) de Rialachán (AE) Uimh. 575/2013 agus faoi Airteagal 104(1)(a) den Treoir seo agus aghaidh a thabhairt ar riosca gearála iomarcaí nach gcumhdaítear go leordhóthanach le hAirteagal 92(1)(d) de Rialachán (AE) Uimh. 575/2013, arna shloinneadh mar chéatadán de mhéid iomlán na neamhchosanta ar riosca arna ríomh i gcomhréir le hAirteagal 429(4) de Rialachán (AE) Uimh. 575/2013, laistigh den chéad cheathairíl (is é sin, an ceann is ísle) den cheanglas maoláin cóimheasa gearála, is é 0 an fachtóir a bheidh ann;
- (b) i gcás ina mbeidh caipiteal Leibhéal 1 arna choimeád ag an institiúid nach n-úsáidtear chun an ceanglas a chomhlíonadh faoi Airteagal 92(1)(d) de Rialachán (AE) Uimh. 575/2013, agus faoi Airteagal 104(1)(a) den Treoir seo agus aghaidh á tabhairt ar riosca gearála iomarcaí nach gcumhdaítear go leordhóthanach le hAirteagal 92(1)(d) de Rialachán (AE) Uimh. 575/2013, arna shloinneadh mar chéatadán de mhéid iomlán na neamhchosanta arna ríomh i gcomhréir le hAirteagal 429(4) de Rialachán (AE) Uimh. 575/2013, laistigh den dara ceathairíl den cheanglas maoláin cóimheasa gearála, is é 0,2 an fachtóir a bheidh ann;
- (c) i gcás ina mbeidh caipiteal Leibhéal 1 arna choimeád ag an institiúid nach n-úsáidtear chun an ceanglas a chomhlíonadh faoi Airteagal 92(1)(d) de Rialachán (AE) Uimh. 575/2013 agus faoi Airteagal 104(1)(a) den Treoir seo agus aghaidh á tabhairt ar ghíaráil iomarcach nach gcumhdaítear go leordhóthanach le hAirteagal 92(1)(d) de Rialachán (AE) Uimh. 575/2013, arna sloinneadh mar chéatadán de mhéid iomlán na neamhchosanta arna ríomh i gcomhréir le hAirteagal 429(4) de Rialachán (AE) Uimh. 575/2013, laistigh den tríú ceathairíl den cheanglas maoláin cóimheasa gearála, is é 0,4 an fachtóir a bheidh ann;

- (d) i gcás ina mbeidh caipiteal Leibhéal 1 arna choimeád ag an institiúid nach n-úsáidtear chun an ceanglas a chomhlíonadh faoi Airteagal 92(1)(d) de Rialachán (AE) Uimh. 575/2013 agus faoi Airteagal 104(1)(a) den Treoir seo agus aghaidh á tabhairt ar riosca gearála iomarcaí nach gcumhdaítear go leordhóthanach le hAirteagal 92(1)(d) de Rialachán (AE) Uimh. 575/2013, arna shloinneadh mar chéatadán de mhéid iomlán na neamhchosanta arna ríomh i gcomhréir le hAirteagal 429(4) de Rialachán (AE) Uimh. 575/2013, laistigh den cheathrú ceathairil (is é sin, an ceann is airde) den cheanglas maoláin cóimheasa gearála, is é 0,6 an fachtóir a bheidh ann.

Déanfar cuimsí íochtair agus uachtair gach ceathairil den cheanglas maoláin cóimheasa gearála a ríomh mar seo a leanas:

$$\text{Lower bound of quartile} = \frac{\text{Leverage ratio buffer requirement}}{4} \times (Q_n - 1)$$

$$\text{Upper bound of quartile} = \frac{\text{Leverage ratio buffer requirement}}{4} \times Q_n$$

Léiríonn "Q_n" orduimhir na ceathairile lena mbaineann."

7. Ní bheidh feidhm ag na srianta a fhorchuirtear leis an Airteagal seo ach amháin i gcás na n-íocaíochtaí a mbíonn laghdú ar chaipiteal Leibhéal 1 nó laghdú ar bhrabúis de thoradh orthu, agus i gcás nach ionann íocaíocht a fhionraí nó mainneachtain í a íoc agus cás mainneachtana nó coinníoll chun tús a chur le himeachtaí faoin réimeas dócmhainneachta is infheidhme maidir leis an institiúid.

8. I gcás ina mainneoidh institiúid an ceanglas maoláin cóimheasa gearála a chomhlíonadh agus go bhfuil sé ar intinn aici aon bhrabús atá ar fáil lena dháileadh a dháileadh nó gníomhaíocht a dhéanamh dá dtagraítear i bpointe (a), i bpointe (b) agus i bpointe (c) den dara fomhír de mhír 2, tabharfaidh sí fógra don údarás inniúil agus cuirfidh sí an fhaisnéis a liostaítear in Airteagal 141(8) den Treoir um Cheanglais Chaipitil ar fáil, cé is moite de phointe (a)(iii), agus den uasmhéid indáilte a bhaineann le cóimheas gearála arna ríomh i gcomhréir le mír 4.
9. Déanfaidh na hinstitiúidí socruithe a choimeád chun a áirithiú go ndéantar méid na mbrabús atá ar fáil lena ndáileadh agus an t-uasmhéid indáilte a bhaineann le cóimheas gearála ríomh go cruinn, agus beidh siad in ann a léiriú don údarás inniúil a cruinne atá siad arna iarraidh sin orthu.
10. Chun críocha mhír 1 agus mhír 2, áireofar i ndáileachán i dtaca le caipiteal Leibhéal 1 aon cheann de na míreanna a liostaítear in Airteagal 141(10).

Airteagal 141c

Mainneachtain maidir leis an gceanglas maoláin cóimheasa gearála a chomhlíonadh

Measfar gur mhainnigh institiúid an ceanglas maoláin cóimheasa gearála a chomhlíonadh chun críocha Airteagal 141b i gcás nach mbeidh Caipiteal Leibhéal 1 aici sa mhéid is gá chun an ceanglas a shainmhínítear in Airteagal 92(1a) de Rialachán (AE) Uimh. 575/2013 agus an ceanglas in Airteagal 92(1)(d) de Rialachán (AE) Uimh. 575/2013 agus in Airteagal 104(1) den Treoir seo a chomhlíonadh ag an am céanna, agus aghaidh á tabhairt ar riosca gearála iomarcaí nach gcumhdaítear go leordhóthanach le pointe (d) d'Airteagal 92(1) de Rialachán (AE) Uimh. 575/2013."

(32b) Cuirtear an méid seo a leanas in ionad na chéad fhomhíre d'Airteagal 142(1):

"1. I gcás ina mainneoidh institiúid an ceanglas maoláin chomhcheangailte atá uirthi nó, más infheidhme, an ceanglas maoláin cóimheasa gearála atá uirthi a chomhlíonadh, cuirfidh sí plean maidir le caomhnú caipitil le chéile agus cuirfear faoi bhráid an údaráis inniúil é tráth nach déanaí ná cúig lá oibre tar éis gur aithníodh gur mhainnigh an institiúid an ceanglas sin a chomhlíonadh, mura n-údaraíonn an t-údarás inniúil moill níos faide suas go 10 lá."

(33) []

(34) In Airteagal 146, scriostar pointe (a).

(34a) Cuirtear an Chaibidil nua seo a leanas isteach tar éis Airteagal 159:

"CAIBIDIL 1a Treoir um Cheanglais Chaipitil (CRD)

Forálacha idirthréimhseacha maidir le cuideachtaí sealbhaíochta airgeadais agus cuideachtaí sealbhaíochta airgeadais measctha

Airteagal 159a

Forálacha idirthréimhseacha maidir le cuideachtaí sealbhaíochta airgeadais agus cuideachtaí sealbhaíochta airgeadais measctha a fhormheas

Déanfaidh máthairchuideachtaí sealbhaíochta airgeadais agus máthairchuideachtaí sealbhaíochta airgeadais measctha atá ann cheana ar [an lá a dtiocfaidh an Treoir seo i bhfeidhm] iarratas ar fhormheas faoi Airteagal 21a den Treoir seo faoi cheann [dhá bhliain tar éis theacht i bhfeidhm na Treorach seo]. I gcás ina mainneoidh cuideachta sealbhaíochta airgeadais nó cuideachta sealbhaíochta airgeadais mheasctha iarratas ar fhormheas a dhéanamh faoi [dhá bhliain tar éis theacht i bhfeidhm na Treorach seo], déanfar bearta iomchuí de bhun Airteagal 21a(5).

Le linn na hidirthréimhse chun iarratas a dhéanamh dá dtagraítear sa chéad fhomhír, beidh na cumhachtaí maoirseachta uile is gá ag na húdaráis inniúla i gcomhréir leis an Treoir seo a thugtar dóibh i dtaca le cuideachtaí sealbhaíochta airgeadais nó cuideachtaí sealbhaíochta airgeadais measctha faoi réir formheas faoi Airteagal 21a chun críocha na maoirseachta comhdhlúite".

(35) In Airteagal 161, cuirtear isteach an mhír 10 seo a leanas:

"10. Faoi 31 Nollaig 2023, déanfaidh an Coimisiún athbhreithniú agus tuarascáil a chur i dtoll a chéile ar chur chun feidhme agus chur i bhfeidhm na gcumhachtaí maoirseachta dá dtagraítear i bpointe (j) agus (l) d'Airteagal 104(1) agus cuirfidh sé tuarascáil faoi bhráid Pharlaimint na hEorpa agus na Comhairle. "

Airteagal 2

Trasuí

1. Déanfaidh na Ballstáit na dlíthe, na rialúcháin agus na forálacha riaracháin is gá chun an Treoir seo a chomhlíonadh a ghlacadh agus a fhoilsiú faoi cheann 18 mí tar éis theacht i bhfeidhm na Treorach seo ar a dhéanaí. Cuirfidh siad téacs na bhforálacha sin in iúl don Choimisiún láithreach.

Cuirfidh siad na forálacha sin i bhfeidhm ó [18 mí + 1 lá tar éis theacht i bhfeidhm na Treorach seo]. Mar sin féin, beidh feidhm ag na forálacha is gá le go gcomhlíonfar na leasuithe a leagtar amach i bpointe (13) agus i bpointe (18) d'Airteagal 1 ina bhfuil leasuithe ar Airteagal 84 agus Airteagal 98 de Threoir 2013/36/AE ó [dhá bhliain tar éis theacht i bhfeidhm na Treorach seo] agus beidh feidhm ag na forálacha is gá le go gcomhlíonfar na leasuithe a leagtar amach i bpointe (32a) agus i bpointe (32 b) ón 1 Eanáir 2022.

Nuair a ghlacfaidh na Ballstáit na forálacha sin, beidh tagairt iontu don Treoir seo nó beidh tagairt den sórt sin ag gabháil leo tráth a bhfoilsithe oifigiúil. Is iad na Ballstáit a chinnfidh an tslí le tagairt den sórt sin a dhéanamh.

2. Déanfaidh na Ballstáit téacs phríomhfhorálacha an dlí náisiúnta a ghlacfaidh siad sa réimse a chumhdaítear leis an Treoir seo a chur in iúl don Choimisiún.

Airteagal 3

Teacht i bhfeidhm

Tiocfaidh an Treoir seo i bhfeidhm an fichiú lá tar éis lá a foilsithe in *Iris Oifigiúil an Aontais Eorpaigh*.

Airteagal 4

Seolaithe

Dírítear an Treoir seo chuig na Ballstáit.

Arna dhéanamh sa Bhruiséil,

<i>Thar ceann Pharlaimint na hEorpa</i>	<i>Thar ceann na Comhairle</i>
<i>An tUachtarán</i>	<i>An tUachtarán</i>